

ዛሬ ማጻፋ ጊደ ቆፋ

ዛሬ ማጻፋይ ኢስራኤል አሳይ ባዞ ቢታን ዳሮ ዋዴ ሄሜቲሽ ካናኔ ጌላናስ ጉል አሺዲ ሞአቤ ዴሬን ጋምኢዳፔ ጉዬ ሙሴይ ኢስታስ ዛሪ ዛሪ ዮቲዳ ዮኦታ ኦይኪዴስ። ዛሬ ማጻፋን ጸፊቲ ዲዛይቲ ዳሮ ጎኢዛ ሚሻታ ጊደፊ ኢሲ ኢሲ ኦሶቲ ሃይሳፊ ካሊ ዲዛይታ፡ 1. ሙሴይ ካሴ አፏዳ ኦይዱ ታሙ ላይላታን ሃኒዳ ዳሮ ጌታ ሃኖታ ዩሺ ቆፒዲ ዮቴስ። ጸሳይ ኢስታ ባዞ ቢታን ዋስቲ ዋስቲ ካሌሊዳኮ ዴሬዛ አኬኪሶን አሳይ ጸሳስ አማኔቲዛ አስ ጊዳና ማላኔ ሱሬቲላን ኢዛስ አዛዜታና ማላ ቆፍሲዴስ። 2. ሙሴይ ታሙ አዛዞታ ዛሪ ዛሪ ዮቲሽ ሃራፔካ ኮይሮ አዛዞዛ ቢርሼሊ ቢርሺ ዮቲዲ ዴሬዚ ጸሳስ ጸላ ጎይናና ማላ ቆፍሴስ፤ ሄሳራካ ጋሊዲ ኢስራኤል አሳይ ኢስታስ ሂዶታን ኢሜቲዳ ዴሬዩን ዲሼ ኢስቲ ናጋናስ ቤሲዛ ዋጋታ ዲማ ዲማ ዋጋታ ቆንጪሲ ዮቲዴስ። 3. ሙሴይ ጸሲ ኢዛራ ጫቄቲዳ ቃላይ ኣይ ማላኮ ዴሬዛስ ቢርሺ ዮቲዲ ዴሬዚ ሄሳ ሄ ቃላስ ባ አማኔቲላ ኦራጸሳና ማላ ኢስታ ቆፍሲዴስ። 4. ኢያሶይ ሙሴሶሆን ጊዲዲ ጸሳ ዴራ ካሌላና ማላ ሹሜቲዴስ። ሙሴይ ጸሳ አማኔቲላ ጊሻስ ጊጊዳ ጊንጾ ዩጲዳፔ ጉዬ ኢስራኤል ዴራ ኡባ አንጂዳፔ ጉዬ ዮርዳናሴ ሻፋፔ አርሼይ ዉሊዛ ባጋራ ዲዛ ሞአቤ ዴሬን ሃይቂዴስ። ሃ ማጻፋስ ኣይፊ ዮኦይ ጸሲ ባ ዶሲዳይታኔ ዶሬቲዳ ባ ዴሬታ ኢዚ አሺዳይሳኔ አንጂዳይሳ ዮቴስ። ዴሬዚካ ጸሳ አንጃይ ኢዛፔ ሻኬቶንታ ሹምፖራ ፓጻ ዳና ማላ ጸሲ አሳስ ኦሊዳ ኦሶ ኡባ ዋዴ አኬኪዲ ኢስቲ ጸሰ ሲቃናሲኔ ኢዛስ አዛዜታናስ ቤሲዛይሳ አሳ ቆፍሲዴስ። ሃ ማጻፋስ ኣይፊ ቆፋታ ኦይኪዳ ጸቂሴቲ ሃ ማጻፋን ሹምፖ 6:4-6 ጋካናስ ዲዛይታ ጊዲሺን ሄይቲካ ዩሱሲ፡ «አዛዞታ ኡባታፔ አፏዛ ጌታ አዛዞታ» ጊዲ ኢስታስ ዮቲዳ ቃላታ ኦይኪዳይታ። ሄይቲካ፡ «ኔኒ ኔ ጎዳ ኩሜላ ዋዚናፔ፡ ኩሜላ ሹምፖፊ፡ ኩሜላ ዋልቃፊ ሲቃ» ጊዛይሳ።

ሃ ማጻፋይ ኦይኪዳ ኩሜላ ቆፋ

ሙሴይ ኮይሮ ሃሳይዳ ሃሳያ 1:1—4:49

ሙሴይ ናምአንላ ሃሳይዳ ሃሳያ 5:1—26:19

ታሙ አዛዞታ 5:1—10:22

ዋጋታ፡ ማራታኔ ሴራታ 11:1—26:19

ኢስቲ ካናኔ ጌላናፔ ካሴ ኢስታስ አሜቲዳ ካሌዋ ዋጋታ 27:1
 —28:68
 ጫቆ ቃላ ኦራጺሶ 29:1—30:20
 ሙሴይ ወርሴላን ሃሳይዳ ቃላ 31:1—33:29
 ሙሴ ሃይቆ 34:1-12

ኢስራኤል አሳይ ሲና ዙማ ማታፔ ዴንዲ ባና ማላ አሜቲዳ አዛዘ

¹ ሃይሳ ሃ ማጸፋን ዲዛ ቃላይ ወሪካ ዮርዳኖሴ ሻፋፔ ሄ ፒንፋን አርሼይ ሞኪዛ ባጋራ ዲዛ ባዘን ኢስቲ ዲሺን ሙሴይ ኢስራኤል ናይታስ ዮቲዳ ቃላ። ሙሴይካ ሃ ቃላ ዮቲዛ ዋዴ ኢስቲ ሱፌ ጌቲቲዛሶ ጊናራ ፓራኔ ካታማፔ ቃሴካ ሃራ ባጋራ ቶፔሌ፥ ላባ፥ ሃጺሮቴኔ ዲዛሃቤ ጌቲቲዛ ካታማታ ጊዶን ዲዛ ዮርዳኖሴ ሾባን ዴቲስ።

² ሲና ዙማፔ ዴንዲዲ ቃዴሴ ባሪኔ ጋካናስ ኤዶሜ ዙማታ ቦላሪ ኤፊዛ ቶሆ ኦጌራ ቢኮ ታማኔ ኢሲ ጋላስ ኤኬስ።

³ ጌብጾፔ ኢስቲ ኬዚዳፔ ኦይዱ ታማንሳ ላይሳን ታማኔ ኢሲንፋ አጊናይ ጌሊዳ ኮይሮ ጋላስ ሙሴይ ዴሬዛስ ኤሪሳና ማላ ጎዳይ ኢዛስ ዮቲዳ ቃላ ኡባ ኢስታስ ዮቲዴስ።

⁴ ሄሲካ ሃኒዳይ ሃሴቦኔ ካታማን ካዋቲ ሃሪዛ አሞሬ ዴሬ ካዋ ሲሆኔኔ አስታሮቴን፥ ኤዲራኤ ካታማን ኡቲዲ ሃሪዛ ባሳኔ ካዋ አጌ ጸኒዳፔ ጉዬና።

⁵ አሳይ ዮርዳኖሴፔ አርሼይ ሞኪዛ ባጋራ ሞኦቤ ዴሬን ዲሺን ሙሴይ ሃይሳፌ ካሊ ዲዛ ጎዳ ዋጋ ቆንጨሴል ዶሚዴስ፤

⁶ «ኦኒ ሲና ዙማ ቦላ ዲዛ ዋዴ ጎዳ ኦ ጸሳይ ኦስ፥ ሂኮ አንቲ ሃይሳ ዙማ ቦላ ዳሮ ጋሞኢዴታ፤

⁷ ሃይሳፌ ጉዬ አንቲ ዲዛሶፔ ዴንዲ ጌዴ ጌዜቲዛ አሞሬታ ዴሬ፥ ኢስታ ሄራን ዲዛ አራቤ ዴሬን ዲዛ ጌዜኔ ጋቶ፥ ኔጌቤ ዴሬ፥ ሜዲቲራኔ አባ ላንቄራ፥ ካናኔ ዴሬኔ ሊባናሴ ባጋራ ካንሊዲ ጌታ ሃፋ ኤፊራጺሴ ሻፋ ጋካናስ ካንሊ ቤቲ።

⁸ ሄኮ ታኒ ሃ ቢታዮ አንቲስ አማዲስ፤ አንቲካ ቢዲ አንቲ አዋታስ አብራሃሜስ፥ ዪሳቃስ፥ ያቆቤሴኔ ኢስታፌ ጉዬን ያና ኢስታ ዜሬሳታስ አማናስ ጎዳይ ጫቂዳ ቢታዮ ላቲቱ፥ ጊዴስ» ጊዲ ዮቲዴስ።

ሙሴይ ዴሬ ካሌሊዛይታ ሹሚዴስ

(ኬሳ 18:13-27)

⁹ ሙሴይ ዴሬዛስ፥ «ሄ ዋዴ ታኒ አንቲስ፥ ሂታኒ ታርካ አንቲና ካሌላናስ ዳንዳይኬ።

- 10 እንቴ ጎዳይ እንቴ ቆዳ ሳሎ ጸለንቴ ማላ ዳርሲዳስ።
- 11 ሃኢካ እንቴ አዋታ ጸሳይ ካሴ እንቴስ ኢሚዳ ሂደታ ቃላ ማላ ሺ ዳኮ ጉጂዲ እንቴና አንጆ።
- 12 ጊዶ አቲን ሃኢ እንቴ ጋርሳን ዲዛ ፓላማ፡ ኦሻኔ እንቴ ሜቶዛ ታኒ ታርካ ዎስታ ቢርሻና ዳንዳያዚና?
- 13 እንቴ እንቴ ቆሞፌ ቆሞፌ አኬካይ፡ አጽ ኤራቴሊ ዲዛይታኔ ኦሊ ሎሲዳይታ ዶሪቴ፤ ታኒካ ኢሰታ እንቴ ቦላ ሹማና፡ ጋ ዮታዲስ።
- 14 «እንቴካ፡ ሩኔ ሺሺዳ ቆፋይ ሎኦ፡ ጊ ኤኪዳታ።
- 15 ሄሳ ጊሻሰ ኢሲ ኢሲ ቆሞፌ እንቴ ዶሪዳይታ ኦሶ ሎሲዳይታ፡ አጽ ኤራንቻታኔ አኬኪዛይታ እንቴፌ ኤካዳ ባጋይታ ሻላቃታ፡ ባጋይታ ማቶ ሃላቃታ፡ ባጋይታ ሃሞሳ ሃላቃታኔ አሲራ ሃላቃታ፡ ባጋይታ ቆሞታ ካሌሊዛ ሃላቃ ሂሰታ ሹማዲስ።
- 16 «ታ ሄ ዎዴ ኢሰታስ፡ ሩእንቴ ዴራ ጋርሳን ዴንዲዛ ፓላማኔ ኦሽ ኤኪ ጌላይ ባይንዳ ሱሬ ፒርዳ ፒርዲቴ፤ እንቴ ዴራ ጊዶን ዎይኮ ሃራ ዴሬፔ ዪዲ እንቴ ጊዶን ዲዛ አሳሰ ጌላይ ባይንዳ ሱሬ ፒርዳ ፒርዲቴ።
- 17 እንቴ ጌላ ፒርዳ ፒርዶፍቴ፤ ጉሉ ጊዲን ጊታ ጊዲን ማዶ ፒርዳ ፒርዶፍቴ፤ ፒርዳይ ጸሳሰ ጊዲዳ ጊሻሰ አይ አሳሰካ ባቦፍቴ፤ እንቴፌ ቦላ ጊዲዳይሳ ኡባ ታኮ ኤሂቴ፤ ሄሳ ታኒ ፒርዳና፡ ጋዲስ።
- 18 እንቴ ኦሳናሰ ቤሲዛይሳ ታ እንቴስ ሄ ዎዴ ሎኤላ ዮታዲስ።

ቃዴሴ ባሪኔፔ ዴሬዛ የዪ ዎቺዛይታ ኪቴቴሉ (ታይ 13:1-33)

- 19 «ሄሳፌ ጉዬ ኦ ጎዳይ ኦና አዛዚዳ ማላ ሲና ዙማፔ ዴንዲዳ እንቴ ቤኢዳ ኢታ ባዘዛራ ካንሊዲ አሞሬ ዴሬን ሻራ ሜንሶራ አጂ ቢዲ ቃዴሴ ባሪኔ ጋኪዶስ።
- 20 ታኒ እንቴስ፡ ጸሳይ ኦና ላቲሳናሰ ቃላ ጌሊዳ ሻራ ሜንሶ ጊዲዳ አሞሬ ዴሬ ሄኮ ጋኪዳታ።
- 21 ሄ ዴሬዮ ሃኖ ቤኢቴ! ጎዳይ ኦ አዋታ ጸሳይ ቤኒ አዛዚዳ ማላ እንቴ ጌሊዲ ኢዞ ላቲቴ፤ ባቦፍቴኔ ሂደታ ቃንጸፍቴ፡ ጋ ዮታዲስ።
- 22 «እንቴ ኡባቲካ ታኮ ዪዲ፡ ሩሄ ቢታይን ዲዛ ካታማቲ አይ ማላኮ ቃሴ ኦና ሄ ጋሳና ኦጌይካ አይ ማላ ኦጌኮ ቢ ዎቺ ሲሚዲ ኦሰ ዮታና አሳታ ኦ ጋርሳፌ አኔ ዶርሰ፡ ጊዲ ታና ኦይቺዳታ።

23 «ሄሳ ሂስታናይሲ ታስ ሎኦ ሚሳቲ ቤቲን ኢንቴ ጋርሳፌ ቆማፌ ቆማፌ ኢሲ ኢሲ ኣስ ዶራዳ ታማኔ ናሞኡ ኣሳታ ዬዳዲስ።

24 ኢስቲካ ሻራ ሜንሉ ዳራራ ካንሊ ቢዲ ኤሽኮሌ ሾባ ጋካናስ ዩዩ ጸሞሲ ጸሊዳ።

25 ኢስቲካ ሂን ባ ቤኢዳ ሚላ ኣይፊፔ ኣማርዳይሳ ኤኪ ዩዲ ጎዳ ኑ ጸሳይ ኑስ ኣማና ቆፒዳ ቢታያ ኬሃ ሎኦ ቢታ ጊዲዳይሳ ኑስ ቆንጨሲ ዮቲዳ።

26 «ጊዶ ኣቲን ጎዳ ኢንቴ ጸሳ ኣዛዘ ቦላ ማካሊዳ ጊሻስ ሄ ቢታዮ ጌላናስ ኮዩቤኬታ።

27 ኢንቴ ኢንቴ ዱንካኔን፣ ሳሲ ኑና ኢጲዴስ፤ ኢዚ ኑና ጊብጾፔ ኬሲዳይ ሃይታ ኣሞሬ ኣሳታን ኑና ዎጲሳናሲኔ ኢስታ ኩሼን ኑና ኣሊ ኢማናሳ፤

28 ሂስቲን ኑ ሄ ኣዛስ ቢዛኒ? ኑኒ ባቦስ፤ ኑኒ ኪቲዳ ኣሳቲ ሄን ዲዛ ኣሳይ ዉሪካ ሚኖኔ ኬሂ ኣዲሳታ ጊዲዳይሳ ቃሴካ ኢስቲ ዲዛ ካታማታ ገምቤይ ሳሎ ጋኪዳይሳ ኑስ ዮቲዳ፤ ኬሂ ኣዲስ ጊዲዳ ኤናቄ ናይታ ቤኢዳ) ጊዲ ዙዙሚዴታ።

29 «ጊዶ ኣቲን ታኒ ኢንቴስ፣ ሃይታ ሃ ኣሳታስ ባቦፍቴኔ ዳጋሞፍቴ።

30 ኢንቴፌ ሲንፋራ ቢዛ ጎዳ ኢንቴ ጸሳይ ካሴ ኢንቴ ኣይፊን ቤኢሺን ጊብጾታ ቦላ ኦሶይሳ ማላ ሃኢካ ኢዚ ኢንቴ ጊሻስ ኦሌታና።

31 ኣዋይ ባ ና ኣልኢሲዛ ማላ ኢንቴ ቢዛ ባዞ ቢታ ኡባን ኢዚ ኢንቴና ካሌሊሼ ኢንቴና ሳሮን ሃይሳ ዎስቲ ጋሊዳኮ ኢንቴ ቤዩዴታ።

32-33 ሃ ኡባ ታ ዮቲንካ ኢንቴ ዱንካናና ሶሆዛ ቤሳናሲኔ ኢንቴ ባና ኦጌ ቤሳናስ ኦማርስ ቱሳ ታማን፣ ጋላስ ቱሳ ማላ ሻራን ኢንቴና ካሌሊዳ ኢንቴ ጎዳን ኣማኔቲቤኬታ።

ጸሳይ ኢስራኤሌ ኣሳስ ኢሚዳ ቂጻቴ
(ታይ 14:20-45)

34 «ኢንቴ ዙዙሚዳ ዙዙንሳ ጸሲ ሲዩዲ ሃንቄቲዴስ፤

35 ሄሳ ጊሻስ፣ ታኒ ካሴ ኢንቴ ኣዋታስ ኢማና ጋዳ ጫቂዳ ሄ ሎኦ ቢታዮ ሃ ኢታ ዬሌታፔ ኢሶይካ ጌሊና።

36 ዮፌኔ ና ካሌቤይ ጸላ ሄ ቢታዮ ጌላና፤ ኢዚካ ኩሜላ ዋዚናፔ ኣማኔቲ ቤቲዳ ጊሻሰ ሄ ኢዚ ቤኢዳ ቢታዮ ኢዛሲኔ ኢዛ ዜሬላታሰ ታ ኢማና፤ ጊ ጫቂዴሰ።

37 «ኢንቲ ጋሶን ጎዳይ ታና ሃንቄቲዲ፥ ሙሴ ኔኒካ ሄ ዴሬዮ ጌላካ።

38 ጊዶ ኣቲን ኔና ማዲዛ ናዌ ና ኢያሶይ ሄ ቢታዮ ጌላና፤ ሄ ቢታዮካ ላታና ማላ ኢሰራኤል ናይታ ካሌላናይ ኢዛ ጊዲዳ ጊሻሰ ኔ ኢዛ ሚንፊላ» ጊዴሰ።

39 «ቃሴካ ጎዳይ ኢንቲሰ፥ «ኢንቲ ኑ ናይቲ ዲኤታና» ጊዳ ኢታኔ ኪያ ሻኪ ኤርንታ ቂ ናይቲ ጸላ ሄ ቢታዮ ጌላና፤ ታኒ ሄ ቢታዮ ኢሰታሰ ኢማና፤ ኢሰቲካ ሄ ቢታዮ ላታና።

40 ኢንቲ ጊዲኮ ሲሚዲ ዙኦ ኣባኮ ኤፊዛ ኦጌዛራ ዲጌ ባዞ ቢቲ» ጊዴሰ።

41 «ኢንቲካ፥ ሙሴ! ኑኒ ኑ ጎዳ ቆሂዶሰ፤ ሃኢ ጎዳይ ኑ ጸላይ ኑና ኣዛዚዳ ማላ ኑ ኦሌታና» ጊዴታ፤ ሄ ሻራ ሜንሶ ዴሬዮ ዋራጃይ ካዉሻ ሚሽ ሚሳቲ ቤቲን ኢሶይ ኢሶይ ኦላሰ ጊኔቲዴታ» ጊዴሰ።

42 ጎዳይ ጊዲኮ፥ «ታ ኢንቲናራ ኬኦንታ ጊሻሰ ኦላሰ ኬዞፒቲ፤ ኢንቲ ኢጲሰ ጊ ኬዚኮ ኢንቲ ሞርኬቲ ኢንቲና ጸናና» ጊዲ ታሰ ዮቲዴሰ።

43 ታኒካ ጎዳይ ታሰ ዮቶይሳ ኢንቲሰ ዮታዲሰ ሺን ኢንቲ ኢጲዴታ። ኢዛ ቦላካ ማካሊዴታ፤ ኦቶሮ ዳሮፔ ዴንዲዳይሳን ኢንቲ ሄ ሻራ ሜንሶ ቢታዮ ኦላናሰ ቢዴታ።

44 ሄ ዙሞቡላታ ቦላ ዲዛ ኣሞሬ ዴሬ ኣሳቲ ኢንቲናራ ኦላ ኦይኬቲዳ፤ ኢሰታ ኦላንቻቲ ማላ ማላ ኢንቲ ቦላ ዪዲ ሆርማ ጋካናሰ ኢንቲና ዬዴሊዳ፤ ዙሞቡላቲ ዳሪ ኡቲዳ ኤዶሜ ዴሬን ኢንቲና ጸኒዳ።

45 ሄሳ ጊሻሰ ኢንቲ ሲሚ ዪዲ ጎዳ ሲንላን ዬኪዴታ፤ ጊዶ ኣቲን ኢዚ ኢንቲ ዬሆዛኔ ዋሶዛ ሲዪዲ ኢንቲና ማዳናሰ ኮዪቤና።

46 ሂሰቲን ኢንቲ ቃዴሴን ዳሮ ዋዴ ጋሞኢዴታ።

2

ኢሰራኤል ናይቲ ባዞ ቢታን ቶይላቲዳ ዋዴታ

1 ሄሳፌ ጉዬ ጸሲ ኣዛዚዳ ማላ ጌዴ ዙኦ ኣባኮ ኤፊዛ ኦጌዛራ ጉዬ ሲሚ ዲጌ ባዞ ቢታ ቢዶሰ፤ ኑኒ ሄን ቶይላቲሺ ሻራ ሜንሶ ኤዶሜ ዴሬን ዳሮ ዋዴ ጋሞኢዴሰ።

2 ሄሳፌ ጉዬ ጎዳይ ታሰ ሂዘጊ ዮቲዳስ።

3 «ኢንቲ ሃ ሻራ ሜንሉ ዳሬታን ዳሮ ዋዴ ቶይላቲዳታ፤ ሃኢ ፑዳሃ ባጋ ሲሚ ቢቲ።

4 ዳራ፡ ሳኢንቲ ዳቦ ኤሳዌ ዜሬላቲ ዲዛ ኤዶሜ ዳሬራ እጁ ባና፤ ኢስቲ ኢንቲስ ያያና፤ ጊዲኮካ ኢንቲ ኬሂ ናጌቲቲ።

5 ሻራ ሜንሉን ዲዛ ኤዶሜ ቢታ ታ ኤሳዌስ ጸንጾ ሂስታ ኢሚዳ ጊሻስ ኢስታ ቢታፌ ቶሆይ ዩጲዛሶካ ታ ኢንቲስ ኢሚዳ ኢስታ ቦላ ኦላ ዳንሉፍቲ።

6 ኢንቲስ ኮሺዛ ካል ጊዲን ሃል ሚሻን ሻሚ ኤኪቲ፡ ጋ ኣዛዛ» ጊዳስ።

7 ጎዳ ኢንቲ ጸሳይ ኢንቲ ኦሊዳ ኡባ ኢንቲስ ኬሂ ኣንጂዳስ፤ ኢንቲ ሃይሳ ዋልቃማ ባዞዛራ ካንሊ ቢዛ ዋዴ ኢሻልሲ ኦይኪዳስ፤ ሃ ኦይዱ ታሙ ላይሉ ኩሜሳን ጎዳ ኢንቲ ጸሳይ ኢንቲናራ ዲዛ ጊሻስ ኣይኮይካ ኢንቲስ ፓጪቤና።

8 ሄሳ ጊሻስ ኦኒ ኦ ኢሻ ኤሳዌ ዜሬላቲ ዲዛ ኤዶሜ ቢታራ ካንሊ ቢዳስ፤ ቃሴ ኤላቲፔኔ ኤጲዮን-ጋቢራ ካታማፔ ዩዛ ኦጌዛራ ኣራቤ ኦጌዛራ ሞኣቤ ባዞ ሲሚ ቢዳስ።

9 ጸሳይካ ታስ፡ «ሎጼ ዜሬል ሞኣቤ ኣሳታ ዋዴሶፒቲ፤ ኢስታራ ኦሌታናስ ኢስታ ዳንሉፍቲ፤ ታኒ ኤሬ ካታማ ኢስታስ ዲሳሶ ሂስታ ኢሚዳ ጊሻስ ኢስታ ጸንጾ ኣይኮካ ኢንቲስ ኢሚኬ» ጊዳስ።

10 [ኢሚሜ ጌቲቲዛ ዋልቃማ ዳሮ ዳሬይ ኤሬን ዳስ፤ ሄይቲካ ኤናቄ ዜሬላ ማላ ጉባኒኔ ጌሳን ጌታታ።

11 ኢስቲ ኤናቄ ኣሳታ ማላ ኤራፋይሜታ ጌቲቲ ጳይጌቲቲስ፤ ሞኣቤ ኣሳይ ቃሴ ኢስታ ኢሚሜታ ጊ ጳይጌስ፤ ሃንኮ ሞኣቤ ኣሳይ ቃሴ ኢስቲ ኢማሜታ ጊ ጳይጌቲስ።

12 ሆሪ ኣሳይ ካሴ ኤዶሜ ቢታን ዳስ፤ ጊዶ ኣቲን ኢሰራኤሌ ኣሳይ ላታና ማላ ጎዳይ ኢስታስ ኢሚዳ ቢታን ኢስቲ ኦላይሳላ ኤሳዌ ዜሬላቲ ኡሬ ኣሳ ጎዲ ጳይሲዲ ኢስታ ቢታን ኬጺ ኡቲዳ።]

13 ሄሳፌ ጉዬ ጎዳይ ኦስ ዮቲዳ ማላ ዛራዴ ጌቲቲዛ ሻፋ ፒኒዳስ።

14 ኦኒ ቃዴሴ ባሪኔፔ ቢዲ ዛራዴ ሻፋ ፒናናስ ሄሹ ታማኔ ኦስፑን ላይሊ ኣጲዳስ፤ ሄ ዋዴ ጎዳይ ኢስታ ጊሻስ ካሴ ጫቂዳ ማላ ሄ ዩሌታፔ ኦላስ ጋኪዳ ኣቲማ ኣሳይ ኡባይ ወሪዳስ።

15 ኢስቲ ኡባይ ወራና ጋካናስ ጎዳ ኩሼይ ኢስታ ቦላ ዳጺዳስ።

16 ኦላስ ጋኪዳ አቱማ አሳይ ኡባይ ወሪዳፔ ጉዬ፤

17 ጎዳይ ሂዝጊደስ፤

18 «ሞክሮ ዳሬስ ቲጸ ቦላ ዲዛ ኤሬ ቢታራ ኢንቴ ሃች ካንሊ ባናስ ቤሴስ።

19 ሄሳፌ ካሊዲ ሎጼ ዜሬላ ጊዲዳ አሞኔ አሳታ ዋዴሶፒቴ፤ ኢስታራ ኦሌታናስ ኢስታ ዴንፎሶፍቴ፤ ታኒ አሞኔ ቢታ ኢስታስ ዲሳሶ ሂስታ ኢሚዳ ጊሻስ ኢስታ ጸንጾሬ አይኮካ ኢንቴስ ኢሚኬ።»

20 [ሄ ቢታይ ካሴ ሄን ዲዛ አሳይ ጸይጊዛ ሱንፋን ኤራፋይሜታ ቢታ ጌቴቲዲ ጸይጌቴስ፤ ቃሴ አሞኔ አሳይ ዛሚዙሚታ ጊ ጸይጌስ።

21 ኢስቲካ ኤናቄ ዜሬላ ማላ ጉባኒኔ ጌሳን ጊታታ፤ ዋልቃማኔ ዳሮ ዳሬ፤ ጊዶ አቲን ጎዳይ ኢስታ ጳይሲን አሞኔቲ ኢስታ ቢታ ላቲዲ ሄን ኬጺ ኡቲዳ።

22 ጎዳይ ኤደሜን ዴኢዛ ኤሳዌ ዜሬላታስ ኦሊዳ ማላ ኢስታስካ ኦሊዳስ፤ ሄሲካ ኢዚ ሄ ቢታን ዴኢዛ ሆሬታ ጳይሲን ኤሳዌ ዜሬላቲ ኢስታ ቢታ ላቲዲ ሃች ጋካናስ ሄን ኬጺ ኡቲዳ።

23 ጋዛ ጋካናስ ዴኢዛ ሄራታን ዲዛ አዌ ዳሬ አሳታ ካፍቶሬ ጌቴቲዛ ቢታሬ ዩዳ ካፍቶሬ አሳቲ ኢስታ ጳይሲዲ ኢስታ ቢታን ኬጺ ኡቲዳ።]

24 ኑኒ ሞክሮ አቻራ አጲዳፔ ጉዬ ጸሲ ኑስ፤ «ሃኢ ዴንዲዲ አርናኔ ሻፋ ፒኒቴ፤ ሃሴቦኔን ኡቲዲ ሃሪዛ አሞሬታ ካዎ ሲሆኔኔ ኢዛ ዳራካ ታኒ ኢንቴስ አላ ኢማዲስ፤ ኢንቴ ኢዛ ኦሊዲ ኢዛ ቢታ ላቲቴ።

25 ሃቻሬ ጉዬ አዋንካ ዲዛ ዳሬ አሳይ ኢንቴስ ባባና ማላ ታ ኦፋና፤ ኦኒካ ኢንቴ ጊሻስ ሲዩዲ ወሪካ ሂርጋን ኮኮራና» ጊደስ።

ካዎ ሴዎኔ ጸኔቱል

(ታይ 21:21-30)

26 ሄሳፌ ጉዬ ሳርካ ኪታ አሳ ቦላ ቂዲሞቴ ባዘሬ ጌዴ ሃሴቦኔ ካዎ ሲሆኔኮ ኪታዲስ።

27 «ኑ ኢንቴ ዳሬራ አጲ ባና ማላ ኑና ዲጎፋ፤ ኑ ኦጌፔ ካሬ ኬዞንታ ሲቲ ጊ ባና።

28 ኑኒ ማና ካሊኔ ሃላ ኑ ሚሻን ሻሚ ኤካና፤ ኑኒ ኔ ቢታራ ካንሊ ቢሺን ኔ ኑና ዲጎንታ ማላ ጸላ ኮዮስ።

29 ኤደሜን ዲዛ ኤሳዌ ዜሬላቲኔ ኤሬን ዲዛ ሞክሮ ዜሬላቲ ኑ ኢስታ ዳሬራ አጳና ማላ ኑስ ኤሮ ጊዳ ማላካ ዮርዳናሴ ሻፋ

ጥረዱ ጸሳይ ኑና ላቲሳና ቢታዮ ኑኒ ጋካናሹ ጋካናሰ ኑኒ ኦጌራ ጸላ አጂ ባና ማላ ኑሰ ኤሮ ጋርኪ!»

30 ካዎ ሲሆኔይ ቃሴ ኑኒ ኢዛ ዴሬራ አጂ ባና ማላ ኮዬቤና፤ ጋሶይካ ጎዳ ኢንቴ ጸሳይ ሃቕ ኢንቴ ቤኢዛይሳ ማላ ኢዛ ኢንቴ ኩሼን አሉ ኢማናሰ ኢዛ ዎዚና ሙሚሲዲ ኦቶራንቻ ኬሲዴሰ።

31 ሄሳፌ ጉዬ ጎዳይ ታሰ፥ «አኔ ጾላ፥ ታኒ ካዎ ሲሆኔኔ ኢዛ ቢታ ኔ ኩሼን አላ ኢማዲሰ፤ ኢንቴ ኢዛ ቢታ ላቲዲ ሄን ዴኢቱ» ጊዴሰ።

32 ካዎ ሲሆኔይ ባሰ ዲዛ ኦላንቻታ ኡባ ኤኪዲ ያሃጼ ካታማ አቻን ኑናራ ኦሌታናሰ ዪዴሰ።

33 ጊዶ አቲን ጎዳ ኑ ጸሳይ ኢዛ ኑ ኩሼን አሉ ኢሚዳ ጊሻሰ ኢዛ፥ ኢዛ ናይታኔ ኢዛሰ ዲዛ ኦላንቻታ ኡባ ኑ ዲፒ ሂሰቲዶሰ።

34 ሄ ዎዴ ኑኒ ኢዛ ካታማታ ኡባ ዎራጂ ኦይኪዲ ካታማታ ኡባ፥ ኢሰታን ዲዛ አቱማሳታራ፥ ማጫሳታራ ናይታራ ኢሲፌ ዳይሲዶሰ፤ አይኮካ አሾንታ ኡባ ዲፒ ሂሰቲዶሰ።

35 ኢሰታ ማሄታኔ ኑ ዎራጂዳ ካታማታፔ ዲኢዳ ሚሻታ ኑሰ ኤኪዶሰ።

36 ኑኒ አርኖኔ ሾባ ጋጸ ባጋራ ዲዛ አርኤሬ ካታማፔኔ ሄን ዙሌዛን ዲዛ ካታማፔ ዶሚ ቢዲ ጋላኦጸ ጋካናሰ ኑናራ ኤቁታና ዳንዳይዛ ኢሲ ካታማይካ ቤቲቤና። ጎዳ ኑ ጸሳይ ኡባ ኑሰ አሉ ኢሚዴሰ።

37 ጊዶ አቲን ኑኒ አሞኔ ዴሬ፥ ዎይኮ ያቦቄ ሻፋ ማታ፥ ሻራ ሜንሶ ቦላ ዲዛ ካታማታኮኔ ጎዳ ኑ ጸሳይ ኑኒ ባና ማላ አዛዘንታ ሲሆ ኡባኮ ሺቂቦኮ።

3

ባሳኔ ካዎ አጌ ጸኔቴላ

(ታይ 21:31-35)

1 ሄሳፌ ጉዬ ኑኒ ሲሚዲ ባሳኔ ኤፊዛ ኦጌዛራ ኬዚዶሰ፤ ካዎ አጌይ ባ ኦላንቻታ ኡባ ኤኪዲ ኑናራ ኦሌታናሰ ኤዲራኤ ካታማ ኬዚዴሰ።

2 ጊዶ አቲን ጎዳይ ታሰ፥ «ካዎ አጌሰ ባቦፋ! ታኒ ኢዛ፥ ኢዛ ዴራኔ ኢዛ ቢታ ኔ ኩሼን አላ ኢማዲሰ፤ ሃሴቦኔን ኡቲዲ ሃሪዛ አሞሪታ ካዎ ሲሆኔ ቦላ ኦላይሳ ማላ ኔኒ ኢዛ ቦላካ ኦላና» ጊዴሰ።

3 ሄሳ ገሻሰ ጎዳ ኑ ጸሳይ ካዎ አጌኔ ኢዛ ኦላንቻታ ኡባ ኑ ኩሼን አሊ አሚዳስ፤ ኑኒካ ኢሰታፌ ኢሲ አሲካ አሾንታ ኡባ ሳይሲዶስ።

4 ሄ ዎዴ ኢዛ ካታማታ ኡባ አይኪዶስ፤ ኑ አይኮንታ አቲዳ ኢሲ ካታማይካ ዳና፤ ሄሳሉካ ባሳኔ ካዎ አጌይ አርጎባ ዳሬን አይሲዛ ኡሱቸን ታሙ ካታማታካ አይኪዶስ።

5 ሄ ካታማቲ ወሪ ገምቤን ገምቤቲዳ፤ ፔንጌቲካ ኮላታታን ጎርዳቲቲስ፤ ኢሰታ ዩሾን ዲርሳይ ባይንዳ ጮራ ማንዳራቲ ዳቲስ።

6 ሃሴቦኔ ካዎ ሲሆኔ፤ ኑ ኤኪዳ ካታማታ ቦላ ኑ ኦሊዳይሳላ ሃ ካታማታካ ኡባ ሳይሲዶስ፤ አቱማ አሳ፤ ማጫሳኔ ናይታካ አሾንታ ኡባ ሳይሲዶስ።

7 ማሄታ ኡባ ዲኢዶስ፤ ካታማታን ዲዛ ሚሽ ኡባ ለምኢ ሂሰቲዶስ።

8 ሄ ዎዴ ኑኒ ዮርዳኖሴ ሻፋፔ ቢዲ አርሼይ ሞኪዛ ባጋራ፤ አርኖኔ ዙሌፌ ቢዲ ሄርሞኔ ዙማ ጋካናሰ ዲዛይሳ አይኪዶስ፤ ሃይታ አሞሬ ዳሬ ካዎታፔ ዎሊ ኤኪዶስ።

9 [ሄርሞኔ ዙማዛ ሲዶና አሳይ፤ «ሲሪዮኔ» ጊዛይሳ አሞሬ አሳይ፤ «ሳኒሬ» ጊ ሱንሊዶስ።]

10 ኑኒ ጌዜ ቢታን ዲዛ ካታማታ ኡባ፤ ጋላኣዴ ቢታ ኡባ፤ ባሳኔ ቢታ ኡባኔ ባሳኔ ቢታን አጌይ ሃሪዛ ሳላካኔ ኤዲራኤ ካታማታ ጋካናሰ ዲዛሶሆታ አይኪዶስ።

11 [ኤራፋይሜታ ባጋፌ ካዎ አጌይ ወርሴላ ካዎ፤ ኢዚ ኢቺዛ አልጋይ ሚኖ ቢራታፔ ኦሴቲዳስ፤ አልጋሰ አዲሳቲላይ ኦሰቸን ዋቆ ጊዲሺን ጎሞጋይ አይዱ ዋቆ፤ ሄ አልጋዚ ኤራባ ጌቲቲዛ አሞኔታ ካታማን ሃኢ ጋካናሰ ቤቲስ።]

ዮርዳኖሴ፤ አርሼይ ሞኪዛ ባጋራ ዲዛ ቆሞታ (ታይ 32:1-42)

12 ሄ ቢታዮ ኑኒ ላቲዳፔ አርኖኔ ሻፋ አቻን ዲዛ አርኤሬ ካታማፔ ዶሚዲ ፑዴሃ ባጋን ዲዛ ዳሬዛኔ ጌዜ ቢታን ዲዛ ጋላኣዴ ዳራፔ ባጋ ሄን ዲዛ ካታማታራ ኦርቤሌ ዜሬላታሲኔ ጋዴ ዜሬላታሰ አማዲስ።

13 ጋላኣዴ ዳሬፔ አቲዳ ቢታኔ አጌይ ሃሪዛ ባሳኔ ቢታ ኡባ፤ ሄሲካ አርጎባ ካዎቲላ ሚናሴ ዜሬላታፔ ባጋይታሰ አማዲስ። (ሄ ባሳኔ ቢታ ኡባይ ኤራፋይሜታ ቢታ ጌቲቲ ጸይጌቲስ።)

14 ሚናሴ ቆሞ ጊዲዳ ያኢሬይ አርጎባ ዳሬ ኩሜላ ላቲዳስ፤ ሄሲካ ጌሹሬታኔ ማኢካቲ ዛዋ ጋካናሰ ዲዛ ባሳኔ፤ ሄ ቢታያካ

ኢዛ ሱንላን ደይጌታዲሰ፤ ሄሳ ጋሶን ሃኢ ጋካናሰ ኢሰቲ ያኢሬ ካታማታ ጌቲቲቲሰ።)

15 ቃሴ ጋላኣዴ ቢታካ ሚናሴ ቆሞ ማኪሬ ዜሬላታሰ ኢማዲሰ።

16 ኦርቤሌ ቆሞታሲኔ ጋዴ ቆሞታሰ ጋላኣዴ፤ ቢዲ ኣርኖኔ ሻፋ ኣቲ ጋካናሰ ዲዛ ዴሬዛ ኢማዲሰ፤ ዲጌሃ ባጋራ ኢሰታ ዛዋይ ኣርኖኔ ሻፋ፤ ፑዴሃ ባጋ ዛዋይ ቃሴ ኣሞኔታ ዴሬን ዛዋ ቦላ ዲዛ ያቦቄ ሻፋዛ።

17 ኣርሼይ ዉሊዛ ባጋራ ኢሰታ ዛዋይ ኣራቤን ዴኢዛ ዮርዳኖሴ ሻፋ ጋኬሰ፤ ሄሲካ ኪኔሬቲ ኣባፌ ዶሚዲ ፒዝጋ ዙማ ጋርሳን ዲዛ ማጺኔ ኣባ ጋካናሰ።

18 ሄ ዎዴ ኢሰታ ካሌላና ማላ ሃይሳፌ ካሊዛ ዎጋታ ታ ኢንቲሰ ኢማዲሰ፤ ጎዳ ኑ ጸሳይ ዮርዳኖሴ፤ ኣርሼይ ሞኪዛ ባጋራ ዲዛ ቢታ ኢንቲ ላታና ማላ ኢንቲሰ ኢሚዴሰ፤ ሄሳ ጊሻሰ ኢንቲ ኢንቲ ኦላንታታ ጊጺሲዲ ሃንኮ ኢሰራኤሌ ኣሳይ ባንታ ጸንጾ ላታና ጋካናሰ ኢሰታፌ ሲንላቲ ኦሌታናሰ ኣፂቲ።

19 ኢንቲሰ ዳር ሜሄይ ዲዛይሳ ታ ኤራይሰ፤ ሄሳ ጊሻሰ ኢንቲ ማቹቲ፤ ናይቲኔ ሜሄቲ ጸላ ሃን ኣቲቶ፤ ኢሰቲ ታኒ ኢንቲሰ ኢሚዲ ካታማታን ዴቶ።

20 ኢንቲ ጎዳይ ሃይሳን ኢንቲና ሸምፒሶይሳላ ኢንቲ ኢሻንታካ ዮርዳኖሴ፤ ኣርሼይ ዉሊዛ ባጋራ ጎዳይ ኢሰታሰ ኢሚዛ ቢታዮ ጌሊዲ ሳርቲላን ሸምፓና ጋካናሰ ኢንቲ ኢሰታ ማዲቲ፤ ሄሳፌ ጉዬ ታኒ ኢንቲሰ ኢሚዳ ቢታዮ ሃ ሲማናሰ ዳንዳዬታ።

21 ሃይሳፌ ጉዬ ታኒ ኢያሶ፡ «ጎዳ ኢንቲ ጸሳይ ሴዎኔ ኣጌ ጌቲቲ ደይጌቲዛ ናምኡ ካዎታ ቦላ ኦሶይሳ ኢንቲ ኢንቲ ኣይፌራ ቤኢዴታ፤ ኢንቲ ኢሰታ ቢታ ላቲዛ ዴሬ ኡባ ቦላ ሃይሳ ማላ ኦሶ ዛሪ ኦላና።

22 ኢንቲሰ ኦሌታናይ ጎዳ ኢንቲ ጸሳ ጊዲዳ ጊሻሰ ኢንቲ ኢሰታሰ ባቦፍቲ» ጋ ዙራዲሰ።

ሙሴይ ካናኔ ጌሎንታ ማላ ዲጌቲሰ

23 ሄ ዎዴ ታኒ ኬሃ ዎሳሼ፡

24 «ኡባፌ ዶቃ ጎዳዉ! ኔ ጌታቲላኔ ኔ ሚኖ ቄሴዛ ታሰ ኔ ኣይሌዛሰ ቤሶ ዶማዳሳ፤ ኔኒ ኦሊዛ ጌታኔ ዎልቃማ ኦሶታ ኦሊዛ ሃራ ጎዳይ ሳሎንካ ሳኣንካ ዴና።

25 ጎደ! ታኒ ዮርዳኖሴ ሻፋ ፒናዳ ሄ ፒንፋን ዲዛ ሎኦኔ ሻራ ማንጾሶን ዲዛ ጨለላ ቢታዮኔ ሊባኖሴ ዙማ ታ ቤኣናይሳ ታና ዲጎፋርኪ!» ጋዴሰ።

26 ጊዶ ኣቲን ኢንቴ ጋሶን ጎዳይ ታ ቦላ ሃንቄቲዲ ታ ዎሳ ሲያናይሳ ኢጲዲ፡ «ሂኣ ኔሰ ጊዳና! ሃይሳ ናሞኣንፉ ዴንፉፋ!

27 ሄሳ ኣጋዳ ዴንዳዳ ፑዴ ፒዝጋ ዙማ ቦላ ኬዛ፤ ሂሰታዳ ኔ ኣይፌይ ዴማናሰ ዳንዳይዛ ኬና ዴሬይሲ ፑዴሃኔ ዲጌሃ ባጋ፡ ኣርሼ ሞኪዛ ባጋኔ ዉሊዛ ባጋ ዩሻ ጸላ፤ ጋሶይካ ኔኒ ዮርዳኖሴ ፒና ባና ማላ ኔሰ ፒቃዴይ ኢማቲቤና።

28 ጊዶ ኣቲን ኔኒ ኢያሶሰ ኣዛዙ ኢማ፤ ኢዛ ጸሊሳኔ ማንፉላ፤ ጋሶይካ ኢዚ ዴራ ካሌሊዲ ዮርዳኖሴ ሻፋ ፒንፋና፤ ሃኖ ኔ ቤኢዛ ቢታዮ ኢዚ ኢሰታ ላቲሳና» ጊዴሰ።

29 ሄሳ ጋሶን ቤቲ-ፔኦሬ ካታማፔ ሲንፋ ባጋራ ዲዛ ሾባን ጋምኢዶሰ።

4

ኢሰራኤሌ ኣሳይ ጸሳሰ ኣዛዜታና ማላ ሙሴይ ኢሚዳ ኣዛዛ

1 ሄሳፌ ጉዬ ሙሴይ ኣሳሰ፡ «ሃኢካ ኢሰራኤሌ ኣሳዉ! ኢንቴ ዴኣን ዳና ማላኔ ጎዳ ኢንቴ ኣዎታ ጸሳይ ኢንቴሰ ኢሚዛ ቢታ ኢንቴ ላታና ማላ ታኒ ኢንቴና ታማርሲዛ ዎጋኔ ማራ ሲዩቴ! ቃሴካ ናጊቴ።

2 ታ ኢንቴሰ ኢሚዛ ዎጋ ቦላ ኣይኮካ ጉጃፍቴ፤ ኣይኮካ ኢዛፔ ፓጪንቸፍቴ፤ ጎዳ ኢንቴ ጸሳይ ኢንቴሰ ታ ባጋራ ኢሚዳ ዎጋሰ ኣዛዜቲዛይታ ጊዲቴ።

3 ጎዳይ ባኣሊ-ፔኦሬ ዙማ ቦላ ኦሶይሳ ኡባካ ኢንቴ ኢንቴ ኣይፌራ ቤኢዴታ፤ ኢዚ ሄ ዙማ ቦላ ባኣሌ ጌቲቲዛ ኤቃ ጸሳሰ ጎይኒዛይታ ኡባ ኢንቴ ጊዶፌ ጳይሲዴሰ።

4 ኢንቴ ጊዲኮ ጎዳ ኢንቴ ጸሳሰ ኣማኔቲ ኤቁዳይታ ጊዲዳ ጊሻሰ ሃኙ ጋካናሰ ሽምፖራ ፓጸ ዴታ።

5 «ጎዳ ታ ጸሳይ ታ ኢንቴሰ ዮታና ማላ ታና ኣዛዚዳ ዎጋኔ ማራ ኡባ ኢንቴና ታማርሳዲሰ፤ ኢንቴ ጌሊዲ ላታና ቢታይን ሄ ኣዛዘታ ናጊቴ።

6 ኢንቴ ኢሰታ ናጊቴኔ ፖሊቴ፤ ኢንቴ ሄሳፉ ኦሊዛ ጊዲኮ ኢንቴ ኣይ ኬና ኣቶ ኤራንቻታኔ ኣኬኪዛይታ ሃራ ዴሬ ኣሳይ ኢንቴና ቤኣና፤ ኢሰቲ ሃ ኣዛዘታ ሲዩዛ ዎዴ፡ ጥቂሙካ ሃ ጊታ ካዎቴሳይ ኣቶ ኤራንቻኔ ኣኬካንቻ ዴሬ» ጋና።

7 ጎዳ ኑ ጸሳይ ኑ ዋሲሺን ማታ ጊዲዳ ማላ ኢዛ ጎዳይ ኢዛሰ ማታ ጊዲዳ ሃራ ጌታ ካዋቱል ኦኔ?

8 ታኒ ሃቕ ኢንቴ ሲንላን ዋሊዛ ሃ ኣዛዞዛ ማላ ሱሬኔ ሊኬ ጊዲዳ ዋጋይኔ ማራይ ዲዛ ሃራ ኣይ ጌታ ካዋቱል ዲዜ?

9 «ሂሰቲኮ ኢንቴ ዲዛ ዋዴ ኡባን ሃይሳ ኢንቴ ኢንቴ ኣይፌራ ቤኢዳይሳ ኡባ ባሎንታ ማላኔ ኢንቴ ዋዚናፔ ቆዮንታ ማላ ናጌቲቲ፤ ኢንቴ ናይታኔ ኢንቴ ናይታ ናይታካ ታማርሲቲ።

10 ሲና ዙማ ቦላ ጎዳ ኢንቴ ጸሳ ሲንላን ኢንቴ ኤቁዳ ዋዴ ኢዚ ታና፡ ሂንቴ ዴኢዛ ዋዴ ኡባን ኢሰቲ ታሰ ያሻቱል ታማራና ማላ፡ ባንታ ናይታካ ታማርሳና ማላኔ ታ ቃላ ሲያና ማላ ዴራ ታኮ ሺሻ ጊዳይሳ ኣኬኪቲ።

11 «ሳሎ ጋኪዛ ታማ ላጮይኔ ጳፒ ጊዳ ጩዋይኔ ሻራይ ኢዛ ጎዚ ኦይኪዳ ዙማ ጋርሳን ሸቂ ኤቁዴታ።

12 ሂሳሶካ ጎዳይ ታማ ላጮ ጊዳን ዲሼ ኢንቴሰ ሃሳይዴሰ፤ ሂሰቲን ኢዚ ሃሳይዛ ቃላ ሲዩዴታ ኣቲን ኢዛ ሜቆ ሙሌካ ቤኢቤኬታ።

13 ኢንቴ ኦላናሰ ቤሲዛ ባ ጫቆ ቃላ ኢንቴሰ ቆንጨሲዴሰ፤ ሂሰካ ማሰቲዳ ናሞኡ ሹቻታ ቦላ ጸፊቲዳ ታሙ ኣዛዞታ።

14 ኢንቴ ጌሊ ላታና ቢታይን ዲሼ ኢንቴ ኦላናሰ ቤሲዛ ዋጋታኔ ማራታ ታ ኢንቴና ታማርሳና ማላ ጎዳይ ታና ኣዛዚዴሰ።

ኤቃ ጸሳታሰ ጎይኖፔ ሃካና ማላ ኢሜቲዳ ኣዛዞ

15 «ጎዳይ ሲና ዙማ ቦላን ታማ ላጮ ጊዳፌ ኢንቴሰ ሃሳይዛ ጋላሰ ኣይ ሜቆካ ቤኦንታ ጊሻሰ ኬሂፔ ናጌቲቲ።

16 ሂሰካ ኣዴ ዋይኮ ማጫ ሚሳቲሲ ኤቃ ሚሰሌ ሜቂዲ ኢዛን ኢንቴ ቱኖንታ ማላሳ።

17 ቢታ ቦላ ዴኢዛ ሜሄኔ ዶኣ ለሚሶ ዋይኮ ሳሎ ጉፋንሶን ፒራቂዛ ካፎ ጊዲን፤

18 ዋይኮ ቢታ ቦላራ ቲራን ጎሹቲዛ ሜቂቲላታኔ ሞሌ ሚሰሌታ ኢንቴሰ ኦሊዲ ጎይኖፔ።

19 ቃሴ ሳሎ ፑዴ ጴሊዲ ኢንቴ ጎዳይ ኣሳ ኡባሰ ኢሚዳ ኣርሼ፡ ኣጊና፡ ጸሊንቴኔ ሳሎ ሜቂታ ኡባ ቤኢዲ ኢንቴ ኢሰታሰ ጎይኒዲ ባሎንታ ማላ ናጌቲቲ።

20 አንቱ ጊዲኮ ታማይ አዛን ኤጲዛ ቢራታ ጮጮ መሳቲዛ ጊብጾፔ አንቱና ጎዳይ ሾዲ ኬሲዳይ አንቱ አዛሰ ዱማ ዳሬ ጊዳና ማላሳ።

21 «ጎዳይ ኔ ጋሶን ታ ቦላ ሃንቄቲዲ ዮርዳኖሴ ሻፋ ታ ፒና ቦንታ ማላኔ አዚ አንቱና ላቲሲዛ ሄ ጨለላ ቢታዮ ታ ቤኦንታ ማላ ታሰ ጫቂ ዮቲዳሰ።

22 ሄሳ ጊሻሰ ታኒ ዮርዳኖሴ ሻፋ ፒናንታ ሃኒን ሃይቃና ዳይሰ፤ አንቱ ጊዲኮ ፒኒዲ ሄ ቢታዮ ላታና።

23 ሄሳ ጊሻሰ ጸሳይ አንቱናራ ጌሊዳ ጫቆ ቃላ አንቱ ባሎንታ ማላ ሻኪ ኤሪቲ፤ ጎዳ አንቱ ጸሳይ አንቱና ኦሶፍቲ ጊዲ አዛዚዳ ኤቃ መሰሌታ አይ ሜቆንካ መሳቲሲ ኦሊ ኬሶፍቲ።

24 ጋሶይካ ጎዳ አንቱ ጸሳይ ጸጊዛ ታማኔ ቃናቲዛ ጸሳ።

25 «አንቱ ሄ ቢታይን ናይታኔ ናይታ ናይታ ዩሊዲ ኡፋይሳን ዴኢዛ ላይሰ ኡባን አንቱናቲሳ ቱኒሲዲ አይ ሜቆን ጊዲኮካ መሰሌ መሳቲሲ ሜቆዲ ጎዳ አንቱ ጸሳ ሲንላን ሄሳ ማላ አታ ኦሊዲ አዛ ሃንቄሶፍቲ።

26 አንቱ ሄሳ ኦሊኮ ዮርዳኖሴ ሻፋ ፒኒዲ ላታና ቢታይን ዳሮ ላይሰ ጋምኦንታይሳኔ አንቱ ሙሌራ ቆያናይሳ ታኒ ሃኝ አንቱ ቦላ ሳሎኔ ሳኦ ማርካ ዋላ ዮታይሰ።

27 ጎዳይ አንቱና ሃራ ካዎቲላታ ጊደን ላላና፤ አንቱ ቢ ላላቲዳሶን አንቱፌ አማርዳይቲ ጸላ አታና።

28 ሄን አንቱ መላፌኔ ሹቻፌ አሳ ኩሼን ኦሴቲዲ ጸሎንታ፥ ሲዮንታ፥ ሞንታኔ ሲንጎንታ ኤቃ ጸሳታሰ ጎይናና።

29 ጊደ አቲን አንቱ ሄን ዲሼ ጎዳ አንቱ ጸሳ ኩሜላ ዋዚናፔኔ ኩሜላ ሼምፖፌ ኮይኮ አንቱ አዛ ዳማና።

30 ሃ ኡባ ሜቶይ አንቱና ጋኪን አንቱ ሜቶቲሼ ወርሴላን ጎዳ አንቱ ጸሳኮ ሲሚዲ ቃሴካ አዛሰ አዛዜታና።

31 ጎዳ አንቱ ጸሳይ ማሪዛ ጸሳ ጊዲዳ ጊሻሰ አንቱና ሙሌራ ኣጌና፤ አንቱና ኡባካ ቆይሴና፤ ካሴ አንቱ አዋታራ ጌሊዳ ጫቆ ቃላ ሙሊካ ባሊና።

32 «ጸሳይ አሴ ቢታ ቦላ ሜቶሶፌ ዶሚዲ አንቱ ዩሌታናፔ ካሴ አቋዳ ዎዴታ ጸሞሲቲ፤ ቢታ ጋጾፔ ጋጾ ጋካናሰ ፒልጊ ጸሊቲ፤ ሃይሳፌ ካሴ ሃይሳ ማላ ጊታ መሺ ሙሊካ ሃኒ ኤሪዜ? ዎይኮ ሲዬቲ ኤሪዜ?

33 ታማ ላጮ ጊደራ ጸሳይ ሃሳዩን ሲዪዱ አንቲ ዳዮንታ ሼምፖራ ፓጻ ዴኑን ዲዛ ማላ ጸሳይ ሃሳዩን ሲዪዱ ሼምፖራ ፓጻ ዴኑን ዲዛ ሃራ ኣሲ ዲዜ?

34 ወይኮ ጎዳ አንቲ ጸሳይ አንቲ ጸሊሺን ጊብጾ ቢታን አንቲስ ኦሊዛይሳ ፓጮን፣ ማላታን፣ ማላሊሲዛ ሚሻን፣ ኦላን፣ ሚኖ ቄሴኒኔ ሚጮቲዳ ኩሼን፣ ቃሴ ያሺሲዛ ባ ዋልቃን ሃራ ካዋቲላታ ጊደ ጌሊዲ ኢሲ ካዋቲላ ባስ ኤካናስ ባጾቲዳ ሃራ ጸሲ ዲዜ?

35 ጎዳይ ኢዛ ጸላ ጊዲዳይሳ አንቲ ኤራና ማላ ሃይሳ ኢዚ አንቲና ቤሲዴስ፤ ኢዛፔ ኦቲን ሃራ ጸሲ ዴና።

36 ኢዚ አንቲና ታማርሳናስ ኮዪዳ ጊሻስ ባ ጮንጉርሳ ሳሎፔ ሲሲዴስ፤ ቃሴካ ሳኦ ቦላ ያሺዛ ጌታ ታማ አንቲና ቤሲዴስ፤ ሄ ታማዛ ጊደፌ ኢዛ ጮንጉርሳ ሲዪዴታ።

37 ኢዚ ሄሳሶ ኦሊዳይ አንቲ ኦዋታ ደሲዳ ጊሻሲኔ ኢስታ ዜሬላታ ዶሪዳ ጊሻስ ባ ጌታ ዋልቃን አንቲና ጊብጾፔ ኬሲዴስ።

38 ሃች አንቲ ቤኢዛ ማላ አንቲና ጌልላናሲኔ ኢስታ ቢታ ጸንጾ ኦሊ አንቲስ ኢማናስ አንቲፌ ዳሪዛይታኔ ዋልቃቲዛ ካዋቲላታ አንቲ ሲንሳፌ ጎዲ ኬሲዴስ።

39 «ሄሳ ጊሻስ ሳሎንካ ሳኦንካ ጎዳይ ኢዚ ጸላ ጸስ ጊዲዳይሳኔ ኢዛፔ ሃራ ጸሲ ባይንዳይሳ ኤሪቲ፤ አንቲ ዋዚናን ዋሊቲ።

40 አንቲሲኔ አንቲፌ ጉዬን ያና አንቲ ዜሬላስ ሎኦ ጊዳና ማላ ቃሴ ጎዳ አንቲ ጸሳይ ሚርናስ አንቲስ ኢሚዛ ጸንጾይን አንቲ ላይሊ ኦዲቃና ማላ ታኒ ሃች አንቲና ኦዛዚዛ ዋጋኔ ማራ ናጊቲ» ጊዴስ።

ሼምፖ ዋዲዳይቲ ባቃቲ ኣታናስ ኢሜቲዳ ካታማታ

41 ሄሳፌ ጉዬ ሙሴይ ዮርዳኖሴ ሻፋፔ ሄ ፒንላን ኦርሼይ ሞኪዛ ባጋራ ሄቩ ካታማታ ሻኪ ዋሊዴስ።

42 ኢዚ ሄሳሶ ኦሊዳይ ካሴ ሞርኬቲሊ ባይንዳ ኤርንታ ዲሼ ኣስ ዋዲዳ ኣይ ኣሲካ ሄ ካታማታፔ ኢሲኔይን ባቃቲ ቢዲ ባ ሼምፖ ኦሻና ማላሳ።

43 ሄሳ ጊሻስ ኦርቤሌ ቆሞታስ ዙምቡላቲ ኡቲዳ ባዘን ዲዛ ባጸራ፥ ጋዴ ቆሞታስ ጋላኦን ዲዛ ኤራሞቲኔ ሚናሴ ቆሞታስ ባሳኔን ዲዛ ጎላኔ ካታማታ ሻኪ ሻኪ ዋሊዴስ።

ጸሳ ዋጋ ጊሻስ ኢሜቲዳ ቲሚርቲ

44 ሙሴይ ኢሰራኤሌ ዴራስ ኢሚዳ ጎዳ ዋጋይ ሃይሳ።

45 ጊብጾፔ ከዚያ ዋዴ ሙሴይ ዴራሰ ዮቲዳ አዛዞይ፥
ዋጋይኔ ማሪይ ሃይሳ ቦላን ጸፊቲዳይሳ።

46 ሄይታንታ ኢዚ አዋጂዳይ ዮርዳኖሴ ሻፋፔ ኣርሼይ ሞኪዛ
ባጋራ ቤቲ-ፔኦሬ ዙሌሰ ሲንፋ ባጋራ ዲዛ አሞሬታ ካዎይ ዲዛ
ሃሴቦኔ ዴሬን፥ ሙሴይኔ ኢሰራኤሌቲ ጊብጾፔ ከኢ ኦሌቲዲ
ጸኒዳ ሲሆኔ ዴሬና።

47 ሄ ዋዴ ኢሰቲ ኢዛ ቢታኔ ሄሳፉካ ዮርዳኖሴፔ ኣርሼይ
ሞኪዛ ባጋራ ዲዛ ባሳኔ ዴሬ ሃሪዛ አሞሬ ካዎ ኣጌ ቢታ ላቲዳ።

48 ሄ ቢታይ ኣርኖኔ ሻፋ ዶናን ዲዛ ኣሮኤሬ ካታማፔ ቢዲ
ሲሪዮኔ ዙማ ጋኬሰ፤ ሲሪዮኔ ጌቲቲዛ ዙማዚ ሄርሞኔ ዙማ።

49 ሄ ቢታይካ ዮርዳኖሴ ሻፋፔ ኣርሼይ ሞኪዛ ባጋራ ዲዛ
ኣራቤ ዴሬ ኡባ ኤኪዲ ፒዝጋ ዙማ ጋርሳን ዲዛ ሃይቆ ኣባ
ጋኬሰ።

5

ታሙ አዛዞታ

(ኬሳ 20:1-17)

1 ሙሴይካ ኢሰራኤሌ ኣሳ ኡባ ኢሲ ቦላ ጸይጊዲ፥
«ኢሰራኤሌ ኣሳወ! ታኒ ሃኛ ኢንቴሰ ኢሚዛ ዋጋኔ ማራ ኣኔ
ዋዚናን ዋሒ ሲዪቴ፤ ኢሰታ ሎኤሒ ታማርቲኔ ሚንሒ ናጌቲ።

2 ጎዳ ኑ ጸሳይ ሲና ዙማ ቦላ ኑናራ ጫቆ ቃላ ጌሊዴሰ።

3 ኢዚ ኑ አዋታራ ጸላ ጊዶንታ ሃኢ ሼሞፖራ ፓጸ ዲዛ ኑናራካ
ጫቂቲዴሰ።

4 ሄን ሄ ዙማ ቦላ ኤዲዛ ታማ ጊዶን ዲሼ ጎዳይ ኢንቴና
ቆንጩራ ሃሳይሲዴሰ።

5 ኢንቴ ታማዛሰ ባቢዲ ፑዴ ዙማ ቦላ ኬዛናሰ ያዪዳ ጊሻሰ
ታኒካ ሄ ዋዴ ጎዳይ ጊዛይሳ ኡባ ኢንቴሰ ዮታናሰ ኢንቴሰኔ ጎዳሰ
ጊዶን ኤቃዲሰ።

«ኢዚካ ታሰ፥

6 ሳኒ ካሴ ኣይሌቲፋን ሃሬታ ዲዛ ጊብጾ ዴሬፔ ኔና ዋዛ
ኤኪዳይ ታና ጎዳ ኔ ጸሳ።

7 « ታፔ ኣቲን ሃራ ጸሲ ኔሰ ዶፖ።

8 « ሳሎን ጊዲን ሳኣን፥ ዋይኮ ቢታ ጋርሳን ዲዛ ሃላ ጊዶን
ዲዛይታፔ ኣዎይሳካ ኔሰ ሚሰሌ ሜቆዳ ጸሳ ማላ ጎይኖ።

9 ታኒ ጎዳ ኔ ጸሳይ ከሃ ቃናቲዛ ጸሳ፤ ሄሳ ጊሻሰ ማሴቲ
ኦሴቲዳ ኣይ ኤቃ ጸሳታሰካ ጎይኖፋኔ ዚንፋ፤ ታኒ ታና ኢዲዛይታ

ወርሳ ቃጸያይሰ፤ ኢስታ ዜሬላታካ ሄኻንሉኔ ኦይዳንሉ ዬሌታ ጋካናሰ ታኒ ቃጸያና።

10 ታና ደሲዛይታሲኔ ታ ኣዛዞታ ናጊዛይታሰ ጊዲኮ ሺ ዬሌታ ጋካናሰ ታ ኪያቴላኔ ታ ሲቆ ታ ኢስታ ቤሳና።

11 « ታና ኔ ጎዳ ሱንላ ሃዳን ጸይሳፓ፤ ታ ሱንላ ሃዳን ጸይጊዛይታ ታ ቃጸዮንታ ኣጊኬ።

12 « ታኒ ጎዳይ ኔ ጸሳይ ኔና ኣዛዚዳ ማላ ሳምባታ ጋላሳ ዱማሳዳ ቦንቻ።

13 ኔኒ ኦሊዛ ኦሶ ኡባ ኡሱቸን ጋላሳታን ኦላ።

14 ላቸንሉ ጋላሳይ ጊዲኮ ታሰ ኔ ጎዳሰ ዱማ ሸምፖ ጋላሳ፤ ሄ ጋላሰ ኣይ ኦሶካ ኦሶፋ፤ ኔና ጊዲን ዋይኮ ኔ ናይታ ጊዲን ኔሰ ኦሊዛይቲካ፤ ኔ ሜሄይካ፤ ኔ ዴሬን ቤቴ ኣሳታ ጊዲኮካ ሄ ጋላሰ ኣይኮካ ኦሶፍቴ፤ ኔ ሸምፒዛይሳላ ኢሰቲካ ሸምፔቶ።

15 ኔኒ ጊብጾ ቢታን ዴኢዛ ዋዴ ኣይሌ ጊዳዳ ዴኢዳይሳ ኣኬካ፤ ቃሴካ ጎዳ ኔ ጸሳይ ባ ሚኖ ቄሴኒኔ ባ ሚጩቲዳ ኩሼን ኔና ሄፔ ኬሲዳይሳ ዶሳፓ፤ ሳምባታ ጋላሳ ኔ ቦንቻና ማላ ጎዳ ኔ ጸሳይ ኣዛዚዳይ ሄሳሳ።

16 « ታኒ ጎዳ ኔ ጸሳይ ኔና ኣዛዚዳ ማላ ኔ ኣዋኔ ኔ ኦዮ ቦንቻ፤ ኔ ሄሳላ ኦሊኮ ጎዳ ኔ ጸሳይ ኔሰ ኢሚዛ ቢታይን ኔ ላይሊ ኣዱቃናኔ ኔሰ ኢንጃታና።

17 « ላስ ዋጵፓ፤

18 « ላይማቶፓ፤

19 « ላይሶቶፓ፤

20 « ላና ቦላካ ዋርዶ ማርካቶፋ፤

21 « ላሳ ማቾ፤ ኣሳ ኬሶ፤ ኣሳ ጸንጾ፤ ኣሳ ኦሳንቻታ፤ ኣሳ ሜሄ፤ ኣሳ ሃሬ ጊዲን ሃራ ኣይ ኣቆታካ ኡባ ኣሞቶፋ፤ ጊዴሰ።

22 «ኢንቴ ኢሲ ቦላ ሸቂዳሶን ጎዳይ ዙማ ቦላ ዲሼ ኢንቴሰ ኡባሰ ኢሚዳ ኣዛዞቲ ሃይታ፤ ታማን፤ ጊርዲ ጊዳ ቋማኒኔ ሻራ

5:9 ለዌ 26:1፤ ዛሬ 4:15-18፤ 27:15 5:10 ኬሳ 34:6-7፤ ታይ 14:18፤ ዛሬ 7:9-10 5:11 ለዌ 19:12 5:12 ኬሳ 16:23-30፤ 31:12-14 5:14

ኬሳ 23:12፤ 31:15፤ 34:21፤ 35:2፤ ለዌ 23:3 5:16 ዛሬ 27:16፤ ማቶ 15:4፤ 19:19፤ ማር 7:10፤ 10:19፤ ሉቃ 18:20፤ ኤፌ 6:2-3 5:17 ሜጴ 9:6፤ ለዌ

24:17፤ ማቶ 5:21፤ 19:18፤ ማር 10:19፤ ሉቃ 18:20፤ ኦር 13:9፤ ያቆ 2:11 5:18 ለዌ 20:10፤ ማቶ 5:27፤ 19:18፤ ማር 10:19፤ ሉቃ 18:20፤ ኦር 13:9፤

ያቆ 2:11 5:19 ለዌ 19:11፤ ማቶ 19:18፤ ማር 10:19፤ ሉቃ 18:20፤ ኦር 13:9 5:20 ኬሳ 23:1፤ ማቶ 19:18፤ ማር 10:19፤ ሉቃ 18:20 5:21 ኦር

7:7፤ 13:9

ጊደን ዲሼ ጊታ ጨንጉርሳን ኢዚ እንቴስ የቲዳ አዛዞቲ ሃይታ ጸላ፤ ኢዚ ሄይታካ ናሞኡ ሹቻታ ቦላ ዋጪ ጸፊዲ ታሰ ኢሚዴስ።

ዴሬዛ ያሽ

(ኬሳ 20:18-21)

23 «ዙማዚ ታማን ጸጌቲዛ ዋዴኔ ቋማ ጊደሬ ጨንጉርሳ እንቴ ሲዱዳ ዋዴ እንቴና ካሌሊዛይቲኔ እንቴ ኮሬፒኔቲ ታኮ ዪዲ፤

24 ሳዳ ኮኒ ጸሳ ጨንጉርሳ ታማ ጊደሬ ሲዱዳ ዋዴ ጎዳ ኑ ጸሳይ ባ ጊታቲሊኔ ባ ቦንቾ ኑና ቆንጨን ቤሲዴስ፤ ጸሲ አሳራ ሃሳይዳፒ ጉዬን አሲ ሃይቆንታ ሹምፖራ ፓጸ ዴኣና ዳንዳይዛይሳ ኑ ሃቾ ቤይዶስ።

25 ሃይሳፌ ጉዬ ጎዳ ኑ ጸሳ ጨንጉርሳ ኑ ሲዱዛ ጊዲኮ ኑ ሃይቃና፤ ሄ ዋልቃማ ታማይ ኑና ቋይሳና ዳንዳይስ፤ ሂስቲን ኮኒ አይስ ሃይቁዞኒ?

26 ዴኦ ጸሳይ ታማ ጊደን ዲሼ የቲን ኑ ሲዱዳ ማላ ኢዛ ጨንጉርሳ ሲዱዲ ሃይቆንታ ሹምፖራ ፓጸ አቲዳ አሲ ዳኔ?

27 ሄሳ ገሻስ ኔኒ ኢዛኮ ሽቃዳ ጎዳ ኑ ጸሳይ ገዛይሳ ኡባ ሲያ፤ ሄሳፌ ጉዬ ኔ ሲዱዳይሳ ኡባ ኑስ ያዳ የታ፤ ኑኒካ ኢዛ ሲዱዲ አዛዜታና፤ ጊዴታ።

28 «ጸሳይካ እንቴ ሄሳ ገሻን ሲዱዲ ታሰ፤ ሳሃ አሳቲ ኔስ የቲዳይሳ ኡባ ታኒ ሲያዲስ፤ ኢስቲ ገዳይሲ ኡባይ ሊኬ።

29 ኢስታሲኔ ኢስታ ዜሬላታስ ሜርናስ ኡባ ሚሺ ሎኦ ጊዳና ማላ ኢስቲ ታስ ያያናሲኔ ታ አዛዞታ ኡባ ዋዴ ናጋናስ ሃይሳ ማላ ዋዚናይ ዲዛኮ አይ ማላ ሎኦሻ!

30 ሃኢካ ኔኒ ሳዳ ኢስቲ ባ ዴንካኔን ዴንካኔን ሲማና ማላ ኢስታስ የታ።

31 ኔኒ ጊዲኮ ሃን ታ አቻን ኤቃ፤ ታኒ ታ ዋጋታ፤ አዛዞታኔ ማራታ ኡባ ኔስ ኢማና፤ ታኒ ኢስታስ ኢሚዛ ዴሬዪን ኢስቲ ሃ አዛዞታ፤ ዋጋታኔ ማራታ ናጋና ማላ ዴሬዛ ታማርሳን ጊዴስ።

32 «ኢስራኤል አሳዉ! ጎዳ እንቴ ጸሳይ እንቴና አዛዚዳይሳ ኡባ ፖላናስ ገጌቲቲ፤ ኢስታፌ ኢሲኖየካ ሜንሶፍቲ።

33 ኡባ ሚሺ እንቴስ ሎኦ ጊዳና ማላኔ እንቴ ላታና ቢታይን እንቴስ ላይሳይ አዱቃና ማላ ጸሲ እንቴና አዛዚዳይሳ ኡባ ፖሊቲ» ጊዴስ።

6

ጌታ አዛዞ

¹ እንቴ ፒኒ ቢዲ ላታናሰ ቢዛ ቢታን እንቴ ኦላና ማላኔ ታኒ እንቴና ታማርሳና ማላ ጎዳ እንቴ ጸሳይ ታና አዛዚዳ አዛዞቲ፥ ዋጋቲኔ ማራቲ ሃይታ።

² እንቴ ሄ ቢታይን አዲሳ ላይሰ ዳና ማላ እንቴ፥ እንቴ ናይቲኔ እንቴ ናይታ ናይቲ ባንቲ ዲዛ ዋዴ ኡባን ጸሳሰ ያያናሲኔ ታ ኢሚዳ አዛዞታ፥ ማራታኔ ዋጋታ ኡባ ናጋናሰ ቤሴሰ።

³ እንቴኖ ኢሰራኤል አሳዉ! ኡባ ሚሺ እንቴሰ ሎኦ ጊዳና ማላ፥ ጎዳ እንቴ አዋታ ጸሳይ እንቴሰ ጊዳይሳላ ማላኔ ኤሲ ጎጊዛ ቢታን እንቴ ኬሂ ጮራታና ማላ ሃ አዛዞታ ሲዩቲኔ ሚኒ ኦሊቲ።

⁴ ኢሰራኤል አሳቶ! እንቴ ሃይሳ አኬኪቲ! ጎዳ ኦ ጸሳይ ኢዚ ጸላ ጸሳ።

⁵ ጎዳ ኔ ጸሳ ኔ ኩሜላ ዋዚናፔ፥ ኔ ኩሜላ ሽምፖፌኔ ኔ ኩሜላ ዋልቃሬ ሲቃ።

⁶ ሃኙ ታ ኔና አዛዚዳ አዛዞታ ዋዚናን ዋላ።

⁷ ሃይታ አዛዞታ ኔ ናይታ ታማርሳ፤ ኔኒ ኔሶን ኡቲዛ ዋዴ ጊዲን ኦጌ ባሽካ፥ ኢቺዛ ዋዴ ጊዲን ቤጊዛ ዋዴ ኡባን ሃይታንታ አኬካሽ ዩሻ ቆፓ።

⁸ ኔሰ ማላታ ጊዳና ማላ ኔ ኩሼ ቦላ ቃቻ ቃሴካ ኔ ፒጼ ቦላ ዋላ።

⁹ ኔ ኬላ ቆሲላላ ቦላኔ ጊቤ ፔንጌ ቦላ ጻፋ።

አዛዜታና ማላ ዋንዲ ዮቲዳ አዛዞ

¹⁰ ጎዳ እንቴ ጸሳይ ካሴ እንቴ አዋታሰ አብራሃሜሰ፥ ዩሳቃሲኔ ያቆቤሰካ ጮቂዳ ቃላ ማላ እንቴና ኢዚ ሄ ቢታዮ ጌልሊዛ ዋዴ ካሴ እንቴ ኬጸንታ ጌታኔ ሎኢዛ ካታማቲ ዲዛ ቢታዮ ላቲሳና።

¹¹ እንቴ ላታናይ እንቴ ኬጸንታ ሎኦ ሚሻን ኩሚዳ ኬላታ፥ እንቴ ቦኮንታ ሃላ ኦላታ፥ እንቴ ቶኮንታ ዋይኔ ሚላታኔ ዋጋራ ሚላታ፤ ሃይታንታ ኢዚ እንቴሰ ኢሚዛ ዋዴ፥

¹² ካሴ እንቴ አይሌቲላን ዳዩዳ ጊብጼ ዳሬፔ እንቴና ዋዚ ኬሲዳ ጎዳ እንቴ ባሎንታ ማላ ናጌቲቲ።

13 እንቴ ጎዳ ጸሳስ ያዩቴ፤ ኢዛስ ጸላ ጎይኒቴኔ ኢዛ ሱንፋን ጸላ ጫቂቴ።

14 እንቴ ዩሾን ዲዛ ሃራ ዴሬ ኣሳይ ጎይኒዛ ኤቃ ጸሳታስ ጎይኖፍቴ፤

15 ጋሶይካ እንቴ ጊዶን ዴኢዛ ጎዳ እንቴ ጸሳይ ቃናቲዛ ጸሳ፤ ሄሳ ጊሻስ ኢዛ ሃንቆይ እንቴ ቦላን ታማ ማላ ኤጺ ኬዛና፤ ኢዚካ እንቴና ቢታ ቦላፊካ ሙሌራ ዲፒ ሂስቲ ቆይሳና።

16 ካሴ እንቴ ማሳን ኦሊዳይሳሉ ጎዳ እንቴ ጸሳ ፓጮፍቴ።

17 ኢዚ እንቴና ኣዛዚዳ ኣዛዘታ፥ ዋጋታኔ ማራታ ኡባ ሎኤሊ ናጊቴ።

18 እንቴስ ኡባ ሚሺ ሎኦ ጊዳና ማላ ጎዳ ሲንፋን እንቴ ሱሬኔ ሎኦ ኦሊቴ፤ ሂስቲኮ እንቴስ ኢማናስ ጎዳይ እንቴ ኣዋታስ ቃላ ጌሊዳ ሄ ሎኦ ቢታኖ እንቴ ላታና።

19 ኢዚ እንቴስ ሂዶታ ቃላ ጌሊዳ ማላ እንቴ እንቴ ሞርኬታ ጎዳ ቆይሳና።

20 ጉዬፔ ያና ዋዴታን እንቴ ናይቲ፥ «ጎዳ ኑ ጸሳይ ሃይታ ኣዛዘታ፥ ዋጋታኔ ማራታ ቢርሼላይ ኣዜ?» ጊ ኦይቻና።

21 ሄ ዋዴ እንቴ ቃሴ ኢስታስ፥ «ካሴ ኑኒ ጊብጼ ካዋስ ኣይሌቲዶስ ሸን ጸሳይ ኑና ባ ጊታ ዋልቃን ዋዚ ኬሲዴስ።

22 ጊብጼ ኣሳ፥ ኢስታ ካዋዛኔ ኢስታ ሹሜታ ኬሂ ቆሂዛ ጊታ ማላታታ ኢዚ ኦሊዳይሳ ኑኒ ኑ ኣይፊራ ቤኢዶስ።

23 ካሴ ኑ ኣዋታ ላቲሳናስ ኢሚዳ ሂዶታ ቃላ ማላ ኑና ሃ ቢታኖ ላቲሳናስ ጊብጼፔ ዋዚ ኬሲዲ ሃ ኤሂዴስ።

24 ሄሳፊ ጉዬ ሃቕ ሃኒዳይሳሉ ኑስ ኡባ ዋዴካ ሎኦ ጊዳና ማላኔ ኑኒ ሼሞፖራ ፓጻ ዴኣና ማላ፥ ኑኒ ኣዛዘታ፥ ዋጋታኔ ማራታ ናጋና ማላኔ ጎዳ ኑ ጸሳስ ያያና ማላ ኣዛዚዴስ።

25 ጎዳ ኑ ጸሳይ ኑና ኣዛዚዳ ማላ ኢዛ ኣዛዘታ ኡባ ኑ ናጊኮ ሄሲ ኑስ ጲሎቴላ ጊዳና» ጊቴ።

7

ጸሳን ዶሬቲዳ ዴሬ
(ኬሳ 34:11-16)

1 ጎዳ እንቴ ጸሳይ እንቴ ላታናስ ቢዛ ቢታኖ እንቴና ጌልሊዛ ዋዴ ቃሴካ እንቴፊ ዋልቃሚዛኔ ሚኒዛ ላፑን ካዋቲላታ ሄይቲካ

ሂቲታ፡ ጌርጌሴታ፡ አሞሬታ፡ ካናኔታ፡ ፓርዜታ፡ ሂዌታኔ ያቡሴታ
አንቲ ሲንሳፌ ጾቃሊ ጳይሳና።

² ጎዳ አንቲ ጸሳይ ሄ ዳሬታ አንቲ ኩሼን አሊ አሚን አንቲ
ኢስታ ጸኒዛ ዋዴ ኢስታ ኩሜል ሱፑ ሂስቲ ጳይሴቲ ኣቲን ኢስታራ
ኣይ ቃላካ ጌሎፒቲኔ ኢስታስ ቃጴቶፍቲ።

³ ኢስታራ ኤኬቶፍቲኔ ጌሎቶፍቲ፤ አንቲ ማጫ ናይታ ኢስታ
ኣቲማ ናይታስ አሞፍቲ፤ ኢስታ ማጫ ናይታካ አንቲ ኣቲማ ናይታስ
ኤኮፍቲ።

⁴ ጋሶይካ አንቲ ሄሳሶ ኦሶንታ ኣጊኮ ኢስቲ አንቲ ናይታ ጎዳ
ካሊዛሶፒ ቤቲሲዲ ኤቃ ጸሳታ ካላና ማላ ኦላና፤ ሄ ዋዴ ጎዳ
ሃንቆይ ኤጺ ኬዛና ኢዚ አንቲና ሄራካ ኤሶን ጳይሳና።

⁵ ሄሳ ጊሻስ አንቲ ኢስቲ ያርሾ ያርሺዛሶዛ ላሊቲ፤ ኢስቲ
ጎይኒዛ ቱሳ ማላታ ሹቻታ ከንቹሬሊ ዩጊቲ፤ ኣሺሮ ጌቲቲዛ
ኤቃ ጸሳይ ሚሰሌዛ ቲንቹሬሊ ዩጊቲ፤ ማሴቲ ጊጊዳ ኤቃ ጸሳታ
ሚሰሌታካ ታማን ጸጊቲ።

⁶ ጋሶይካ ጎዳ አንቲ ጸሳይ አንቲና ባስ ጊዳና ማላ ዶሪዳ
ዲማ ዳሬ፤ ቢታ ቦላ ዲዛ ዳሬ ኡባፌ አንቲ ኢዛስ ዲማ ዳሬ
ጊዳና ማላ ዶሬቲዴታ።

⁷ ጎዳይ አንቲና ሰቂዳይኔ ዶሪዳይ አንቲ ሃራ ኣሳፔ ቆዳን
ዳሪዛ ጊሻስ ጊዳና፤ አንቲ ሃራ ዳራፔ ቆዳን ኬሂ ጉሳታ።

⁸ ጊዶ ኣቲን ጎዳይ አንቲና ሰቂዳ ጊሻሴኔ ካሴ አንቲ ኣዋታስ
ጌሊዳ ሂዶታ ቃላ ናጋናስ ኮዬዳ ጊሻስ ኢዚ አንቲና ጊብጼ
ካዋስ ኣይሌቲላን ዲዛ ጊብጼ ቢታፌ ባ ጊታ ዋልቃን ዋዚዲ
ኬሲዴስ።

⁹ ሄሳ ጊሻስ ጎዳ አንቲ ጸሳይ ሙሌራ ኣማኔቲዳ ጸሳ ጊዲዳይሳ
አንቲ ዩሺ ቆፒቲ፤ ኢዚ ባ ጫቂዳ ቃላ ናጌስ፤ ኢዛ ዶሲዛይታሴኔ
ኢዛ ኣዛዞ ፖሊዛይታስ ኡባስ ሺ ዩሌታ ጋካናስ ኢዚ ባ ሜርና
ሰቆ ቤሳና።

¹⁰ ጊዶ ኣቲን ባና ኢዲዛይታ ባ ሃሎ ኬሳና፤ ኢስታ ቦላ ባ
ሃሎ ኬሳናስ ጋምኤና።

¹¹ ሄሳ ጊሻስ ታ ሃቕ አንቲና ኣዛዚዛ ኣዛዞታ፡ ዋጋታኔ ማራታ
ሎኤሊ ናጊቲ።

ኣዛዜቲላን ቤቲዛ ኣንጆ
(ዛሬ 28:1-14)

12 እንቲ ሃ አዛዛታ፥ ዋጋታኔ ማራታ ሲደዲ ሎኤሊ ናጊኮ ጎዳ እንቲ ጸሳይ ካሴ እንቲ አዋታሰ ጌሊዳ ጫቆ ቃላኔ ባ ሜርና ሲቆ እንቲሰካ ሚንላና።

13 እዚ እንቲና ሲቃና፤ አንጃናኔ ቆዳን ዳርሳና፤ ቃሴካ እዚ እንቲ አዋታሰ ጫቂዳ ቢታይን እንቲ ዬሎታ፥ እንቲ ቢታይ አሚዛ አይፌታ፥ ካላ፥ ዋይኔኔ ዋጋራ ዛይቱ፥ እንቲ ሜሄታኔ ደርሳ ዉዴታ ኡባ ዳርሲዲ አንጃና።

14 እንቲ ማላ አንጃቲዳ ዴሬይ አላሜ ቦላ ሙሉካ ዴና፤ እንቲ ጊደፌ ማጫ ጊዲን ዋይኮ አቱማሰ ጊዲን ሄሳቶካ እንቲ ሜሄታ ጊደን ማይኔይ ቤቱና።

15 ጎዳይ ሃርጌ ኡባፌ እንቲና ናጋና፤ እንቲ ካሴ ጊብጾን ዲሼ ቤኢዳ ኢታ ሃርጌታ፤ አዋይሳካ እንቲ ቦላ ኤሄና፤ ጊደ አቲን እዚ ባና ኢጸዛይታ ቦላ ሄ ሃርጌታ ኤሃና።

16 ጎዳ እንቲ ጸሳይ እንቲ ኩሼን አሊ አሚዳ ዴሬታ ኡባሲካ ቃዴቶንታ ዳይሲቱ፤ እንቲሰ ዋጸማዴ ጊደንታ ማላ ኢሰታ ኤቃ ጸሳታሰ ጎይኖፍቱ።

17 እንቲ እንቲ ዋዚናን፥ «ሃ ካዋቱላቲ ኑፔ ሚኔቲሰ፤ ሂሰቲን ኑ ኢሰታ ዋሰቲ ዳይሳኔ?» ጊዲ ቆፖንታ አጌኬታ።

18 ጊደ አቲን እንቲ ኢሰታሰ ያኖፍቱ፤ ጎዳ እንቲ ጸሳይ ጊብጾ ካዋ ቦላኔ ሄ ዴሬ አሳ ኡባ ቦላ ኦሊዳይሳ ዩሺ ቆፒቱ።

19 ጎዳ እንቲ ጸሳይ እንቲና ጊብጾ፤ ኬሲዛ ዋዴ ኦሊዳ ጌታ ቦሻታ፥ ማላታታ፥ ማላሊሲዛ ሚሻታ፥ እዛ ሚኖ ቄሴታኔ ሚጨቲዳ ኩሼታ እንቲ እንቲ አይፌን ቤኢዴታ፤ ሃኢ እንቲ ያዪዛ አሳ ኡባ ቦላንካ ጎዳ እንቲ ጸሳይ ሄሳቶ ኦላና።

20 ጎዳ እንቲ ጸሳይ ኢሰታ ጊደን ሺር ዴንላና፤* እንቲፌ ባቃቲዲ ቆቴቲዳይቲካ ሄራ ዳያና።

21 ሄሳ ጊሻሰ ሄ ዴሬታሰ ባቦፍቱ፤ ጎዳ እንቲ ጸሳይ እንቲናራ ዴሰ፤ እዚ ጌታኔ ያሺሲዛ ጸሳ።

22 ጎዳ እንቲ ጸሳይ ሃይታ ካዋቱላታ ጉላራ ጉላራ ሾዲ ኬሳና፤ እንቲ ኢሰታ ኡባ ኢሲቶ ዳይሶፍቱ፤ እንቲ ኢሲቶ ዳይሲኮ ቢታ ቦላ ዶኣይ ዳራዲ እንቲና ዋዪሳና።

23 ጎዳ እንቲ ጸሳይ እንቲ ዋርኬታ እንቲ ኩሼን አሊ አማና፤ ኢሰቲ ኡባይ ዉራና ጋካናሰ እዚ ኢሰታ ጋርሳን ሺር ዴንላና።

24 ቃሴካ ኢሰታ ካዋታ እዚ እንቲ ኩሼን አሊ አማና፤ እንቲ ኢሰታ ሱንሳ ሙሉራ ቢታፌ ዳይሳና፤ እንቲ ኢሰታ ዳይሳና ጋካናሰ

7:16 ዛሬ 11:13-17 * 7:20 ሺር ዴንላና ጊዛይሳ ቦሻ ዬዳና ዋይኮ ሳጺዛ ኡዴንጼ ዬዳና ጋና ዳንዳዬቲሰ።

አንቲናራ ኤቄቲ ዳንዳያና ኣይ ኣሲካ ዳና።

²⁵ ኢስታ ኤቃ ጸሳታ ኡባ ታማን ጸጊቲ፤ ሄ ኤቃ ጸሳታ ቦላ ዲዛ ዋርቃኔ ቢራ ኣሞቲዲ አንቲሰ ኤኮፍቲ፤ ጎዳ አንቲ ጸሳይ ኤቃ ጸሳታሰ ጎይኖ ኢጲዛ ጊሻሰ አንቲ ኤኪኮ ኢዚ አንቲሰ ዋጺማይ ጊዳና።

²⁶ ሃ ቱኒዳ ኤቃ ጸሳታ አንቲሰ ጌልላፍቲ፤ አንቲ አንቲሰ ጌልላኮ ኢስቲ ጳይዛይሳላ አንቲካ ጳያና፤ ኢስቲ ጳያናሰ ቤሲዛ ጊሻሰ አንቲ ኢስታ ኢጲቱኔ ሃራሴቲቲ።

8

ኤፋይሳ ቢታዮ ዋስቲ ላታናኮ አሜቲዳ ዋጋ

¹ አንቲ ሼምፖራ ፓጻ ዳና ማላ፥ አንቲ ቆዳይ ዳራና ማላኔ ጎዳይ ካሴ አንቲ ኣዋታሰ አማናሰ ጫቂዳ ቢታዮ ላታናሰ አንቲ ዳንዳያና ማላ ሃቕ ታ አንቲሰ አሚዛ ኣዛዞዮ ኣማኔቲዲ ናጊቲ።

² ጎዳ አንቲ ጸሳይ አንቲሰ አሚዳ ኣዛዞታ አንቲ ናጊዛኮኔ ናጎንታኮ አንቲ ዋዚናን ዲዛ ቆፋ ኤራናሰ፥ አንቲና ፓጫናሲኔ አንቲና ኣሽኬሳናሰ ኦይዱ ታሙ ላይላ ኩማል ሜቶ ጊዶራ ኣሊዲ ኢዚ አንቲና ዋስቲ ዋስቲ ካሌሊዳኮ ኣኔ ዩሺ ቆጊቲ።

³ ኣሲ ጸሳ ዶናፕ ኬዚዛ ቃላን ኣቲን ካላን ጸላ ሼምፖራ ፓጻ ዳናሰ ዳንዳዮንታይሳ ታማርሳናሰ አንቲና ጋፊሲዴሰ፤ አንቲኒኔ አንቲ ኣዋቲ ኤሮንታ ማና ሚዚዴሰ።

⁴ ሄ ኦይዱ ታሙ ላይላታ ጋርሳን አንቲ ማይኢዳ ማይኦይ ወሪቤና፤ ሄማላ ዳሮን አንቲ ቶሆይ ኪጲቤና።

⁵ ኣዋይ ባ ና ሴሪዛይሳላ ጎዳ አንቲ ጸሳይ አንቲና ሴሪዛይሳ ዩሺ ቆጊቲ።

⁶ ኢዛ ካሊሼኔ ኢዛሰ ያዪሼ ጎዳ አንቲ ጸሳ ኣዛዞታ ናጊቲ።

⁷ ጋሶይካ ጎዳ አንቲ ጸሳይ አንቲና ሾባፌኔ ዙምቡላታፕ ፑልቲ ጎጊዛ ቄሪ ሻፋቲኔ ፑልቲዛ ፑልቶቲ ዲዛ ሎኦ ቢታ ጌልላናሰ ኤሂዴሰ።

⁸ ሄ ቢታያ ጊስቲይኔ ባንጋይ፥ ዋይኔይኔ ባላሴይ፥ ኦሮማኔይኔ ዋጋራ ኣይፌይ፥ ቃሴካ ኤሲ ኩሚዳ ቢታ።

⁹ ሄ ቢታያካ አንቲ ፓጮይ ባይንዳ ካል ሚዛ ቢታኔ አንቲሰ ኣይኮይካ ፓጮንታ ቢታ፤ ሄ ቢታይን ዲዛ ሹቻታፕ ቢራታይ፥ ዙምቡላፌ ጸርቂማላይ ቤቲሰ።

¹⁰ አንቲ ሚዲ ካላና፤ ሂስቲዲ ኢዚ አንቲሰ አሚዳ ሎኦ ቢታይ ጊሻሰ ጎዳ አንቲ ጸሳ አንቲ ጋላታና።

ጸሓፊ ደጊዛይታሰ አሜቲዳ ሴራ

11 አንቱ ጎዳ አንቱ ጸሓፊ ደጊዳ ታኒ ሃች አንቱሰ አሚዛ አዛዘታ፡ ዋጋታኑ ማራታ ሞሮንታ ማላ ናጌቲቲ።

12 አንቱ ሚዳ ካሊዛ ዋዴኔ ሎኦ ኬል ኬዲ ኡቲዛ ዋዴ፡

13 ሚዚኔ ዶርሳይ፡ ቢራይኔ ዋርቃይ ቃሴካ ሃራ አቆታቲ አንቱሰ ዳሪዛ ዋዴ፡

14 አንቱ ዋዚናይ ኦቶሬቶንታ ማላኔ አንቱ ጊብጾፔ አይሌቲፋ ቢታፌ አንቱና ዋዚ ኬሲዳ ጎዳ አንቱ ጸሓፊ ባሎንታ ማላ ናጌቲቲ።

15 ማርዜ ሾሻይኔ ማሲማሶይ ኩሚዳ ኬሂ ሂርጊሲዛ ባዞራ አንቱና ካሌሊዴሰ፤ ኢዚ አንቱሰ ሚላ ባዞን ሚኖ ዛላፌ ሃፍ ፑልቲሲዴሰ።

16 አንቱና አሽኬሳናሲኔ ፓጫናሰ ወርሴፋንካ ሎኦ ጊዳና ማላ ካሴ አንቱ አዋቲ ሚ ኤሮንታ ማና ባዞ ቢታን አንቱሰ አሚዴሰ።

17 ሄሳ ጊሻሰ፡ «ኑኒ ኑ ዋልቃኒኔ ኑ ሚኖቲፋን ዱሬቲዶሰ» ጊ ቆፖፍቲ።

18 አንቱ ዱሬታና ማላ አንቱሰ ዋልቃኔ ሚኖቲፋ አሚዳይ ጎዳ አንቱ ጸሓፊ ጊዳዳይሳ ዩሺ ቆፒቲ፤ ኢዚ ሄሳዎ ኦሊዳይ ካሴ አንቱ አዋታሰ ጌሊዳ ጫቆ ቃላ ሚንፋናሳ።

19 ጎዳ አንቱ ጸሓፊ አንቱ ደጊዳ ኤቃ ጸሓፊሰ ጎይኒኮ፡ ኢሰታሰ ሃጋዛናሰ አንቱ ሲንል አንቱ ኢሰታኮ ዛሪኮ፡ አዳካ አንቱ ጳያናይሳ ሃች ታ አንቱና ሃራ ኤሪሳይሰ።

20 ጎዳ አንቱ ጸሓፊ አንቱ አዛዜቶንታ ኢዲኮ አንቱ ጌዴ ሲንፍ ሲንፍ ቢሺን አንቱ ሲንፋን ዱዛ ካዋቲፋታ ጳይሲዛይሳ ማላ አንቱናካ ጶቃሊ ጳይሳና።

9

ማካላቲፋ ጋሶን ዪዛ ሜቶ

1 አንቱኖ ኢሰራኤሌ ዳሬ አሳዉ! ሲዩቲ፤ አንቱ አንቱፌ ጌታቲዛኔ ዋልቃሚዛ ካዋቲፋታ ቃሴ ኢሰታሰ ዱርሳ ጊሞቤይ ሳሎ ጋዜዳ ጌታ ካታማታካ ላታናሰ ሃች ዮርዳናሴ ፒኔታ።

2 ሄ ቢታን ዱዛ አሳይ ጌሳኔ ጉባ ጌታታኔ ኬሂ ሚኖታ፤ ኢሰታሰ፡ «ኦኒኔ ኤናቄ ዜሬፋታራ ኤቄታናሰ ዳንዳዬና» ጊሺን አንቱ ሲዪዴታ።

3 ጊዶ አቲን ታማ ማላ ጽጊዛ ጎዳ አንቱ ጸሓፊ ኢዚ አንቱፌ ሲንፋራ ቢሺን አንቱ ሃች ቤኣና፤ አንቱ ጌዴ ሲንፍ ሲንፍ ጉጂሺን

ኢዚ ኢስታ ጸኒ ጸኒ ባና፤ ሄሳ ገሻሰ ኢዚ ኢንቴስ ኢሚዳ ሂዶታ ቃላ ማላ ኢንቴ ኢስታ ጶቃሊዲ ኤሶን ጎዲ ጳይሳና።

4 ጎዲ ኢንቴ ጳሳይ ኢስታ ኢንቴ ሲንፋፌ ጎዲዳፔ ጉዬ ኢንቴ፡ «ጎዲይ ኑና ሃ ቢታ ኤሂዳይ ኑኒ ሎኦ ኦሶ ኦሊዳ ገሻሳ» ገዲ ቆፖፍቴ፤ ጎዲይ ኢስታ ኢንቴ ሲንፋፌ ጎዲ ኬሲዛይ ኢስታ ኢታቴላ ገሻሳ።

5 ኢንቴ ኢስታ ቢታ ላታና ማላ ጎዲ ኢንቴ ጳሳይ ኢስታስ ኦሊ ኢሚዛይ ኢንቴ ጸሎኔ ሱሬ ኦሊዳ ገሻሰ ገዴና፤ ኢስቲ ኢታታ ገዲዳ ገሻሲኔ ጳሳይ ካሴ ኢንቴ ኦዋታስ ኣብራሃሚስ፡ ዪሳቃሲኔ ያቆቤስ ኢሚዳ ሂዶታ ቃላ ናጋናስ ኮዪዳ ገሻሰ ኢስታ ሾዲ ጎዳና።

6 ጎዲ ኢንቴ ጳሳይ ሃ ሎኦ ቢታ ኢንቴና ላቲሲዛይ ኢንቴ ጸሎቴላ ገሻሰ ገዴና፤ ጋሶይካ ኢንቴ ዋዚናይ ሙሚ።

7 ጎዲ ኢንቴ ጳሳ ባዘን ኢንቴ ዋሰቲ ሃንቁሊዳኮ ባሎፒቴ፤ ኢንቴ ጊብጾፔ ኬዚዳ ጋላሳፌ ዶሚዲ ሃኖ ጋካናስ ኢንቴ ጎዲ ኢንቴ ጳሳ ቦላ ማካሊዳታ።

8 ሲና ባዘን ኢዚ ኢንቴና ጳይሳናስ ዴንዳና ጋካናስ ጎዲ ኬሂ ሃንቁሊዳታ።

9 ጎዲይ ኢንቴናራ ጫቂቲዳ ቃላይ ኢስታ ቦላ ጸፊቲዳ ሹቻታ ኤካናስ ታኒ ፑዴ ዙማ ቦላ ኬዛዳ ሄን ኣይኮካ ሞንታኔ ኡዮንታ ኦይዱ ታሙ ጋላሲኔ ኦይዱ ታሙ ቃማ ጋማኣዲስ።

10 ሄሳፌ ጉዬ ኢንቴ ሄ ዙማ ጋርሳን ሺቂን ጎዲይ ታማ ገደፌ ሃሳይሺን ኢንቴ ሲዪዳ ቃላ ኢዚ ባ ኩሼራ ኢስታ ቦላ ጸፊዳ ናሞኡ ሎቻ ሹቻታ ታስ ኢሚዴስ።

11 ኦይዱ ታሙ ጋላሳፊኔ ኦይዱ ታሙ ኦማርሳፌ ጉዬ ጎዲ ጫቆ ቃላይ ኢስታ ቦላ ጸፊቲዳ ናሞኡ ሎቻ ሹቻታ ታስ ኢሚዴስ።

12 ሄሳፌ ጉዬ ጎዲይ ታስ፡ «ኔ ኤሶን ዙማ ቦላፌ ዱጌ ዋቋ፤ ኔኒ ጊብጾፔ ካሊላ ኬሲዳ ኣሳይ ኢታ ሚሽ ኦሊዲ ቱኒዴስ፤ ታ ኢስታስ ኢሚዳ ኣዛዘታፔ ኤሶን ካሬ ኬዚዲ ባንታስ ጎይናናስ ኤቃ ጳሳታ ሜዲዳ» ገዴስ።

13 ቃሴካ ጎዲይ ታስ፡ «ሃይሲ ዴሬዚ ዋዚና ሙሚኔ ማካላ ገዲዳይሳ ታ ኤራይስ።

14 ታኒ ኢስታ ጳይሳናይሳኔ ኢስታ ሱንፋካ ቢታ ቦላፌ ቁጫ ጳይሳናይሳ ታና ዲጎፋ፤ ኔና ኢስታፌ ሚኒዛይሳኔ ጮራቲዛ ካዋቴላ ኬሳና» ገዴስ።

15 ሄሳ ገሻሰ ጫቆ ቃለዚ ጻፊቲዳ ናምኡ ሎቻ ሹቻታ ናምኡ ኩሼን ኦይኪዳ ማለ ዙማ ቦላፌ ሲማዳ ዱጌ ዋዳዲስ፤ ሄ ዋዴ ታማ ላጮይ ዙማ ቦላ ላጮስ።

16 አንቴካ ጎዳ አንቴ ጾሳይ አንቴስ አሚዳ አዛዙታ ሚንሊዲ ካሬ ኬዚዴታ፤ ዋርቃፌ ሰሪሲዲ ሜዲዳ ማራ ሚስሌዛ አንቴስ ኤቃ ጾስ ኦሊዴታ፤ ሄሳን አንቴ አንቴ ጎዳ ቦላ ማካሊዳይሳ ታ ቤአዲስ።

17 ሄሳ ጋሶን አዛዙቲ ኢስታ ቦላ ጻፊቲዳ ሎቻ ሹቻታ ታ አንቴ ሲንላን ቦላፌ ዬጋዳ ሚንሊፊዳዲስ።

18 ሄሳፌ ጉዬ አንቴ ኬሂ ኢታ ናጋራ ኦሊዲ ጎዳ ሃንቁሊዳ ጋሶን ታኒ ኦይዱ ታሙ ጋላሰኔ ኦይዱ ታሙ ቃማ ጋካናስ አይኮካ ሞንታኔ ኡዮንታ ጎዳ ሲንላን ጉፋናዳ ጋምአዲስ።

19 ኢዚ አንቴና ኬሂ ሃንቁቲዲ ዳይሳናስ ዴንዲዳ ገሻሰ ጎዳይ ሃንቁዛ ጌታ ሃንቆዚ ታና ባቢሲዴስ፤ ጌዲኮካ ጎዳይ ዛሪዲ ታ ዋሳ ሲዬዴስ።

20 ጎዳይ ኣሮኔካ ዳይሳናስ ኢዛ ቦላ ኬሂ ሃንቁቲዴስ፤ ሄሳ ገሻሰ ኢዛሰካ ዋሳዲስ።

21 ታኒ አንቴ ሜዲዳ ሄ ናጋራን ኩሚዳ ማራ ሚስሌዛ ኤካዳ ታማን ጸጋዲስ፤ ኢዛካ ኪንቼሬላ ጉዲላ ማለ ሊቂሳዳ ዙማ ቦላፌ ዱጌ ጎጊዛ ሃላን ዬጋዲስ።

22 አንቴ ቃሴካ ታቤሬን፤ ማሳኒኔ ኪብሮቲ-ሃታኦቤን አንቴ ጎዳ ሃንቁሊዴታ።

23 ጎዳይ አንቴና፡ «ቢቲ! ታ አንቴስ አሚዳ ሂዶታ ቢታዮ ላቲቲ» ጌዲ አንቴና ቃዴሴ ባሪኔፔ ኪቲዳ ዋዴ አንቴ ኢዛ ቦላ ማካሊዴታ ኣቲን ኢዛን ኣማኔቲቤኬታ፤ ኢዛ ቃላሰካ አዛዘቲቤኬታ።

24 ታ አንቴና ኤርሶፌ ሃኖ ጋካናስ አንቴ ጎዳ ቦላ ማካሊዳ ማለ ዴታ።

25 ጎዳይ፡ «ታኒ ኢስታ ዳይሳና» ጌዲ ዮቲዳ ገሻሰ ታኒ ሄ ኦይዱ ታሙ ጋላሳታኔ ኦይዱ ታሙ ቃማታ ጎዳ ሲንላን ጉፋናዳ ጋምአዲስ።

26 ታኒ ዋሳሼ፡ «ኡባፌ ቶቃ ጎዳዉ! ኔኒ ኔ ጌታ ዋልቃኒኔ ኔ ሚኖ ቄሴን ዋዛዳ ጊብጾፔ ኬሲዳ ኔ ዴሬዛ ዳይሶፋርኪ!»

27 ካሴ ኔ ኦሳንቻታ አብራሃሜ፡ ዪሳቃኔ ያቆቤ ቆፓርኪ፤ ሃይሳ ዴራ ዋዚና ሙሜቲላ፡ ኢታቲላኔ፤ ናጋራ ኡባ ቆዶፓርኪ!» ጋ ዋሳዲስ።

28 ኔ ሂስቶንታ አገሪኩ ኑና ሄ ዳሬ አሳይ፥ «ጎዳይ ኢስታ ጌልፋና ጊዲ ሂዶታ አሚዳ ቢታዮ ጌልፋናስ ዳንዳዮንታ ገሻሲኔ ኢዚ ኢስታ ኢዲዳ ገሻሰ ባዞ ቢታን ኢስታ ዋዳናስ ኬሲዳስ» ጊዲ ሚጫና።

29 ጊዳ አቲን ሃ አሳይ ኔኒ ኔ ጊታ ዋልቃኒኔ ኔ ሚኖ ቄሴን ኔስ ጊዳና ማላ ኔ ዶራ ኬሲዳ ዳሬ።

10

ሙሴይ ናምኣንሉ ኤኪዳ ታሙ አዛዘታ
(ኬሳ 34:1-10)

1 ሄሳፌ ጉዬ ጎዳይ ታና፥ «ሃይሳፌ ካሴ ሜቂዳ ሎቻ ሹቻታ ማላ ሃራ ናምኡ ሹቻ ማሳ ገገሳ፤ ኢስታ ዋላናስ ታቦታ ሚሳፌ ሜዳ፤ ሂስታዳ ፑዴ ሃ ዙማ ሁኤ ኬዛ።

2 ኔ ካሴ ሚንሉዳ ሎቻ ሹቻታ ቦላ ጸፊቲዳ አዛዘታ ቃሴካ ታኒ ኢዛራ ጸፋና፤ ኔኒካ ኢስታ ታቦታዛ ጊዶን ዋላ» ጊዳስ።

3 ሄሳ ገሻሰ ታኒ ኦዶሮ ሚሳፌ ታቦታ ገገሳዲስ፤ ካሴይታ ሚሳቲዛ ናምኡ ሎቻ ሹቻታ ማሳ ኤካዳ ፑዴ ዙማ ቦላ ኬዛዲስ።

4 ኢንቴ ዙማ ጋርሳን ሺቂ ዲሺን ጎዳይ ታማ ጊዶን ዲሼ ኢንቴስ ቆንጨሲዳ ታሙ አዛዘታ ካሴይሳካ ሃኢ ሎቻ ሹቻታ ቦላ ጸፊዲ ታስ አሚዳስ።

5 ሄሳፌ ጉዬ ታኒ ዙማ ቦላፌ ዲጌ ዋዳዳ ጎዳይ ታና አዛዘዳ ማላ ሄ ማሴቲዳ ሎቻ ሹቻታ ታ ገገሲዳ ታቦታ ጊዶን ዋላዲስ፤ ሄ ጋላሳፌ ሃኖ ጋካናስ ሄን ኢዛ ጊዶን ዴቲስ።

6 [ኢስራኤል አሳይ ቢኤሮቲ-ቤኒ-ያቂኔ አሳታስ ሃላ ኦላይ ዲዛሶፔ ሞሴሬ ቢዳ፤ አሮኔይካ ሃይቂዲ ሄን ሞጌቲዳስ፤ ኢዛሶሆን ኢዛ ና ኤልኤዜሬይ ቄሴ ጊዲዳስ።

7 አሳይ ሄሳፌ ዴንዲዲ ጌዴ ጉዲጎዳ ቢዳስ፤ ሄፔካ ዮጽባቴ ጌቲቲዛ ጎጊዛ ሃላ ዲዛሶ ቢዳስ።

8 ሄ ዋዴ ሌዌ ቆሞቲ ጫቆ ቃላ ታቦታ ቶካና ማላ፥ ጎዳ ሲንላን ኤቂዲ ኢዛስ ኦላና ማላኔ አሳካ ጎዳ ሱንላን አንጃና ማላ ሹሚዳስ፤ ሃቻ ጋካናስ ሌዌ ቆሞታ ኦሶይ ሄሳ።

9 ሄሳ ጋሶን ሌዌ ቆሞቲ ሃንኮ ቆሞታራ ገሼታናስ ጸንጾይ አሚቶንታይሲ ሄሳሳ፤ ኢንቴ ጎዳይ ኢስታስ ዮቲዳ ማላካ ኢስታ ጸንጾይ ጎዳ ኢንቴ ጸሳ።]

10 ታኒ ካሴይሳዎ ዋሳሼ ኦይዱ ታሙ፤ ጋላሲኔ ኦይዱ ታሙ፤ ቃማ ጋካናሰ ጋምኣዲሰ፤ ጎዳይ ሃኢካ ታ ዋሳ ሲዪዱ ኢንቴና ጳይሶንታ ሽምፖራ ፓጸ ዋላዴሰ።

11 ሄሳፌ ጉዬ ኢዚ ታና፤ «ሃኢ ኔ ባ! ታኒ ካሴ ኢሰታ ኣዋታሰ ኢሚዳ ሂዶታ ቃላ ማላ ኢሰቲ ሄ ቢታዮ ላታና ማላ ዴራ ካሌፋ» ጊዴሰ።

ጸሓፊ ቤሲዛ ያሻቴሐ

12 ኢሰራኤል አሳዉ! ጎዳይ ኢንቴፌ ኮይዛይ ሃይሳፌ ካሊዛይሳ፤ ጎዳ ኢንቴ ጸሓ ያዪቴ፤ ኢዛ ኦጌ ካሊቴ፤ ኢዛ ሲቂቴ፤ ኩሚሳ ዋዚናቴኔ ኩሚሳ ሽምፖራ ኢዛሰ ኦሊቴ።

13 ኢንቴሰ ሎኣና ማላ ታኒ ሃቕ ኢንቴሰ ኢሚዛ ጎዳ ኣዛዘታኔ ዋጋታ ናጊቴ።

14 ሳሎይኔ ሳሎፔ ቦላን ዲዛ ሳሎቴ፤ ቢታይኔ ቢታ ቦላ ዲዛ ኡባይ ጎዳሳ።

15 ጎዳይ ካሴ ኢንቴ ኣዋታ ኬሂ ሲቂዳ ጋሶን ኢንቴና ኣይዛቤታ ጊዶፌ ዶሪዴሰ፤ ኢንቴካ ሃቕ ጋካናሰ ኢዛሰ ዶሬቴዳ ዴሬ ጊዲዴታ።

16 ሄሳ ጊሻሰ ኣኔ ሃይሳፌ ጉዬ ኢንቴ ዋዚና ሙሚሶፒቴኔ ኢንቴ ዋዚና ኢታቴላ ዲጊዲ ጎዳሰ ኣዛዘቴቴ።

17 ጎዳ ኢንቴ ጸሓይ ጸሓ ጌቴቴዛ ኡባፌ ቦላ፤ ጎዳታሰ ጎዳ፤ ኢዚ ጊታ፤ ሚኖኔ ያሺዛ ጸሓ፤ ኢዚ ማዲ ፒርዶንታ ጸሓ፤ ማጋንጸ ኤኮንታ ጸሓ።

18 ኢዚ ዪኦታሲኔ ኣምኤታሰ ፒርዴሰ፤ ኢዚ ዴራ ጊዶን ዲዛ ቤቴ ኣሳታ ዶሲዛ ጊሻሰ ካሊኔ ማይኦ ኢሰታሰ ኢሚሰ።

19 ሄሳፋካ ኢንቴ ካሴ ጊብጼ ቢታን ቤቴ ኣሰ ጊዲዳ ጊሻሰ ኢንቴካ ኢንቴ ጊዶን ዲዛ ቤቴ ኣሳታ ሲቂቴ።

20 ጎዳ ኢንቴ ጸሓሰ ያዪቴ፤ ኢዛሰ ጸላ ጎይኒቴ፤ ኢዛን ኣማኔቴዲ ኢዛ ሱንፋን ጫቂቴ።

21 ኢንቴ ጸሓይ ኢዛ፤ ኢዚ ኢንቴሰ ኦሊዳ ጊታኔ ማላሊሲዛ ሚሻታ ኡባ ኢንቴ ኢንቴ ኣይፌን ቤኢዳ ጊሻሰ ኡባ ዋዴ ኢዛ ጋላቴቴ።

22 ቤኒ ኢንቴ ኣዋቲ ዲጌ ጊብጼ ዋዲዛ ዋዴ ኢሰታሰ ቆዳይ ላፑን ታሙ፤ ጸላ፤ ሃኢ ጊዲኮ ጎዳ ኢንቴ ጸሓይ ኢንቴ ቆዳ ሳሎ ጸላንቴ ማላ ዳርሲዴሰ።

11

እዛዜቴላፊ በቴዛ ጎኑ

¹ ሄሳ ጊሻስ ጎዳ እንቴ ጸሳ ሲቂቴ፤ ኢዚ እንቴፊ ኮይዛ ኢዛ ዋጋ፥ ማራኔ እዛዙታ ኡባ ዋዴ ፖሊቴ።

² ጎዳ እንቴ ጸሳ ሴራዛ ሄሲካ ኢዛ ጌታቴላ፥ ኢዛ ዋልቃኔ ኢዛስ ዲዛ ማታ በኢዳይኔ ኤሪዛይ እንቴ ናይታ ጊዶንታ እንቴና ጊዲዳይሳ ዩሺ ቆፒቴ።

³ ማለታታኔ ኢዚ ገብጾ ካዋ ቦላኔ ኩሜላ ዴራ ቦላ ኦሊዳ ጌታ ኦሶታ እንቴ እንቴ ኣይፊራ በኢዳይ።

⁴ ቃሴ ኢስቲ እንቴና ካሊዲ ዩዴሊዳ ዋዴ ጎዳይ ገብጾ በታ ኦላንቻታ፥ ኢስታ ፓራታኔ ፓራ-ጋሬታ ዞኦ ኣባን ሚቲሲዲ ሃቕ ጋካናስ ኢስታ ሙሌራ ቆይሲዳይሳ በኢዳይ።

⁵ እንቴ ባዞፊ ዴንዲዲ ሃ ሃይሳ ጋካናስ ጎዳይ እንቴስ ኣይ ኦሊዳኮ እንቴ ኤሬታ።

⁶ ኦርቤሌ ቆዋታፔ ኤልያቤ ና ዳታኔኔ ኣብራሜ ቦላ ኢዚ ኦሊዳይ ዩሺ ቆፒቴ፤ ኢስራኤሌ ናይቲ በዩሺን ቢታያ ዶይታዳ ኢስታ፥ ኢስታሶ ኣሳ፥ ኢስታ ዱንካኔኔ ኢስታ ሃሮ ኡባ ሚታዱስ።

⁷ ጎዳይ ኦሊዳ ሃ ጌታ ኦሶታ ኡባ እንቴ እንቴ ኣይፊራ በኢዳይ።

⁸ ሂስቲኮ እንቴ ፒኒዲ ላታና ቢታዮ ኦይካናስ እንቴ ዋልቃ ዴማና ማላ ታኒ ሃቕ እንቴስ ኢሚዛ እዛዙታ ኡባ ናጌቴ።

⁹ እንቴ ኢዛ እዛዙታ ናጌኮ ጎዳይ ካሴ እንቴ ኣዋታሲኔ ኢስታ ዜሬላታስ ኢማናስ ጫቂዳ ኤሲኔ ማሊ ኩሚዳ ሄ ሎኦ ቢታይን እንቴ ዳሮ ላይላ ዳና።

¹⁰ እንቴ ላታናስ ጌላና ቢታያ እንቴ ኬዚዲ ዩዳ ገብጾ በታ ማላ ጊዲኩ፤ ገብጾን እንቴ ካላ ዜሪዳፔ ጉዬ ሃሊ ካላ ጊዶ ባና ማላ ዛራዛ እንቴ ቶሆን ዩዲ ዩዲ በሴታ።

¹¹ ጊዶ ኣቲን እንቴ ዮርዳኖሴ ሻፋ ፒኒዲ ላታና ቢታያ ኢዚን ዙማቲኔ ሾባቲ ዲዛ ጊሻስ ኢዛ ኢራ ሃላ ኡዩዛ ቢታ።

¹² ሃኖ ሃ ቢታዮ ሎኤሊ ኦይኪዛይኔ ላይላ ኩሜላ ናጌዛይ ጎዳ እንቴ ጸሳ።

¹³ ሄሳ ጊሻስ ጎዳ እንቴ ጸሳ ሲቂቴ፤ ኩሜላ ዋዚናፔኔ ኩሜላ ሼምፖፊ ኢዛስ ኦሊቴ፤ ታኒ ሃቕ እንቴስ ኢሚዛ እዛዙታ ፖሊቴ።

14 እንቲ ሄሳብ ኦሊኮ እንቲ ካፋ፡ ዋይኔኔ ዛይቲ ፓጩይ ባይንዳ ሸሻና ማላ ጎዳይ እንቲሰ ባይሳ ኢራኔ ባልጎ ኢራ ዋዴን ዋዴን ቡኪሳና።

15 ጎዳይ እንቲ ማሄታሰ ማታ ዳርሳና፤ እንቲሰ ኮሺዛ ካል ኢሚን እንቲ ካላና።

16 እንቲ ጎዳፔ ሃኪዲ ኤቃ ጸሳታሰ ኦፋናሲኔ ጎይናናሰ ጉዬ ሲሞንታ ማላ ናጌቲቲ።

17 እንቲ ናጌቶንታ ኣጊኮ ጎዳ ሃንቆይ እንቲ ቦላ ኤጲ ኬዛና፤ ኢራይ ቡኮንታ ማላኔ ቢታይ ካል ኢሞንታ ማላ ኢዚ ሳሎ ጎርዳና፤ እንቲካ ጎዳይ እንቲሰ ኢሚዳ ሎኦ ቢታይፌ ኤሶን ጳያና።

18 እንቲ ሃ ኣዛዘታ ኡባ ዋዴ እንቲ ዋዚናኒኔ እንቲ ቆፋን ዋሊቲ፤ እንቲሰ ማላታ ጊዳና ማላ ኢሰታ እንቲ ቄሴን ቃቺቲ፤ ቃሴካ እንቲሰ ሊጼ ቦላካ ኦይሊቲ።

19 እንቲ ናይታ ታማርሲቲ፤ እንቲሶን ኡቲሼ ዋይኮ ኦጌን ሃማቲሼካ ዋይኮ ሼሞፒዛሶን ጊዲንካ ዋይኮ ኦሶ ኡባን ኢሰታ ጊሻሰ ሃሳዬቲቲ።

20 እንቲ ኬላ ፔንጌ ቆሲላላ ቦላኔ እንቲ ጊቤ ፔንጌ ቦላ ጸፊ ዋሊቲ።

21 እንቲ ሄሳብ ኦሊኮ እንቲ ጎዳይ ካሴ እንቲ ኣዋታሰ ኢማናሰ ጫቀዳ ቢታይ ቦላ እንቲ ላይላይኔ እንቲ ናይታ ላይላይ ሳኦፔ ቢዲ ሳሎ ጋካና ኬና ኣዲቃና።

22 ጎዳ እንቲ ጸሳ ሲቃናሰ፡ ኢዛ ኦጌ ኡባ ካላናሲኔ ኢዛን ኣማኔታናሰ ታኒ ሃቕ እንቲሰ ኢሚዛ ኣዛዘታ ሚንሊዲ ናጌቲ።

23 እንቲ ሄሳብ ኦሊኮ ጎዳይ ሃይታ እንቲ ሲንላን ዲዛ ካዋቲላታ ኡባ ኬሲ ጎዳና፤ እንቲኒካ ጮራቲላኒኔ ዋልቃን እንቲፌ ሚና ጊዲዳ ዴሬታ ቢታ ላታና።

24 እንቲ ቶሆን እንቲ ዬቂዳ ቢታይ ዉሪካ እንቲሰ ጊዳና፤ እንቲ ዛዋይ ዱጌሃ ባጋራ ዲዛ ባዛፌ ቢዲ ፑዴሃ ባጋራ ዲዛ ለባናሴ ዙማ ጋካና፤ ቃሴካ ኣርሼይ ሞኪዛ ባጋራ ኤፊራጲሴ ሻፋፔ ቢዲ ኣርሼይ ዉሊዛ ባጋራ ዲዛ ሜዲቲራኔ ኣባ ጋካና።

25 እንቲናራ ኣይ ኣሲካ ኤቁታናሰ ዳንዳዬና፤ ጎዳ እንቲ ጸሳይ እንቲሰ ኢሚዳ ሂዶታ ቃላ ማላ እንቲ ቢዛሶ ኡባን ኣሳይ እንቲና ቤኢዲ ዳጋማና ማላኔ ያያና ማላ ኦፋና።

26 ሄኮ! ታኒ ሃቕ ኣንጆፌኔ ቃንጌላፌ ኢሳ እንቲ ዶራና ማላ እንቲ ሲንላን ዋላዲሰ።

27 ታ ሃች ኢንቴስ ኢሚዛ ጎዳ ኢንቴ ጸሳ አዛዞታ ናጊኮ ኢንቴ ኢንጃታና።

28 ጊዳ ኢቴን ታኒ ኢንቴና ሃች አዛዚዛ ጎዳ ኢንቴ ጸሳ አዛዞታ ናጎንታ ኢዲዲ ኢንቴ ኤሮንታ ሃራ ኤቃ ጸሳታ ጎይናናስ ኢዛ ኦጌፔ ካሬ ኬኢዛ ጊዲኮ ኢንቴ ቃንጌታና።

29 ጎዳ ኢንቴ ጸሳይ ኢንቴ ላታና ቢዛ ቢታዮ ላቲሲዳ ዎዴ ኢንጃዛ ጋሪዛኔ ዙማ ቦላ ቃሴካ ቃንጌላ ኤባሌ ዙማ ቦላ አዋጃ።

30 ሄ ዙማቲ ዮርዳኖሴ ሻፋፔ አርሼይ ወሊዛ ባጋራ ኣራቤን ዲዛ ካናኔ ቢታን ጌልጌላ ካታማፔ ሲንላ ባጋራ ዲዛ ሞሬ ሚላ አቻን ዳቲስ።

31 ኢንቴ ሄን ዳና ማላ ጎዳ ኢንቴ ጸሳይ ኢንቴስ ኢሚዳ ቢታዮ ላታናስ ኢንቴ ዮርዳኖሴ ሻፋ ፒኒዲ ላቲዛ ዎዴ፤

32 ታ ኢንቴስ ሃች ኢሚዛ ዎጋኔ ማራ ኡባ ሎኤሊ ናጊቴ።

12

ጎይናናስ ኢሜቲዳ ፔጺ ኢሲ ሶሆ

1 ጎዳ ኢንቴ አዋታ ጸሳይ ኢንቴስ ኢሚዛ ቢታ ቦላ ዲዛ ዎዴ ኢንቴ ናጋና ዎጋቲኔ ማራቲ ሃይታንታ፤

2 ኢንቴ ላታና ቢታይን ዲዛ ካዎቲላይ ዙማታ ቦላ፤ ዙሞቡላታ ቦላኔ ዳሻ ሚላታ ጋርሳን ባንታ ኤቃ ጸሳታስ ጎይኒዛሶታ ሙሌራ ዳይሲቴ።

3 ኢስቲ ያርሾ ያርሺዛሶሆታ ላሊ ዳይሲቴ፤ ሹቻፌ ኦሴቲዲ ቲሳ ማላ ኤቁዳ ኤቃ ጸሳታ ኡባ ለቁሲቴ፤ አሼሮ ጌቲታ ጸይጌቲዛ ኤቃ ጸሳይ ሚስሌታ ኡባ ታማን ጸጊቴ፤ ማሴቲ ጊጊዳ ኢስታ ኤቃ ጸሳታ ኡባ ሜንፊሬሊ ዩጊቴ፤ ኢስታ ሱንላካ ቢታፌ ዳይሲቴ።

4 ኢንቴ ጎዳ ኢንቴ ጸሳስ ኣይዛቤቲ ባንታ ኤቃ ጸሳታስ ጎይኒዛይሳላ ጎይኖፍቴ።

5 ጎዳ ኢንቴ ጸሳይ ዳናሲኔ ኢዛ ሱንላይ ሄን ጸይጌታና ማላ ኡባ ቆዋታ ጊዶን ኢዚ ዶሪዳሶዛ ኮዪዲ ሄ ቢቴ።

6 ጸጌቲዛ ያርሾታ፤ ሃራ ያርሾታ፤ ኢንቴ ኣሰራታ፤ ኢንቴ ሙጹዋታ፤ ኢንቴ ኣዲኔቲዳ ኣዲናታ፤ ኢንቴ ዶሲዲ ኢሚዛ ኢሞታታኔ ኢንቴ ሜሃፔ ባይራታ ሄ ኤሂቴ።

7 ሃን ጎዳ አንቱ ጸሳ ሲንላን አንቱ ማና፤ ቃሴ አንቱ አንቱ ዋልቃን ኦሊ ኬሲዳ ኡባኒኔ ጎዳ አንቱ ጸሳይ አንቱና አንጂዳ ኡባን አንቱ አንቱሶ አሳራ ኡፋዬታና።

8 አንቱ ሃኖ ጋካናሰ አንቱ ሼኔ ማላ ኦሊሹ ጋምኢዳታ፤ ሄ ዋዴ ሄሳሶ ኦሊኬታ።

9 ጎዳ አንቱ ጸሳይ አንቱሰ አሚን አንቱ ሽምፒዲ ዳና ቢታዮ ቡሮ ጌሊቤኬታ።

10 ጎዳ አንቱ ጸሳይ አንቱሰ አሚና ቢታይን ዳናሰ አንቱ ዮርዳናሴ ሻፋ ፒናና፤ አንቱ ዩሾን ዶዲ ኡቲዳ ሞርኬታፔ አንቱና ኢዚ ሽምፒሳና፤ አንቱካ ሄን ዋፑ ጊ ዳና።

11 ሄ ዋዴ ጎዳ አንቱ ጸሳይ ባ ሱንላይ ጾይጌታና ማላ ዶሪዳሶ ታኒ አንቱና አዛዚዛ ኡባ፤ ጸጌቲዛ ያርሾታ፤ ሃራ ያርሾታ፤ አንቱ አሰራታ፤ አንቱ ሙጹዋታ፤ አንቱ አዲኔቲዳ አዲና ኡባ ኤሃንዳታ።

12 አንቱ ማጫ ናይታራኔ አንቱ አቱማ ናይታራ፤ አንቱሰ ኦሊዛ ማጫሳታራኔ አቱማሳታራ፤ አንቱናራ ጸንጾ ጊሼቲ ኤኮንታ ባንታ ባንታ ካታማን ካታማን ዲዛ ሌዌ ቆሞታራ ጎዳ አንቱ ጸሳ ሲንላን አንቱ ኡፋዬታና።

13 አንቱ ጸሳሰ ጹጊ ያርሺዛ ያርሾ ቤቶሶን ጮ ያርሾንታ ማላ ናጌቲቱ።

14 አንቱ አንቱ ዜሬላቲ ዲዛሶ ኡባፌ ኢሳን ጎዳይ ዶሪዳሶን ጸላ ጸጌቲዛ ያርሾ ያርሺቲ፤ ታኒ አንቱና አዛዚዛ ሚሽ ኡባካ ሄን ኦሊቲ።

15 ጊዲኮካ ጎዳ አንቱ ጸሳይ አንቱና አንጂዳ ኬና አንቱ ካታማታፔ አዋይሳንካ አንቱ ሜሄፔ፤ ዋይኮ ጋራፔ ዋይኮ ጌኔሳፌ ሹኪዲ አንቱ ኮዪዳ ኬና ማና ዳንዳዬታ፤ ሃ አሾዛፔ ዋጋይ ጊዛ ማላ ጌዪዳ አሲ ጊዲን ዋይኮ ጌዮንታ አሲ ኡባይ ማና ዳንዳዬሰ።

16 ጊዳ አቲን ኢሰታ ሱሐ ሞፒቲ፤ ሱላዛ ሃላ ማላ ዲጌ ጋዴን ጉሲቲ።

17 አንቱ አንቱ ካላፌ፤ ዋይኔ ኡሻፌኔ ዋጋራ ዛይቲፔ አሚዛ አሰራታ፤ አንቱ ሚዛታፔ፤ ዶርሳታፔ፤ ዳይሻታፔ ባይራ፤ ጎዳሰ አንቱ አሚናሰ አዲኔቲዳ አዲና ኡባኔ አንቱ አንቱ ዶሳን ሚሽ ኡባካ አንቱ ዲዛሶ አዋንካ ሞፒቲ።

18 ጎዳ አንቱ ጸሳይ ዶሪዳሶን አንቱ ማጫ ናይታራኔ አቱማ ናይታራ፤ አንቱ ማጫ አይሌታራኔ አቱማ አይሌታራ፤ ሄሳሶካ አንቱ ካታማታን ዲዛ ሌዌ ቆሞታራ ኢሲፌ ጎዳ አንቱ ጸሳ ሲንላን ሚቲ፤

አንቲ ዳቡርዲ ሺሺዳ ሚሽ ኡባን ጎዳ አንቲ ጸሳ ሲንላን ሄን ኡፋዬታና።

19 አንቲ አንቲ ቢታን ዲዛ ዋዴ ኡባን ለዌ ቆሞታ ዬጊ አጎንታ ማላ ናጌቲቲ።

20 ጎዳ አንቲ ጸሳይ አንቲስ ጫቂዳ ቃላ ማላ አንቲ ዛዋ አሲዛ ዋዴ አንቲና አሾ አሞሲኮ አንቲ ኮዪዳ ኬና ማና ዳንዳዬታ።

21 ጎዳ አንቲ ጸሳይ ባ ሱንላይ ጼይጌታና ማላ ደሪዳሶይ አንቲፌ ሃኮን ዲኮ አንቲና ኢዚ አዛዚዳ ማላ ሚዛታፔ፣ ደርሳታፔ ሹኪዲ አንቲ ዲዛ ካታማታን አንቲ ኮዪዳ ኬና አሾዛ ማና ዳንዳዬታ።

22 ዋጋይ ጊዛ ማላ ጌሻ አስ ጊዲን ዋይኮ ጌዮንታ አስ ጊዲን ኦኒካ ጋራ አሾ ዋይኮ ጌኔሳ አሾ ሚዛ ማላ ሄ አሾዛ ማናስ ዳንዳዬታ።

23 ጊደ አቲን ሸምፖይ ሱላን ዲዛ ጊሻስ ሱላራ ዲዛ አሾ ሞንታ ማላ ናጌቲቲ፤ ሄሳ ጊሻስ ሸምፖ ሱላራ ጋሊ ሞፒቲ።

24 ሱላ ጋዴን ጉሲቲ አቲን ሞፒቲ።

25 አንቲሲኔ አንቲ ናይታስ ሎኦ ጊዳና ማላ ሱላ ሞፒቲ፤ አንቲ ሄሳሶ ኦሊኮ ጸሲ ኡፋዬታና።

26 ሄሳ ጊሻስ አንቲ ጎዳ አንቲ ጸሳስ አማናስ ዱማሲዳይሳኔ አዲኔቲዳይሳ ኤኪዲ ደሪቲዳሶ ኤፍቲ።

27 ጸጌቲዛ ያርሾዛ፣ አሻኔ ሱላ ኡባ ጎዳ አንቲ ጸሳስ ያርሾ ያርሺዛሶዛ ሶላ ሺሺቲ፤ ሱላዛ ጎዳ አንቲ ጸሳስ ያርሾ ያርሺዛሶሆታ ሶላ ጉሲቲ፤ አሾዛ ጊዲኮ አንቲ ሚቲ።

28 አንቲሲኔ አንቲ ናይታስ ሚርናስ ሎኦ ጊዳና ማላ ኢዚ አንቲና አዛዚዛ አዛዘታ ሎኤሊ ናጌቲ፤ አንቲ ሄሳሶ ኦሊኮ ጎዳ አንቲ ጸሳ ሲንላን ሎኦኔ ሱሬ ጊዲዳ ኦሶ ኦሊታ።

ኤቃ ጸሳታ ሚስሌስ ጎይኖንታ ማላ አሜቲዳ አዛዘ

29 አንቲ ላታናስ ቢዛ ካዋቱላታ ጎዳ አንቲ ጸሳይ አንቲ ሲንላፌ ሳይሲዛ ዋዴኔ አንቲካ አሰታ ቢታ ላቲዲ ዴኢዛ ዋዴ።

30 ኢስቲ አንቲ ሲንላፌ ሳይዳፔ ጉዬ፣ «ሃይቲ ሃ ካዋቱላቲ ባንታ ኤቃ ጸሳታስ ዋስቲ ጎይኒዞ? ኦኒካ አሰታይሳሶ ኦላና» ጊዲ ዋጸማዴን ኦይኬቶንታ ማላ ናጌቲቲ።

31 አንቲ ጎዳ አንቲ ጸሳስ ጎይኒዛ ጎይኖይ አይዛቤቲ ጎይኒዛ ጎይኖ ማላ ጊዳናስ ቤሴና፤ ኢስቲ ባ ኤቃ ጸሳታስ ጎይኒሼ ኦሊዛ ኦሶቲ ኡባይ ኬሂ ሻቲዛዚኔ ጎዳ ማታን ኢጾቲዳዛ፤ ጋሶይካ

ኢስቲ ባ ዩሊዳ ናይታካ ባንታ ኤቃ ጸሳታሰ ያርሾ ኦሊዱ ታማን ጹጌቲሰ።

³² ሄሳ ጊሻሰ ታ ኢንቴና ኣዛዚዳ ኣዛዞ ኡባ ኦሊቲ፤ ኢስታ ቦላ ኣይኮካ ጉጃፍቲ፤ ቃሴካ ኢስታፌ ኢሲኖካ ፓጨሶፒቲ።

13

¹ ኢንቴ ጊዶፌ ካዪዛ ኣሲ ዋይኮ ኣጉሞ ኣጉሜቲዛ ኣሲ፥ «ታኒ ጊታ ማላታ ዋይኮ ማላሊሲዛ ሚሽ ኦፋና» ጊኮ።

² ኢዚ ዮቲዳ ጊታ ማላታይኔ ማላሊሲዛ ሚሽ ኡባይ ቱሙካ ፖሌቲን ኢዚ ኢንቴና፥ «ኣኔ ኢንቴ ኤሮንታ ሃራ ጸሳታሰ ጎይኖስ» ጊኮ።

³ ጎዳ ኢንቴ ጸሳይ ኢንቴ ኢዛ ኩሜላ ዋዚናፔኔ ኩሜላ ሸምፖፌ ዶሲዛኮ ኤራናሰ ኮዪዱ ሄ ካዪዛይሳ ዩዱዳ ጊሻሰ ኢዚ ጊዛይሳ ሙሌካ ሲዮፒቲ።

⁴ ጎዳ ኢንቴ ጸሳ ካሊቲ፤ ኢዛሰ ጸላ ያዪቲ፤ ኢዛ ኣዛዞታ ናጊቲ፤ ኢዛ ቃላ ሲዪቲ፤ ኢዛሰ ጸላ ጎይኒቲ፤ ኢንቴሰ ኢዛራ ዱዛ ኢሲፌቲሊ ሚኖ ጊዶ።

⁵ ካሴ ኢንቴ ኣይሌቲላን ዱዛ ጊብጾፔ ኢንቴና ዋዚ ኬሲዱ ኣሺዳ ጎዳ ኢንቴ ጸሳ ቦላ ኢንቴ ማካላና ማላ ኣጉሞ ዮቲዛይ ዋይኮ ታ ናቤ ጊዛ ኡባ ዋዲቲ፤ ሄሳ ማላ ኣሳቲ ጎዳ ኢንቴ ጸሳይ ኢንቴና ሚኒ ኤቃና ማላ ኣዛዚዳ ኦጌፔ ካሬ ኬሳናሰ ቆፔቲሰ፤ ሄሳ ጊሻሰ ሃይታ ኢታታ ኢንቴ ጊዶፌ ዲጊቲ።

⁶ ኢንቴ ኣዪ ና ኢሻይ፥ ኢንቴ ኣቱማ ናይቲኔ ኢንቴ ማጫ ናይቲ፥ ኢንቴ ሲቂዛ ኢንቴ ማቼቲ፥ ኢንቴ ሲቂዛ ኢንቴ ላጌቲ ኢንቴና፥ «ካሴ ኢንቴኒኔ ኢንቴ ኣዋቲ ጎይኒ ኤሮንታ ጸሳሰ ኣኔ ጎይኖስ» ጊኮ።

⁷ ቢታሰ ሃ ጋጾፔ ሄ ጋጾ ጋካናሰ ዱዛ ኢንቴ ዩሾ ኡባን ማታኒኔ ሃኮን ዱዛ ኡባ ኣሳይ ጎይኒዛ ጸሳታሰ፥ «ቢዱ ኣኔ ኢስታሰ ጎይኖስ» ጊዱ ባሌሊኮ።

⁸ ኢንቴ ሄሳ ማላ ኣሳታሰ ኤኖ ጎፒቲ፤ ኢስቲ ጊዛይሳካ ሲዮፒቲ፤ ሄሳ ማላ ኣሳታሰ ቃዲቲዱ ኢስታ ኣሻናሰ ዳፌቶፍቲ።

⁹ ሲዶንታ ኢስታ ዋዲቲ፤ ሄሳ ማላ ኣሰ ኮይሮቲዱ ኢንቴ ጫዲቲ፤ ሃራቲ ኢንቴፌ ካሊዱ ሹቻራ ጫዴቶ።

¹⁰ ኢንቴ ካሴ ጊብጾ ቢታን ኣይሌቲላን ዱዛሶፔ ኢንቴና ዋዚ ኬሲዳ ጎዳ ኢንቴ ጸሳፌ ኢንቴና ሃሳናሰ ኮዪዳ ጊሻሰ ሄሳዳይ ሃይቃና ጋካናሰ ሹቻን ኩራኪቲ።

11 ሄሳፌ ጉዬ ኢሰራኤል አሳይ ኡባይ ሄሳ ሲዱዲ ባባና፤ ሄሳ ጊሻስ ሄሳ ማላ ኢታ ኦሶ ናሞኣንሶ ኦኒካ ኦፊና።

12 ጎዳ ኢንቴ ጸሳይ ኢንቴ ዳና ማላ ኢንቴስ ኢሚዛ ካታማታፔ ኢሳን ኢንቴ ዲዛ ዎዴ፤

13 ኢንቴ አሳ ጊዶፌ ኢታቲ ዴንዲዲ አሳ፤ «ኣኔ ቢዲ ኢንቴ ኤሮንታ ጸሳታስ ጎይኖስ» ጊዲ ባለፊሽን ሲዱኮ፤

14 ኢንቴ ሄሳ ሄ ዮኦዛ ኦይቺቴ፤ ሚንፊካ ቆሪቴ፤ ሃይሲ ኢታ ሃኖይ ኢንቴ ጊዶን ኦሴቲዳይሲ ቱሙ ጊዲኮ፤

15 ሄ ካታማይን ዲዛ አሳ ኡባ ማሻን ሲፊ ቆይሲቴ፤ ሄ ካታማዮኔ ኢዚን ዲዛ ሜሃ ኩሜል አሾንታ ቆይሲቴ።

16 ሄ ካታማይን ዲዛ አሳ አቆታ ኡባ ኤኪዲ ሄ ካታማይ ጊዶን ዲዛ ዱቡሻን ሸሸ ዶሪቴ፤ ሂስቲዲ ጎዳ ኢንቴ ጸሳስ ያርሾ ኦፊዲ ታማን ጸጊቴ፤ ሄ ካታማያ ናሞኣንሶ ሲማ ኤቆንታ ማላ ሜርናስ ላሌታ አቱ።

17 ፒላ ሚሻፌ አይኮይካ ኢንቴ ኩሼን ቤቶፎ፤ ሂስቲኮ ጎዳይ ባ ዎልቃማ ሃንቆፌ ሲሚዲ ኢንቴና ማራና፤ ኢዚ ኢንቴስ ቃቆታና፤ ካሴ ኢንቴ አዋታስ ጌሊዳ ቃላ ማላ ኢንቴ ቆዳ ዳርሳና።

18 ጋሶይካ ታኒ ሃቶ ኢንቴና አዛዚዛ አዛዛ ኡባ ኢንቴ ናጊዲ ጎዳ ኢንቴ ጸሳስ አዛዜቲኮ፤ ቃሴ ጎዳ ኢንቴ ጸሳ ሲንፋንካ ሱሬ ኦሶ ኦፊኮ ሄ ኢዚ ጌሊዳ ሂዶታ ቃላይ ኢንቴስ ቱሙ ፖሌታና።

14

ዲጌቲዳ ዬሆ ዎጋታ

1 ኢንቴ ጎዳ ኢንቴ ጸሳ ናይታ፤ ሄሳ ጊሻስ ሃይቂዳ አሳስ ሚሼቲዲ ኢንቴ ቦላ ቃጪ ማዲንሶፍቴ፤ ኢንቴ ሁኤ ቢናናካ ቡጮፍቴ።

2 ጋሶይካ ኢንቴ፤ ጎዳ ኢንቴ ጸሳስ ዲማ ዴሬ፤ ጎዳይ ቢታ ቦላ ዲዛ ዴሬ ኡባፌ ኢንቴ ኢዛስ ዲማ ዴሬ ጊዳና ማላ ኢዚ ኢንቴና ባስ ዶሪዴስ።

ሜቴቲዛኔ ሜቴቶንታ ሜዶሳታ

(ሌዌ 11:1-47)

3 ቱና ጊዲዳዝ አይ ሚሼካ ሞፒቴ።

4 ሄሳ ጊሻስ ማና ማላ ኢንቴስ ኢሜቲዳ ሜዶሳቲ ሄኮ ሃይሳፌ ካሊ ዲዛይታ፤ ካጨራ ዲዛይታፔ ሚዝ፤ ዶርሲኔ ዴይሽ፤

5 ንጌሳ፡ ዶጌ፡ ወሻ፡ ዋራ ዳይሽ፡ ጮፎሾ፡ ጋራ፡ ጫጎኔ ቢሆሬ ሚቲ።

6 ቂንጨፊሌይ ጳልቄቲዳይታኔ ባንቺኪዛይታ ኡባ ሚቲ።

7 ጊዶ ኣቲን ቂንጨፊሌይ ጳልቄቶንታይታኔ ባንቺኮንታይታ ሞፒቲ፤ ሄይቲካ ጋሜላ፡ ሃርባይኖኔ ጉፓሌ ሞፒቲ፤ ሄይታንታ ማላ ሜዶሳቲ ባንቺኪዛ ጊዲኮካ ኢስታ ቂንጨፊሌይ ሙሜ ጊዲዳ ጊሻስ ቱና ጊዲ ቆዴቲቲስ።

8 ጉዲንፋ ቂንጨፊሌይ ጳልቄላ ጊዲኮካ ባንቺኮንታ ጊሻስ ኢዚ ሃንኮ ቱናታራ ኢሲፌ ቆዴቲስ፤ ሃይታንታ ማላ ሜዶሳታ ሞፒቲኔ ኢስታስ ኣሃካ ቦቾፍቲ።

9 ሃፋ ጊዶን ዲዛ ሜዴቲፋ ኡባፌ ቂፌራ ዲዛይታኔ ፖቆይ ዲዛይታ ኡባ ሚቲ።

10 ጊዶ ኣቲን ሃፋ ጊዶን ሜዴቲፋ ኡባፌ ቂፌይኔ ፖቆይ ባይንዳይታ ሞፒቲ፤ ሄይቲ ኢንቲስ ቱና ጊዴቶ።

11 ካፎታፔ ጌሻታ ሚቲ።

12 ሜቲታናስ ቤሶንታይቲ ጎሌ፡ ቆሎ፡ ኣንኮ፡

13 ዲማ ዲማ ጸሎታኔ ዋሌታ፡

14 ዲማ ዲማ ቂሮታ፡

15 ያንቻ፡ ጫንጨፍ ጉቶ፡ ሃፋ ካፎ፡ ጋጩ ዛሬ ኡባ፡

16 ጉቶ፡ ሃዘ፡ ዋዪኖ

17 ባዞ ጉቶ፡ ኣንኮ፡ ቢያ፡

18 ዘጊሌ፡ ሳቢሳ ጌቲቲዛ ካፎ ዛሬ ኡባ፡ ጃንጂላቲ ጌቲቲዛ ካፎኔ ወርካወርኮ። *

19 ቂፌራ ዲዛ ቂሪ ሜዴቲፋቲ ኡባይ ኢንቲስ ቱና ጊዲዳ ጊሻስ ኢስታ ሞፒቲ።

20 ጊዶ ኣቲን ኢስታ ጊዶፌ ጌሻታ ሚቲ።

21 ጎዳ ኢንቲ ጸሳስ ኢንቲ ዲማቲዳ ዴሬ ጊዲዳ ጊሻስ ባወቲ ሃይቂዳ ሜሄ ኣሾ ሞፒቲ፤ ሃራ ዴሬፔ ዪዲ ኢንቲ ጊዶን ዲዛይቲ ማና ጊኮ ዲጎፍቲ፤ ዋይኮ ሃራ ዴሬ ኣሳስ ባይዛና ዳንዳዬታ። ዴይሻ ላቃ ኢዛ ኣዬይ ማላን ዶይሶፍቲ።

ኣስራታ ኬሶ ዋጋ

22 ኢንቲ ላይላን ላይላን ጎዪዲ ዴሚዛ ካላፌ ታማፌ ኢሲ ኩሼ ዲማ ሻኪ ዋላቲ።

23 ኢንቲ ኡባ ዋዶ ጎዳ ኢንቲ ጸሳ ቦንቾ ታማራና ማላ ኢዚ ባ ሱንሲ ጴይጌታና ማላ ዶሪዳሶን ኢንቲ ካፋ፡ ዋይኔ ኡሻኔ ዛይቲ

* 14:18 ሃይታንቲ ኡባይ ሃራ ካፎታ ሚዛ ካፎታ። 14:21 ኬሳ 23:19፤ 34:26

አሰራታ፤ እንቲ ዶርሳታፔኔ ሜሄታፔ ኮይሮ ዩሌቲዳይታ ጎዳ እንቲ ጸሳ ሲንላን ሚቲ።

24 ጎዳ እንቲ ጸሳይ ባ ሱንላ ጸይጌታና ማላ ዶሪዳሶዚ እንቲ ዲዛሶፔ ኬሂ ሃሆ ጊዲኮ ጎዳ ጸሳይ እንቲና አንጃና ማላ እንቲ እንቲ አሰራታ ሄ ቶኪ ኤኪዲ ባናሰ ዳንዳዮንታ ኢጲኮ።

25 ሄ እንቲ ኬሲዳ አሰራታ ባይዚዲ ሚሼዛ ጎዳይ ዶሪዳሶዛ ኤኪዲ ቢቲ።

26 ሂሰቲዲ ሄን ሄ አሰራታ ሚሻራ እንቲ ኮዬዳ ሚሸ፤ ሚዝ ጊዲን ዋይኮ ዶርሰ፤ ዋይኔ ኡሹ ጊዲን ዋይኮ ሎኦ ሚኖ ኡሹ እንቲ ኮዬዳ ማላ ሻሚዲ እንቲሶ አሳ ኡባራ ሚሼ ጎዳ እንቲ ጸሳ ሲንላን ኡፋይቲ።

27 ሄሳ እንቲ ኦሊዛ ዋዴ እንቲ ካታማን ዲዛ ሌዌ ቆሞታ ጊሻን ጋኪዳ ጸንጾይ ባይንዳ ጊሻሰ እንቲ ኢሰታ ዬጊ አጎፍቲ።

28 ሄሻንሶ ላይላን ላይላን ኡባ ዋዴ እንቲ ካላፌ ኬሲዛ ዲማ አሰራታ እንቲ ዲዛ ካታማታን ሺሺቲ።

29 ሄሳካ እንቲ ካታማታን ዲዛ ጸንጾይ ባይንዳ ሌዌቲ፤ ቤቲቲ፤ አዋይ ባይንዳ ናይቲኔ አምኤቲ ዪዲ ሜቶ፤ እንቲ ሄሳሶ ኦሊዛ ጊዲኮ ጎዳ እንቲ ጸሳይ እንቲ ኦሶ ኡባን እንቲና አንጃና።

15

አጮ ቃንጾይ አቲዛ ላይሶ
(ሌዌ 25:1-7)

1 ላፑንላ ላፑንላ ላይሶ ወርሴላን እንቲፌ ታልኢዳይታሰ አጮዛ ኢሰታሰ አጋጊቲ።

2 አጊሼ ሂሰቲ አጊቲ፤ ባ ባጋ ኢሰራኤሌ አሳሰ ሚሼ ታልኢዳይይ ወሪ ባ ታልኢዳይሳ ኢዛዴሰ ማር፤ ጎዳይ አጮይ ማሬቲዛ ላይላ ጊዲ አዋጂዳ ጊሻሰ ባ ታልኢዳ ሚሻ ዛሪ ኤካናሰ ኮዮፖ።

3 ሃራ ካሬ ዴሬ አሳሰ እንቲ ታልኢዳ ሚሼይ ዲኮ እንቲሰ ዛራና ማላ ኦይቻና ዳንዳይታ፤ እንቲሰ ኢሻ ኢሰራኤሌ አሳታፔ እንቲፌ ሚሼ ታልኢዳይ ዲኮ ኢሰታሰ አጋጊቲ።

4-5 ሃቶ ታ እንቲና አዛዚዛ አዛዞታ ኡባን ጎዳ እንቲ ጸሳሰ እንቲ አዛዜቲዛይታ ጊዲኮ ጎዳ እንቲ ጸሲ እንቲና ኬሂ አንጃና

ገሻሰ ኢዚ አንቴሰ ጸንጾ ሂሰቲ አሚዛ ቢታይን አንቴ ጋርሳን ማንቆይ ዳና።

6 ጎዳ አንቴ ጸሳይ አንቴሰ ሂደታ ቃላ ማላ አንቴና አንጃና፤ አንቴ ዳር ዳሬታሰ ታልኣናሺን ኢሰታፌ ኦናፔካ ታልኤ ሃ ኤኬታ፤ ቃሴካ አንቴ ካዋቱላታ ሃራና ኣቲን ኦኒካ አንቴና ሃራና።

7 ጎዳ አንቴ ጸሳይ አንቴሰ አሚዛ ቢታን አንቴ ዲዛ ካታማታ ኡባን ኢሰራኤሌ ኣሳፔ ኢሳዳይ ሜቶቲሺን ቤኢኮ ኢዚ አንቴ ባጋ ጊዲዳ ገሻሰ ኢዛሰ ሜቄል ኢቶፒቴ፤ ቃሴ ኢዛ ማዳናፔ አንቴ ኩሼ ጉዬ ኤኮፍቴ።

8 አንቴ ኩሼ ሚጪዲ ኢዛሰ ኮሺዛዝ ኡባ ሞጴቶንታ ታልኢቴ።

9 «ኣጮ ቃንጾፌ ማሪዛ ላፑንላ ላይላይ ጋኪዳሰ» ጊዲ ሜቶታንቻ አንቴ አሻታ ታልኤ ዲጎፍቴ፤ ሄሳ ማላ ኢታ ቆፋይ አንቴ ዋዚናን ጌሎፖ፤ ማንቆ ጊዲዳ አንቴ አሻታሰ አንቴ ታልኦንታ ኢጲኮ ኢሰቲ ፑዴ ጸሳኮ ዋሲን አንቴሰ ጎሜ ጊደንታ ማላ ናፔቲቴ።

10 አንቴ ኢዛሰ ጮ ኪያቴል አሚቴ፤ አንቴ ኢዛሰ አሚሼ አንቴ ዋዚናን ሞጴቶንታ አሚቴ፤ ሂሰቲኮ አንቴ ኦሶ ኡባኒኔ አንቴ ኩሼይ ቦቹዳ ሚሽ ኡባን ጎዳ አንቴ ጸሳይ አንቴና አንጃና።

11 ኣይ ዋዴ ጊዲንካ ቢታ ቦላ ሜቶታንቻይኔ ማንቆይ ዲዛ ገሻሰ አንቴ ዳሬን ዲዛ ማንቆታሲኔ ሜቶታንቻታሰ አንቴ ኪያቴል ኦፋና ማላ ታ ኣዛዛይሰ።

ኣይሌታ ኣይሶ ዋጋ (ኬሳ 21:1-11)

12 ኣዴ ጊዲን ማጫ ጊዲን ኔ ባጋ ጊዲዳ ኢሰራኤሌ ኣሳፔ ኢሲ ኣሲ ኣይሌታናሰ ባና ኔሰ ባይዚኮ ኢዚ ኔሰ ኡሱፑን ላይል ኦሲዳፔ ጉዬ ላፑንላ ላይላን ኢዛ ኣይሌቴላፌ ኬሳ ዬዳ።

13 ኔኒ ኣይሌቴላፌ ኢዛ ኬሳ ዬዲዛ ዋዴ ማላ ኩሼ ዬዳ።

14 ጎዳ ኔ ጸሳይ ኔሰ አሚዳ አንጃፌ፥ ዶርሳታፔ፥ ካላፌኔ ዋይኔ ኣይፌፔ ኢዛሰ ኪያቴላን አማዳ ዬዳ።

15 አንቴካ ካሴ ጊብጾ ቢታን ኣይሌ ጊዲዳይሳኔ ጎዳ አንቴ ጸሳይ አንቴና ሄፔ ዋዚዳይሳ ዶጎፕቴ፤ ታኒ አንቴና ሃቾ ኣዛዚዛይ ሄሳሳ።

16 ጊደ ኣቲን ሄ ኣይሌዚ ኔናኔ ኔሶ ኣሳ ዶሲዳ ገሻሲኔ ኔናራ ዱሲ ኢዛሰ ሎኦ ጊዲዳ ገሻሰ፥ «ታ ኔፔ ሻኬታና ኮይኬ» ጊኮ።

17 ነገሩ ኢዛ ነሶ ፔንጌ ኤፋዳ ኢዛ ሃይላ ኔ ፔንጌ ሳንቃ ቦላ ዋላዳ ዋሰፌራ ሉካ፤ ሃሳፌ ጉዬ ኢዚ ባ ዴኦ ላይላ ኡባን ኔሰ ኣይሌ ጊዶ፤ ቃሴካ ኣይሌ ጊዱዛ ማጫሳሰካ ሃሳሶ ኦላ።

18 ኔ ኢዛ ኣይሌቴላፌ ኬሳ ዬዱዛ ዋዴ፥ «ሃይሲ ታሰ ቆሆ» ጋዳ ቆፖፋ፤ ጋሶይካ ኢዚ ሃ ኡሱፑን ላይላን ሚሻሰ ኦሊዛ ኣሲ ኦሊዛ ኦሶፔ ዳኮ ዳርሲዱ ኔሰ ኦሊዴሰ፤ ሃሳ ጊሻሰ ኔ ሃሳሶ ኦሊኮ ጎዳ ኔ ጸሳይ ኔ ኦሊዛ ኦሶ ኡባን ኔና ኣንጃና።

ሜሄ ባይራ

19 ነገሩ ኔ ሜሃፔኔ ኔ ዶርሳ ወዳፔ ባይራ ዬሌቴዳ ኣዴ ኡባ ጎዳ ኔ ጸሳሰ ዱማሳ፤ ኢሰታ ኣይኮሰካ ጎኤቶፋ፤ ሃሳሶካ ዶርሳ ወዳፔ ባይራ ዬሌቴዳይታ ኢሰኬካ ቃንጾፋ።

20 ነገሩ ኔሶ ኣሳይ ጎዳ ኔ ጸሳይ ዶሪዳሶሆን ጎዳ ኢንቴ ጸሳ ሲንሳን ላይላን ላይላን ሂይታ ሚቴ።

21 ጊዶ ኣቴን ኔ ያርሺዛ ሜሂታ ቦላ ዋሶይ ቤቴኮ፥ ሄሲካ ቶሆ ሲላ ዋይኮ ቆቄ፥ ቃሴካ ሃራ ኢታ ቦሪዛዚ ኢሰታ ቦላ ዱኮ ሃሳንታ ጎዳ ኔ ጸሳሰ ያርሾ ሺሾፋ።

22 ሄይታንታ ማላ ሜሂታ ሄን ኢንቴሶን ማናሰ ዳንዳዬታ፤ ዋጋይ ጊዛ ማላ ጌሻ ኣሰ ጊዱን ዋይኮ ቱና ኣሰ ጊዱን ጌኔሳ ኣሾኔ ጋራ ኣሾ ሚዛ ማላ ማና ዳንዳዬታ።

23 ጊዶ ኣቴን ኢሰታ ሱላ ሃላ ማላ ዋራ ጉሲቴ ኣቴን ሞፒቴ።

16

ፓዚጋ ባኣሌ

(ኬሳ 12:1-20)

1 ጎዳ ኢንቴ ጸሳይ ኢንቴና ኣቢቤ ኣጊናን ኦማርሳራ ጊብጾፔ ኬሲዴሰ፤ ሃሳ ጊሻሰ ኣቢቤ ኣጊናን ጎዳ ኢንቴ ጸሳ ፓዚጋ ባኣሌ ቦንቹቴ።

2 ጎዳ ኢንቴ ጸሳይ ባ ሱንሊ ጸይጌታና ማላ ዶሪዳሶን ኢንቴ ኢዛ ቦንቻና ማላ ኢንቴ ሜሄፔ፥ ዋይኮ ዶርሳፌ ኢሳ ፓዚጋ ባኣሌን ያርሾ ሺሺቴ።

3 ሄ ያርሾ ካላ ኢንቴ ሚዛ ዋዴ ኢርሾይ ኢዛን ጌሊዳ ካላ ሞፒቴ፤ ሃሳሶካ ካሴ ኢንቴ ኤሶን ጊብጾፔ ኬዚዛ ዋዴ ኦሶይሳ ማላ ላፑን ጋላሰ ጋካናሰ ኢርሾይ ኢዛን ጌሎንታ ዋዬ ኡኬላ

ሚቲ፤ ሄሲካ አንቲ ዳሮ ሜቶ በኢዲ ጊብጾ ቢታፌ ከዚዳ ጋላሳ አንቲና ቆፍሳና።

4 ላፑን ጋላሰ ጋካናሰ አንቲ ዳሬን አይ አሳ ከላንካ ኢርሾይ ደፖ፤ አንቲ ኮይሮ ጋላሳ ኦማርሰ ያርሾሰ ሹኪዳ አሾ ኡባይ ሄ ጋላሰ ሜቲቲ ዉራና ቤሴሰ።

5 አንቲ ፓዚጋ ያርሾ ጎዳ አንቲ ጸሳይ አንቲሰ ኢሚዛ አይ ካታማታንካ ጮ ሹኮፍቲ።

6 ጊዶ አቲን ጎዳ አንቲ ጸሳይ ባ ሱንላይ ጸይጌታና ማላ ደሪዳሶን ጸላ ሹኪቲ፤ ሹኪሼ ኣርሼይ ዉሊዛ ዋዴ አንቲ ካሴ ጊብጾፔ ከዚዳ ጋላሳዮኔ ሳቲዮ ናጊዲ ሹኪቲ።

7 ሄ ሹኪዳ አሾዛ ጎዳ አንቲ ጸሳይ ደሪዳሶን ጸጸ ሚቲ፤ ዋንቲላ ጋላሰ ጌዴ አንቲ ዲንካኔን ዲንካኔን ሰሚቲ።

8 ኡሱፑን ጋላሰ ኢርሾይ ኢዛን ጌሎንታ ኡኬል ሚቲ፤ ላፑንላ ጋላሰ ጎዳ አንቲ ጸሳሰ ጎይናናሰ ኢሲሶ ሺቂቲ፤ ሄ ጋላሰ አይ አሶካ አሶፍቲ።

ካላ ሺሾ ባኣሌ

(ኬሳ 34:22፤ ሌዌ 23:15-21)

9 አንቲ ካል ሺሻናሰ ኮይሮ ደሚዳ ጋላሳፌ ቢዲ ላፑን ሳሚንታ ኩሚል ቆዲቲ።

10 ሄሳፌ ጉዬ ጎዳ አንቲ ጸሳይ አንቲና ኣንጂዳ ከና አንቲ አንቲ ደሳን ኢሞታ ኤሂዲ ጎዳ አንቲ ጸሳሰ ካላ ሺሾ ባኣሌ ቦንቺቲ።

11 ሄሳን አንቲ አንቲ አቲማ ናይታራኔ አንቲ ማጫ ናይታራ፥ አንቲ አቲማ ኣይሌታራኔ ማጫ ኣይሌታራ፥ አንቲ ካታማን ዲዛ ሌዌታራኔ ቤቲ ኣሳታራ፥ አንቲ ጊዶን ዲዛ ዪኦታራኔ ኣሞኤታራ ኡባይ ጎዳ አንቲ ጸሲ ባ ሱንላ ጸይጌታና ማላ ደሪዳሶን ኡፋዬቲቲ።

12 ካሴ አንቲ ጊብጾን ኣይሌ ጊዲዳይሳ ዩሺ ቆፒዲ ሃይታ ዋጋታ ሎኤል ናጊቲ።

ዳሴ ባኣሌ

(ሌዌ 23:33-43)

13 አንቲ ካል ባሌፔ ጌልላዳፔ ጉዬ ቃሴካ ዋይኔ ጉሞኢዛሶሆፔ ኤኪዳፔ ጉዬ ላፑን ጋላሰ ጋካናሰ ዳሴ ባኣሌ ቦንቺቲ።

14 ሄሳን አንቱ፤ አንቱ አቱማ ናይታራኔ አንቱ ማጫ ናይታራ፤ አንቱ አቱማ አይሌታኔ ማጫ አይሌታራ፤ አንቱ ካታማን ዲዛ ሌዌታራኔ ቤቱ አሳታራ፤ አንቱ ጊዶን ዲዛ ዪኦታራኔ አምኤታራ ኡባይ ኡፋይቲቲ።

15 ጎዳ አንቱ ጸሳይ ዶሪዳሶን ላፑን ጋላስ ጋካናስ ኢዛስ ባኣሌ ቦንቹቲ፤ ጎዳ አንቱ ጸሳይ አንቱ ካላኔ አንቱ ኦሊዛ ኦሶ ኡባን አንቱና አንጃና፤ ኢዛን አንቱ ኡፋይታና።

16 አንቱ ቢታን ዲዛ አቱማ አስ ጊዲዳ ኡባይ ላይላን ሄዡቶ ፓዚጋ ባኣሌ ዋዴ፤ ካላ ሺሾ ባኣሌ ዋዴኔ ዳሴ ባኣሌ ዋዴ ጎዳ አንቱ ጸሳይ ኢዚ ዶሪዳሶ ኢዛ ሲንሐ ሺቆ፤ ባኣሌዛ ቦንቻና ዪሼ ኦኒካ ጮ ሚላ ኩሼ ጎዳ ሲንሐ ዮፖ።

17 ኢሲ ኢሲ አሲ ኤኪ ያና አምታይ ጎዳ አንቱ ጸሳይ ኢዛዴ አንጂዳ ኬና ጊዶ።

ጲሎ ፒርዳ

18 አንቱ ዛሬቲ ኡባይ ጎዳ አንቱ ጸሳይ አሚዛ ካታማታን ኡባን አንቱ ዳናታኔ ሃላቃታ ሱንሒቲ፤ ኢስቲካ አሳስ ጲሎ ፒርዳ ፒርዳቶ።

19 ፒርዳ ጌላሶፓ፤ አሳ አይፌሶ ቤያዳ ማዳ ፒርዶፋ፤ ባሌላፋ፤ ማጋንጾ ሞፓ፤ ጋሶይካ ማጋንጾይ አጾ ኤራንቻታ አይፌ ቆቂሴስ፤ ጲሎታ ቃላካ ቦኪሴስ።

20 አንቱ ሼምፖራ ፓጻ ዳና ማላኔ ጎዳ አንቱ ጸሳይ አንቱስ አሚዛ ቢታ አንቱ ላታና ማላ ጲሎኔ ሱሬ ፒርዳ ፒርዲቲ።

ኤቃ ጸሳታስ ጎይኖንታ ማላ አሚቲዳ ዋጋታ

21 ጎዳ አንቱ ጸሳስ አንቱ ያርሺዛሶ አቻን ሚላፌ ኦሴቲዳ አሼሪ ሚሰሌ ኤሶፍቲ።

22 ቃሴካ ጎዳ አንቱ ጸሳይ ኢዲዛ ጎይኖ ሹቾ ኤሶፍቲ።

17

1 አንቱ አንቱ ሜሄ ጋርሳፌ ዋሶይ ዋይኮ ፓጩይ ዲዛዝ ቦራ ጊዲን ዋይኮ ዶርሳ ጎዳ አንቱ ጸሳስ ያርሾ ሺሾፍቲ፤ ሄሲ ጎዳ አቻን ኢጼቲዳ ሚሻ።

2 አንቱ ጎዳይ አንቱስ አሚዛ ካታማታፔ ኢሲኔይን ዲዛ ማጫ ጊዲን አዴ ጊዲን ጫቆ ቃላ ሚንሒዲ ጎዳ አንቱ ጸሳ ሲንላን ኢታ ሚሽ ኦሊ ቤቲኮ።

3 ቃሴካ ታ አዛዙ ዩዲ አዲዲ ሃራ ጸሳታሰ ጎይኒኮ ወይኮ አርሼሰ፡ አገናሲኔ ጸሊንቴታሰ ጎይኒኮ፡

4 ሄይታንታ ማላ ሃኖታ ኢንቴ ሲዪኮ ሄ ዮኦዛ ፒልጊ ቆሪቴ፤ ሄሳ ማላ ኢታ ዮኦቲ ኢሰራኤል አሳ ጊዶን ኮሴቲዳይሲ ቱሙ ጊዲኮ፡

5 ሄ ኢታ ኦሴዳዴ ወይኮ ኦሴዳሮ ካታማ ጊዶፌ ጌዴ ሃራሶ ኤፊዲ ሹቻን ኩራኪ ወዲቴ፡፡

6 ሄሲካ ናሞኡ ማርካይ ወይኮ ሄቩ ማርካይ ኢዛዴ ቦላ ማርካቲዳፔ ጉዬ ጊዶ፤ ጊዶ አቲን ኢሲ አሲ ጸላ ማርካቲዳ ማርካን አይ አሲካ ሃይቆፎ፡፡

7 ማርካቲ ኮይሮቲዲ ሹቻን ጫዴቶ፤ ሄሳፌ ጉዬ ሃንኮ ዴሬ ኡባይ ጫዶ፤ ሄሳሶ ኦሴዲ ኢንቴ ጊዶፌ ኢታ ኡባ ዲጊቴ፡፡

ዴጾ ፒርዳ

8 ኢንቴ ኢንቴ ካታማታን ፒርዳናሰ ከሂ ዴዲዛ ሸምፖ ጊሻሰ ሸቂዛ ሞቶ፡ ሸቻ ሞቶ፡ ቃሴ፡ «ታሰ ቤሴሰ» ጊዛ አቆታ ሞቶ ጊዲንካ ዴንዲኮ ሄ ወዴ ጎዳ ኢንቴ ጸሳይ ዶሪዳሶ ኤሶን ኤሂቴ፡፡

9 ሌዌ ቆሞታፔ ቄሴ ጊዲዳይታሰኔ ሄ ወዴ ዳና ጊዲዲ ፒርዲዛይሳሰ ዮኦዛ ሸሺቴ፤ ሄ ዮኦዛ ኢሰቲ ፒርዴቶ፡፡

10 ጎዳይ ዶሪዳሶን ጊዲዲ ኢሰቲ ኢንቴሰ ፒርዲዛ ፒርዳ ማላ ኦሴቴ፤ ኢንቴ ፖላና ማላ ኢሰቲ ኢሚዛ አዛዞታ ናጌቲ ፖሊቴ፡፡

11 ኢሰቲ ኢንቴና ታማርሲዳ ዋጋኔ ፒርዳ ማላ ኦሴቴ፤ ኢሰቲ ፒርዲዳ ፒርዳፌ ሃዲርሲኔ ኡሻቾ ጎፒቴ፡፡

12 ጎዳ ኢንቴ ጸሳሰ ኦሴዛ ዳናሰ ወይኮ ቄሴሰ አዛዜቶንታ ኢዲዲ ኦቶሬቲዛ አሲ ዲኮ ሄሳዴይ ሃይቆ፤ ሄሳሶ ኦሴዲ ሄይታንታ ሚሳቲዛ ኢታ ሚሻታ ኡባ ኢሰራኤል ዴራ ጊዶፌ ዲጊቴ፡፡

13 ሄሳፌ ጉዬ አሲ ዉሪ ሄሳ ሲዪዲ ባባና፤ ናሞኦንሶ ሄሳ ማላ ኢታ ኦሶ ኦላናሰ ጸላና አሲ ዴና፡፡

ካዋ ካዋላና ኢሜቲዳ ዋጋ

14 ጎዳ ኢንቴ ጸሳይ ኢንቴሰ ኢሚዛ ቢታዮ ጌሊ ላቲዲ ሄን ዲሰ ዶሚዛ ወዴ፡ «ኦና ዩዪ አዲዳ ካዋቲሳታሰ ካወይ ዲዛይሳሶ ኦኒካ ኦሰ ካዋ ካዋላና» ጊኮ፡

15 አንቱ ካዋላናይ ጎዳ አንቱ ጸሳይ አንቱስ ደሪዳዴ ጊዲዳይሳ ኤሪቱ፤ ሄሲ አንቱ አሳ ጊደፌ ደሪቱዳይሳ ጊደፌ አቲን ሃራ ቢታ አስ አንቱ ቦላ ካዋሶፒቱ።

16 ሄ ካዋዚ ዳሮ ፓራ ባስ ሺሻናስ ቤሴና፤ ጎዳይ አሳይ ገብጼ ሲሞንታ ማላ አዛዚዳ ገሻስ ሄፔ ፓራ ሻማናስ አሳ ዬዶፎ።

17 ኢዛ ዋዚና ባሌፉንታ ማላ ካዋይ ፎራ ማቾ ኤኮፎ፤ ዋርቃኔ ቢራካ ዳርሲ ሺሾፎ።

18 ኢዚ ባ ካዋቱላ አልጋን ኡቲዛ ዋዴ ጸሳ ዋጋ ማጻፋ ሌዌ ቆሞ ጊዲዳ ቄሴታ ማታፔ ባስ ዱቂ ኤኮ።

19 ሄ ማጻፋዛ ባ ማታን ዋሊዲ ባ ዴኦ ላይላ ኡባን ናባቦ፤ ኢዚ ሂሰቲኮ ጎዳ ባ ጸሳ ቦንቾኔ ሄ ማጻፋን ጸፌቲዳ ዋጋታኔ ማራታ ኬሂ ናፔቲዲኔ አማኔቲዲ ፖሎ ታማራና።

20 ሂሰቲኮ ኢዚ ባ ዋዚናን፤ «ታኒ ታ ላጌታፔ አፋይስ» ጊዲ አስራኤሌ አሳ ቦላ ኦቶሬቲና፤ ጎዳ ባ ጸሳ ዋጋፔ ሃዲርሴኔ ኡሻቾ ጌና፤ ኢዚ ዳሮ ላይላ ካዋታና፤ ኢዛ ናይቲካ አስራኤሌ ቢታን ዳሮ ላይላ ካዋታና።

18

ቄሴታኔ ሌዌታ ጋኪዛ ጊሻ

1 ሌዌታፔ ቄሴቲኔ ቃሴካ ኩሜላ ሌዌ ቆሞቲ ሃንኮ አቲዳ አስራኤሌ አሳራ ቢታ ጊሼቲዛ ዋጋይ አስታስ ባይንዳ ጊሻስ አስቲ ጎዳስ ያርሻናስ ሺሺዛ ያርሾፌ ሚዲ ዴቶ።

2 አስታ ኢሻታ አስራኤሌ አሳ ጋርሳን አስታስ ጸንጾ ጋዴይ ደፖ፤ ኢዚ አስታስ አሚዳ ሂዶታ ቃላ ማላ ጎዳይ አስታስ ጸንጾ።

3 ዋፋኖ ጊዲን ዋይኮ ዶርሳ ያርሾስ ሺሺዛ ዋዴ ቄሴቲ ሚሳታ፤ ባንቂላታኔ ጋንጄታ ኤኬቶ።

4 አንቱ ካላፌ ጼራ፤ ዋይኔ ኡሻፌኔ ዋጋራ ዛይቲፔ ጼራ፤ ዶርሳ አስኬፌ ኮይሮ ቃንጹቲዳይሳ አስታስ አሚቲ።

5 ሚርናስ ቄሴቱላን ኦላና ማላ ሃራ ቆሞታ ጊደፌ ጎዳ አንቱ ጸሳይ ሌዌ ቆሞታ ባስ ደሪዴስ።

6 ሌዌ ቆሞታፔ ኢሲ አሲ ካሴ ባ ዲዛ አስራኤሌ ካታማፔ ጎዳይ ደሪዳሶ ባናስ ዳሮ አሞይ ኢዛስ ዲኮ፤

7 ቢዲ ሄን ካሴ ሃጋዚዛ ሌዌ ቆሞቲ ኦሊዛይሳ ኢዚካ ጎዳ ሲንላን ኦቶ።

8 ቃሴ ባ አዋ አቆ ባይዚን ባና ጋኪዳይሳ ኤኪዳ ጊዲኮካ ቄሴቲ ጎኤቲዛይሳ ኡባ ኢሰታራ ገና ገሼቲ ኤኮ።

አይዛቤታ ዋጋፔ ናጌታና ማላ አሜቲዳ ሴራ

9 ጎዳ አንቲ ጸሳይ አንቲሰ አሚዛ ቢታ አንቲ ጌሊዛ ዋዴ ሄ ቢታን ዲዛ ካዋቲላይ ኦሊዛ ቱና ኦሶ አላፍቲ።

10 ባ አቱማ ና ዋይኮ ማጫ ና ያርሾስ ጊዲ ታማን ጸጊዛ አይ አሰካ አንቲ ጊደን ዶፖ፤ ቢቲዛይ፤ ማራጩ ጸሊዛይ፤ ሙሬኒዛይ፤ ማርይ አንቲ ጊደን ዶፖ።

11 ቃሴካ ዳጋሚዛይ (ጎጂዛይ)፤ ዋይኮ ሞይቲሌ ጸይጊዛይ ዋይኮ ኢታ አያናታራ ሃሳይዛይ፤ ዋይኮ ሃይቂዳ አሳታ አያናራ ሃሳይዛይ አንቲ ጊደን ዶፖ።

12 ሄሳንታ ማላ ኦሊዛ አይ አሰካ ጎዳ ማታን ኢጾቲዳዴ፤ ኢሰቲ ሄሳ ማላ ቱና ኦሊዳ ገሻሰ ጎዳ አንቲ ጸሳይ ሄ ካዋቲላታ አንቲ ሲንላፌ ቶቃሊ ቆይሳና።

13 ጎዳ አንቲ ጸሳ ሲንላን ሙሌራ አንቲ አማኔቲዛይታ ጊዳናሰ ቤሴሰ።

ሙሴ ማላ ሲንላፌ ዴንዳና ናቤ

14 ሃ አንቲ ላታናሰ ቢዛ ቢታን ዲዛ ካዋቲላቲ ሙሬኒዛይቲ፤ ማራጩ ጸሊዛይቲ ዮቲዛይሳ ሲዪዛይታ። አንቲ ጊዲኮ ሄሳዳ ኦቶንታ ማላ ጎዳ አንቲ ጸሳይ አንቲና ዲጊዴሰ።

15 ጎዳ አንቲ ጸሳይ አንቲ ዛሬፔ ታ ማላ ናቤ ዴንላና፤ አንቲ ኢዚ አንቲሰ ዮቲዛይሳ ሲዪዲ አዛዜቲ።

16 አንቲ ሲና ዙማ ቦላ ሸቂዳ ዋዴ ጎዳ አንቲ ጸሳ፤ «ኑኒ ሃይቆንታ ማላ ጎዳ ኑ ጸሳ ጩንጉርሳ ዛሬ ሲዮኮ፤ ቃሴካ ሃ ዋልቃማ ታማካ ናሞኦንላ ቤኦኮ» ጊዲ ኦይቺዴታ።

17 ሄሳ ገሻሰ ጎዳይ ታሰ፤ «ኢሰቲ ኦይቺዛ ኦይቺይ ሊኬ» ጊዴሰ።

18 ታኒ ኢሰታ ዛሬታ ጊደፌ ኢሰታሰ ኔ ማላ ናቤ ዴንላና፤ ኢዚ ሃሳያና ቃላ ታ ኢዛሰ አማና፤ ታ አዛዚዛይሳ ኡባ ኢዚ አንቲሰ ዮታና።

19 ታ ሱንላን ዮቲዛ ሄ ናቤዛ ቃላ ሲዮንታ ኣሰ ታ ቃጸያና።

20 ጊደ አቲን ታ ኢዛ አዛዘንታ ጸላቴላን ታ ሱንላን የቲዛ ናቤይ ወይኮ ኤቃ ጸሳታ ሱንላን የቲዛ ናቤይ ሃይቆ።

21 እንቲ፡ «ናቤይ የቲዛ ቲንቢቲ ቃላይ ጎዳፔ ጊደንታይሳ ታ አዛን ሻካ ኤራኔ?» ጊ ኦይቻና ዳንዳዬታ።

22 ሄ ናቤዚ የቲዳይ ጎዳ ሱንላን የቲን ኢዚ የቲዳ ቃላይ ፖሌቶንታ አጊኮ ሄሲ ጎዳይ የቶንታይሳ ጊዲዳይሳ ኤሬታ፤ ሄ ናቤዚ ዋርዶ ሃሳይዳ ጊሻሰ ኢዛሰ ያየፍቴ።

19

እሲ ባቃቲ አቲዛ ካታማታ

(ታይ 35:9-28፤ ኢያ 20:1-9)

1 ጎዳ እንቲ ጸሳይ እንቲሰ አሚዛ ቢታን ዲዛ ካዎቴላታ ዳይሲዲ እንቲ ኢሰታ ካታማታኒኔ ኬላታን ዴኦ ዶሚዛ ወዴ፡

2 ጎዳ እንቲ ጸሳይ እንቲሰ ጸንጾ ኦሊዲ አሚዛ ቢታን ዲዛ ካታማታፔ ሄሹ ካታማታ እንቲሰ ሻኪቴ።

3 ጎዳ እንቲ ጸሳይ እንቲሰ ጸንጾ ኦሊዲ አሚዛ ቢታ ሄሹ ኬሲ ሻኪቴ፤ ሂሰቲዲ አሴ ወዲዳ እሲ ኦኒካ ሄ ካታማታፔ ኢሳን ባቃቲ አታና ማላ ሄ ኤፊ ጋሊዛ ኦኔ ጊግሰቴ።

4 እሲ እሲ ካሴ ኢዛራ ዋርኬቴሊ ባይንዳዴ ወዳና ጊ ቆፖንታ ዲንጋቴ አሰ ወዲኮ ሄሳይይ ካታማታፔ ኢሴኔይን ቢ ጌሊዲ ባ ሼዎፖ አሾ።

5 ሌሚሶሰ ናሞኡ አሳቲ ሚሐ ቃንጸና ቢዳሶን ኢሰቲ ሚሐ ቃንጸሺን ሚላ ቃንጸዛ ቤዪዴዚ ወይኮ ካልታዚ ቱቴዛፔ ቆፖንታ ኮሌቲ ቢዲ ኢዛራ ዲዛዴዛ ወዲኮ፡ ሄ ቤዪዴይ ኢዛ ኩሼፔ ኮሌቲ ቢ ወዲዳዴዚ ሄ ሄሹ ካታማታፔ ኢሲ ካታማዮ ቢ ጌሊ ባ ሼዎፖ አሾ።

6 ቆቴቲ አቲዛ ካታማይ ኤሶን ጋኬቶንታ ሃኮሶን ዲዛ ጊዲኮ ኦኔይ ኦዲቂዳ ጋሶን ሱሐ አዛሪዛዴይ ኬሂ ሃንቁቲዲ ጎዲ ጋኪዲ ሃይቃናሰ ቤሶንታይሳ ወዳናሰ ዳንዳዬሰ፤ ጋሶይካ ኢዚ ባ ሾር ወዲዳይ ዋርኬቴሊ ዲዛ ጊሻሰ ጊዴና።

7 እንቲ ሄሹ ካታማታ ዲማ ሻካና ማላ ታ እንቲና አዛዚዛይ ሄሳ ጊሻሳ።

8 ጎዳ እንቲ ጸሳይ ካሴ እንቲ አዋታሰ ጌሊዳ ሂዶታ ቃላ ማላ ኢዚ እንቲ ዛዋ አሲኮ፡

9 ሃኙ ታ እንቲና አዛዚዳይሳ ኡባ እንቲ ፖሊኮ፡ ጎዳ እንቲ ጸሳካ ሲቂኮ ቃሴ ኢዛ ኦኔን ቢኮ ኢዚ እንቲሰ ሃኖ ቢታዮ አሚዛ

ገሻሰ እሲ ኢሰታን ባቃቲ ቢዲ ኣታና ማላ ሃራ ሄቹ ካታማታ ጉጂ ገግሲቲ።

10 ኢንቲ ሄሳዕ ኦሊዛ ጋሶይካ ኢንቲ ኢዚን ዳና ማላ ጎዳ ኢንቲ ጸሳይ ኢንቲሰ ጸንጾ ሂሰቲ ኢሚዛ ቢታይን ጸሎ ሱሊ ጉኮንታ ማላኔ ኢንቲካ ሱላ ኣጮን ኦይሼቶንታ ማላሳ።

11 ጊዲኮካ እሲ እሲ ሞርኬቴላን ዳንዲዲ ጌማን ዛማዲ ኡቲዲ ቃጴታይ ባይንዳ እሰ ዋጂዳፔ ጉዬ ባ ሼምፖ ኣሻናሰ ሄ ካታማታፔ ኢሲኔይን ባቃቲ ቢኮ።

12 ኢዚ ዲዛ ካታማ ጨማቲ ኢዚ ባቃቲ ቢዳ ካታማፔ እሰ ኪቲ ኤሂሲዲ ሃይቂዳይሳ ሱላ ኣዛሪዛዴሰ ኣሊ ኢሜቶ።

13 ኢዛሰ ኣይኮካ ቃጴቶፍቲ፤ ኢንቲሰ ኡባ ሚሺ ሎኦ ጊዳና ማላ ሼምፖ ዋጂዛይታ ኢሰራኤሌ ጊዶፌ ጳይሲቲ።

ጳሰ ሾዳናሰ ቤሴና

14 ጎዳ ኢንቲ ጸሳይ ኢንቲሰ ኢሚዛ ጸንጾን ቤኒ ኣሳቲ ኢንቲሲኔ ኢንቲ ሾርሰ ጊዶን ኤሲዳ ዛዋ ሾዶፍቲ።

ማርካቴላስ ኢሜቲዳ ኣዛዞ

(ዛሬ 27:17)

15 እሲ ሞሪዳ ሞር ሻኪ ኤራናሰ እሲ ማርካይ ጸላ ጊዴና፤ ናምኡ ዋይኮ ሄቹ ማርካይ ማርካታና ቤሴሰ።

16 እሲ ኢታ እሲ ሃራ እሰ ዋርዶራ ሞቲኮ።

17 ናምኣቲካ ሄ ዋዴ ጎዳ ሲንላን ኦሊዛ ቄሴታ ሲንላኒኔ ፒርዲዛ ዳናታ ሲንላን ኤቄቶ።

18 ሄ ፒርዲዛይቲካ ሄ ዮኦዛ ሎኤሊ ፒልጊ ጸሎቶ፤ ሄ ማርካቲዛዴዚ ባ ኢሻዛ ቦላ ዋርዶራ ማርካቲዳይሲ ቱሙ ጊዲኮ።

19 ኢዚ ሄ ሞቶዛ ባ ኢሻ ቃጸይሳናሰ ቆፒዳ ቂጸቲዛን ባ ሁኤሰ ቃጸዬቶ፤ ሂሰቲዲ ሄሳ ማላ ኢታ ኦሊዛይሳ ኢንቲ ጊዶፌ ዲጊቲ።

20 ሂሰቲኮ ሃራ ኣሳይ ሄሳ ሲዬዲ ባሻና፤ ሄሳ ማላ ኢታ ኦሶይ ኢንቲ ጊዶን ኦሴቴና።

21 ሄሳ ማላ ኢታ ኦሊዛይታሰ ሙሌካ ቃጴቶፍቲ፤ ሼምፖ ዋጂዳዴ ዋጂቲ፤ ኣይፌ ቶይሲዳዴሰ ኣይፌ ቶይሲቲ፤ ኣቶ ሜንሊዳዴሰ ኣቶ ሜንሊቲ፤ ኩሼ ሜንሊዳዴሰ ኩሼ ሜንሊቲ፤ ቶሆ ሜንሊዳዴሰ ቶሆ ሜንሊቲ።

20

ኦላ አሳታሰ አሜቲዳ ዋጋ

1 እንቲ እንቲ ሞርኬታ ኦላና ቢሺን ፓራ-ጋሬቲኔ ቶጋ አሳቲ እንቲፌ ዳሮ ጊዲኮ ሄሳ ቤኢዲ ዳጋሞፍቲ፤ ጋሶይካ እንቲና ጊብጾፔ ኬሲዳ ጎዳ እንቲ ጸሳይ እንቲናራ ዲዛ ጊሻሰ ባቦፍቲ።

2 እንቲ ኦላ ዶማናፔ ሲንፋቲዲ ቄሴዚ ኦላ አሳኮ ሸቂዲ፤

3 «ኢሰራኤል አሳዉ! ሃ ኤዘጊቲ! እንቲ ሃች እንቲ ሞርኬታራ ኦሌታናሰ ቤታ፤ እንቲ ዋዚናይ ዳጋሞፎኔ ባቦፎ፤ ኢሰታ ሲንፋን ኮኮርፒቲኔ ሸርቶፒቲ።

4 ጎዳ እንቲ ጸሳይ እንቲ ሞርኬታ ኦላናሰ እንቲናራ ቢዛ ጊሻሰ ኢዚ እንቲና ጸኒሳና» ጎ።

5 ሄሳፌ ካሊዲ ኦላ አሳ ካሌሊዘይቲ ኦላንቻታሰ፡ «ኦራፋ ኬል ኬጺዲ ጌሎንታ ኣሲ እንቲ ጋርሳን ዲኮ ኢዚ ኦላሶ ቢ ሃይቂን ሃራ ኣሲ ኢዛ ኬፋን ጌሎንታ ማላ ባሶ ጉዬ ሲሞ።

6 ዋይኮ ዋይኔ ቶኪዲ ኢዛ ኣይፌ ሸሾንታ ኣሲ ዲኮ ኢዚ ኦላን ሃይቂን ሃራ ኣሲ ኢዛ ዋይኔ ኣይፌ ባሰ ሸሸዲ ኡፋዬቶንታ ማላ ኢዚ ባሶ ሲሞ።

7 ማች ኤካና ግባሲ ዋሊዳ ኣሲ ኦላን ሃይቂን ሃራ ኣሲ ኢዛ ኤኮንታ ማላ ኢዚ ባሶ ሲሞ» ጌቶ።

8 ኦላ አሳ ካሌሊዘይቲ፡ «ዋዚናይ ባቢዛ ኣሲ እንቲ ጋርሳን ዲኮ ሃንኮ ኦላ አሳ ዋዚና ሂርጊሶንታ ማላ ኢዚ ባሶ ሲሞ» ጌቶ።

9 ኦላ አሳ ካሌሊዘይቲ ሄሳ ዮቲ ወርሲዳፔ ጉዬ ኦላ አሳ ቡቲን ቡቲን ሻኪዲ ኢሲ ኢሲ ቡቲሰ ካሌሊዘይታ ዶሬቶ።

10 ኢሲ ካታማ ኦላናሰ ቢዲ እንቲ ኢሰታኮ ማቲዛ ዋዴ ኮይርቲዲ ሳርን ኢሰቲ ኩሼ ኢማና ማላ ኦይቺቲ።

11 ኢሰቲ እንቲና ሳርን ሞኪ ኤኪዲ ባንታ ጊምቤ ፔንጌ ዶይዲ እንቲና ጌልሊኮ ሄ ካታማን ዲዛ አሳይ ኡባይ እንቲሰ ሃጋዞኔ ዴጾ ኦሶ ኦሶ።

12 ጊዶ አቲን ሄ ካታማ አሳይ እንቲሰ ሳርን ባ ኩሼ ኢሞንታ ኢጺዲ እንቲናራ ኦሌታና ኮይኮ ኢሰታ ካታማ ዶዲቲ።

13 ጎዳ እንቲ ጸሳይ ሄ ካታማዮ እንቲ ኩሼን ኣሊ ኢሚዛ ዋዴ ሄ ካታማይን ዲዛ አቲማሳ ኡባ ዋዲቲ።

14 ጊዶ አቲን ማጫሳታኔ ጉፋ ናይታ፡ ማሄኔ ሄ ካታማይን ዲዛ አቆታ ኡባ እንቲሰ ዲኢ ኤኪቲ፤ ቃሴ ጎዳ እንቲ ጸሳይ እንቲሰ ኢሚዛ እንቲ ሞርኬታ አቆታ እንቲሰ ጎኤቲቲ።

15 ቃሴካ እንቴ ዲዛሶፔ ሃኪ ዲዛ ካታማታካ እንቴ ኦይኪዛ ዋዴ ሃይሳፌ ካሊዛይሳ ኦሊቴ።

16 ጎዳ እንቴ ጸሳይ እንቴስ ኣሊ ኢሚዳ ቢታ ቦላ ኣሳ እንቴ ኦሊ ኦይኪዛ ገዲኮ ኣሳ ኡባ ዋዲቴ።

17 ጎዳይ እንቴ ጸሳይ እንቴና ኣዛዚዳ ማላ ሂቲታ፥ ኣሞሬታ፥ ካናኔታ፥ ፓሪዜታ፥ ሂዌታኔ ያቡሴታ ኡባ ዋዲቴ።

18 እንቴ ሂሰቶንታ ኣጊኮ ኢሰቲ ባንታ ኤቃ ጸሳታስ ጎይኒዛ ቱና ኦሶ እንቴ ኦላና ማላ እንቴና ታማርሳና፤ ሄሳን ጎዳ እንቴ ጸሳ ቦላ ናጋራ ኦላና።

19 እንቴ ካታማ ኢይካናስ ዶዲ ዳር ጋላስ ኦሊቲሼ ጋምኢዛ ዋዴ ኢዛን ዲዛ ኣይፌ ኢሚዛ ሚላታ ኣይፌ እንቴ ማና ዳንዳይዛ ገሻሰ ኢሰታ ቃንጾፍቴ፤ ኢሰቲ ኣይፌ ኣይፊዛ ሚላፌ ኣቲን ኣሳራ ኦሊቲዛ ኣስ ገዴቴና፤ ሄ ዳምባን ዲዛ ሚላታ ቃንጾፍቴ።

20 ሃንኮ ኣይፌ ኣይፎንታ ሚላታ ገዲኮ ኢሰታ ቃንጾፊሊ ዬጊዲ ሄ ካታማያ ኩንዳና ጋካናስ ገደሊ ናጋና ዳንዳይታ።

21

እስ ዋዲዲ ኤሬቶንታ ገሚዳዴ ዳፋ

1 እንቴ ላታና ማላ ጎዳ እንቴ ጸሲ እንቴስ ኢሚዛ ቢታይን ኦኒ ዋዲዳኮ ኤሬቶንታ ኣሳ ኣሃይ ጮ ዳምባን ኩንዲ ቤቲኮ።

2 እንቴ ዳናቲኔ እንቴ ጨማቲ ቢዲ ኣሃዚ ዲዛሶፔ ዶሚዲ ሄ ሄራን ዲዛ ካታማታ ጋካናስ ዲዛ ሃሆቴላ ዋዴቶ።

3 ሄሳፌ ጉዬ ኣሃዚ ዲዛሶስ ማቲዛ ካታማይን ዲዛ ካሌሊዛይቲ ኦሶስ ጋኮንታ ቡር ቃምባራይ ኢዚ ሞርጌ ቦላ ዋዲንታ ኢሲ ኡሱ ዶሬቶ።

4 ሄ ኡሲዮ ሙሊካ ጎዬቲ ኤርንታሶ፥ ኣይ ኣታኪልቲይ ቶኬቲ ኤርንታሶኔ ጎጊዛ ሃሊ ዲዛ ሸባ ኤፊዲ ሄን ኡሳይ ሞርጌ ሚርቂ ሚንሱቶ።

5 ሂሰቲዲ ጎዳ እንቴ ጸሳይ ባ ሲንላን ኦላና ማላ፥ ባ ሱንላን ኣንጃና ማላ፥ ሞቶኔ ሸምፖ ዳፋ ጌሊዲ ሻኪ ፒርዳና ማላ ጎዳ እንቴ ጸሳይ ሌዌ ናይታፔ ዶሪዳ ቄሴቲ ኣሃዚ ዲዛሶ ማታ ቤቶ።

6 ሄሳፌ ጉዬ ኣሃዚ ዲዛሶ ማታን ዲዛ ካታማዮ ካሌሊዛ ጨማቲ ሞርጌ ሚርቂ ሚንሱዳ ኡሳይ ቦላ ባንታ ኩሼ ሚጮቴቶ።

7 ሂሰቲዲ፥ «ሃይሳ ኦ ዋዲቤኮ፤ ኦኒ ዋዲዳኮካ ኦ ቤዪቤኮ።

8 ጎዳወ! ኔኒ ጊብጾፔ ዋዛዳ ኬሲዳ ኔ ዴፊ ኢሰራኤሌ ናጋራ ወርሳ፤ ኦናካ ማራ፤ ሃይሳ ጉኪዳ ጸሎ ሱላ ገሻሰ ኦና ኦይቾፋ» ጌቶ።

9 እንቴ ጎዳ ሲንላን ሱሬ ሚሽ ኦሊዲ ጸሎ ሱሊ ጉኪዳ ናጋራ እንቴ ጊደፌ ዲጊቴ።

ዲኤቲ ዩዳ ማጫሳታፔ ማቾ ኤኮ ዎጋ

10 ኔ ሞርኬታራ ኔ ኦሌታናሰ ኬዚን ጎዳ ኔ ጸሲ ኢሰታ ኔ ኩሽን አሊ ኢሚን ኔ ኢሰታ ዲኢዳ ዎዴ፤

11 ሄ ዲኤቲዳይታ ጊደን ማላ ሎኦ ማጫሰ ዴማዳ ኢዞ ኔሰ ማቾ ኤካናሰ ኮይኮ፤

12 ኢዞ ኔኒ ኔሶ ኤሂኮ ኢዛ ባ ሁኤ ሜዴቱ፤ ቃሴ ባ ጸጉንሐ ኢሩ።

13 ካሴ ኢዛ ዲኤታ ያሼ ማይኢዳ ማይኦ ላሙ፤ ኢሲ አገና ጋካናሰ ኔሶን ኡታዳ ኦላን ሃይቂዳ ባ ኣይሴኔ ባ ኣዋሰ ዩኩ፤ ሄሳፌ ጉዬ ኢዞ ኔሰ ማቾ ኤካ።

14 ጉዬፔ ኔኒ ኢዚን ኡፋዬቶንታ ኣገኮ ኢዞ ኣንጃ ዬዳናሰ ዳንዳያሳ፤ ካሴ ኢዞ ዎልቃራ ኤኪዳይ ኔና ጊዲዳ ጊሻሰ ዛራዳ ባይዛናሴ ኣይሌ ማላ ቆዳናሰ ቤሴና።

ባይራ ናሰ ኢሜቲዳ ላታና ዎጋ

15 ኢሲ አሲ ናምኡ ማቾ ኤኪዲ ኢሰታፌ ኢሲኔዮ ዶሲዲ ኢሲኔዮ ኢጸኮ ሄ ናምኣቲካ ኢዛሰ ኣቱማ ናይታ ዬሊኮ ሄ ዬሌቲዳ ናይታፔ ባይራዚ ኢዚ ኢጸዛሪ ና ጊዲኮ፤

16 ኢዚ ባ ሃር ባ ናይታሰ ጊሺዛ ዎዴ ኢዚ ኢጸዛሪፔ ዬሌቲዳ ባይራ ናዛ ባይራቴላ ካፂዲ ባ ዶሲዛሪፔ ዬሌቲዳ ናዛሰ ማዲዲ አሊ ኢማናሰ ቤሴና።

17 ባይራ ናዚ ኢዚ ሲቆንታ ማቼይፌ ዬሌቲኮካ ኢዚ ኢዛሰ ኮይሮ ዬሎ ጊዲዳ ጊሻሰ ሃንኮ ናይታፔ ናምኡ ኩሼ አሊ ኢሚዲ ኢዚ ባይራ ጊዲዳይሳ ኤሪሶ።

ኣዛዜቶንታ ናይታሰ ኢሜቲዳ ዎጋ

18 ኣዋሲኔ ኣዩሰ ኣዛዜቶንታ ኢጲዲ ኢሰቲ ሙሪንካ ሲሞንታ ኢጲዳ ማካላንቻኔ ዎዚና ሙሜ ናይ ኢሰታሰ ዲኮ፤

19 ኣያኔ ኣዋይ ባንቲ ዲዛ ካታማታ ጋርሳን ጨማቲ ፒርዲዛሶ ኤኪ ቤቶ።

20 «ሃይሲ ኦ ናዚ ዎዚና ሙሜ፤ ማካላንቻ፤ ኦሰ ኣዛዜቴና፤ ማላቲሲኔ ሚሽ ጮ ጳይሴሰ» ጊ ጨማታሰ ዮቱቶ።

21 ሄ ካታማይን ዲዛ ኣቱማ ኣሳይ ኡባይ ኢዛ ሹቻን ጫዲ ዎዴቶ፤ እንቴ ሄሳሶ ሂሰቲኮ እንቴ ጋርሳፌ ኢታ ሚሺ ጳያና፤ ኢሰራኤሌ ዴሬን ዲዛይ ዉሪ ሄሳ ሲዩዲ ያያና።

ዲማ ዲማ ዋጋታ

22 ኢሲ ኢሲ ባ ኦሴዳ ጌታ ሞሮ ጋሶን ሚላ ቦላ ካቂቲ ሃይቃና ማላ ፒርዴቲኮ፡

23 ሚላ ቦላ ካቂቲ ሃይቂዳ ኢሲ ጸሲ ቃንጊዳዴ ጊዲዳ ጊሻሰ ኢዛ ኣሃይ ሚላ ቦላ ካቂቲ ኣቆፖ፤ ጎዳ ኢንቲ ጸሳይ ኢንቲሰ ኢሚዛ ቢታ ቱኒሶንታ ማላ ሃይቂዳ ኣሃዛ ሄ ጋላሰ ሞጊቲ፡

22

1 ኢሰራኤል ኣሳ ቦራይ ዋይኮ ዶርሲ ቆይዲ ዋራ ቢሺን ኢንቲ ዴሚኮ ጮኡ ጊ ኣቶፍቲ፤ ኢዛ ጎዳሰ ላጋ ኤፋ ኢማ፡

2 ጊዶ ኣቲን ማሃዴይ ዲዛሶይ ሃሆ ጊዲኮ ዋይኮ ሄ ማሃዴይ ኦናኮ ኔ ኤርንታ ኣጊኮ ማሄዛ ኔሶ ኤካዳ ባ፤ ማሃዴይ ኮዪሼ ዪኮ ኢዛይሳ ኢዛሰ ዛራ፡

3 ማይኦ ጊዲን ዋይኮ ሃሬ ጊዲን ዋይኮ ሃራ ኣይ ሚሺካ ኔ ባጋ ኢሰራኤል ኣሳፔ ቆይን ኔ ዴሚዳ ጊዲኮ ዛራዳ ኢዛዴሰ ኢማ፡

4 ኔ ባጋ ኢሰራኤል ኣሳሰ ሃሬይ ዋይኮ ቦራይ ኦጌን ኩንዲን ኔ ቤኢዳ ጊዲኮ ማዳዳ ዴንላ ኣቲን ቤኣሼ ዬጋ ኣቶፋ፡

5 ጎዳ ኢንቲ ጸሳይ ሄሳላ ኦሴዛይታ ኢጺዛ ጊሻሰ ማጫቲ ኣቱማሳታ ማይኦ፡ ኣቱማሳቲ ማጫሳታ ማይኦ ማይኦፊቶ፡

6 ኔ ኦጌ ቢሺን ካፎይ ባ ኬላን ሚላ ቦላ ዋይኮ ቢታ ቦላ ዬሊዳ ጪዬታ ዋይኮ ጵጵሌ ሃጳ ዲዛ ካፎ ኔ ዴሚዳ ካፎኖ ጪዬታራ ጋላ ኔሶ ኤፎፓ፡

7 ጪዬታ ኔሶ ኤካ ባናሰ ዳንዳያሳ፤ ኣዬኖ ጊዲኮ ኢዛ ፒራቆ ባና ማላ ዬዳ፤ ኔኒ ሄሳላ ኦሴኮ ኔሰ ሎኦ ጊዳናኔ ኔ ዳሮ ላይሰ ዳና፡

8 ኔ ኦራላ ኬሰ ኬጸሼ ሄ ኬላ ካራፔ ኢሲ ኩንዲዲ ሱላ ኣጮን ኔና ኦይሺሶንታ ማላ ኬላ ካራ ቦላ ቱቄ ዋላ፡*

9 ኔኒ ዋይኔ ሚላ ቶካሼ ኢዛ ጊዶን ሃራ ዜሬሰ ዜርፓ፤ ኔ ሃራ ዜሪኮ ዋይኔ ሚላ ኣይፊፔ ጊዲን ዋይኮ ሃራ ኔ ዜሮ ካላፊ ጎኤታናሰ ዳንዳያካ፡

10 ቦራኔ ሃሬ ኢሲፊ ኢሲ ቃምባራን ዋጸ ጎኖፓ፡

11 ሱፊፔኔ ፑቶፊ ዋላኬቲ ዳዴቲዳ ማይኦ ማይኦፋ፡

12 ኔ ማይኦና ማይኦሰ ኦይዱ ባጋራካ ማጫራ ሜቆ፡

21:23 ጋላ 3:13 22:4 ኬሳ 23:4-5 * 22:8 ኬላ ካራ ቦላ ቱቄ ዋላ ጊዛይሲ ኢሰራኤል ቢታን ኬሰ ኬጸሼ ኬላ ካራይ ቦላን ዴምባ ጊዲዳ ጊሻሰ ኢሲ ቦላፊ ኩንዲንታ ማላ ጋጸራ ቱቄ ዋላቲሰ፡ 22:9 ሉዌ 19:19 22:12 ታይ 15:37-41

ጌላኦቴላስ አሜቲዳ ዋጋ ናሳ

13 እሲ አሲ ማቸ ኤኪዳ ማላ እዚራ ኣቂ ሰሚዲ እዞ ኢጲኮ።

14 «ሃኖ ማጫሳዮ ኤካዲስ ሺን እዚስ ጌላኦቴላ ዋጋይ ባዋ» ጊዲ ዋርዶራ እዚ ሱንሉ ዋሪኮ።

15 ሄ ናዮ ዩሊዳይቲ ናያ ጌላኦ ጊዲዳይሳስ ማርካ ኤሂዲ ሄ ካታማን ዲዛ ጨማታ ቤሴቶ።

16 ናይ ኣዋይ አሰታስ፡ «ታኒ ታ ናዮ ሃይሳ ኣዳዛስ አማዲስ ሺን ሃኢ እዚ እዞ ኢጲዳይሳ ቆንጨሲዳስ።

17 «ኔ ናይስ ጌላኦቴላ ባዋ» ጊዲ ታ ናይ ሱንሉ ዋሪዳስ፤ ታ ናይስ ጌላኦቴላ ዲዛይሳስ ሃይሲ ማርካ» ጊዲ ሄ ዳሬ ካሌሊዛይታ ሲንላን እዚ እዞ ኤኪሺን ማይኦ ቦላ ጉኪዳ ሱላራ ዲዛ ማላታ ጫርቃዛ ቤሶ።

18 ሄ ካታማዮ ካሌሊዛይቲ ኣዳዛ ሸጪ ቃጸዬቶ።

19 ቃሴካ እዚ አሰራኤሌ ናይታፔ ጌላኦቴላራ ዲዛ አሲኔይ ሱንሉ ዋሪዳ ጊሻስ እሲ ጾቱ ሳቂሌ ቢራ ናይ ኣዋስ ማጋጮ ቃንጾ፤ ሄሳፌ ጉዬ ናያካ እዛስ ማቸ ጊዲ፤ እዚ ሽምፖራ ፓጻ ዲዛ ላይሳ ኡባን እዞ ኣንጂ ዩዳናስ ዳንዳዩና።

20 ጊዶ ኣቲን እዚ ጊዳይሲ ቱሙ ጊዲ ቤቲኮ ቃሴ እዛ ጌላኦ ጊዲዳይሳ ቆንጨሲዛ ማላታይ ባይንዳ ኣጊኮ።

21 እዛ ባ ኣዋ ሶን ዳሼ ላይማታዳ አሰራኤሌ ኣሳ ዩላቺዛ ኦሶ ኦሊዳ ጊሻስ እዞ እዚ ኣዋ ኬላ ካሬ ኤፌቶ፤ ሄ ካታማን ዲዛ ኣሳይ እዞ ሹቻራ ጫዲ ዋጾ፤ ሄሳሶ ሂሰቲዲ አንቴ ጊዶፌ ኢታ ሚሽ ዲጊቴ።

22 እሲ አሲ ሃራ ኣሳ ማቺራ ዚንኢ ቤቲኮ ናምኣይካ ሃይቄቶ፤ ሄሳሶ ሂሰቲዲ አንቴ ጊዶፌ ኢታ ሚሽ ዲጊቴ።

23 ኣይ ኣሲካ ካታማ ጊዶን ኣዚና ጌላና ጊጋ ኡቲዳ ጌላኦይራ ዚንኢዲ ቤቲኮ።

24 ናምኣታካ ሄ ካታማይፔ ካሬ ኬሲዲ ሹቻን ጫዲ ዋጲቲ፤ ጌላኦያ ካታማ ጊዶን ዳሼ፡ «ታና ኣሺቴ» ጋዳ ዋሶንታ ጊሻስ ሃይቃናስ ቤሴስ፤ ቃሴ ኣዳዚ ሃራ ኣሳራ ጊጋ ዲዛሪራ ዚንኢዲ ዋጋ ሜንሊዳ ጊሻስ ሃይቃናስ ቤሴስ፤ ሄሳሶ ሂሰቲዲ አንቴ ጊዶፌ ኢታ ሚሽ ዲጊቴ።

25 እሲ አሲ ሃራ ኣሳስ ጊጋ ኡቲዳ ጌላኦዮ እዛ ዲዛ ካታማፔ ሃራሶን ዳሚ ዋልቃሊዲ እዚ ጌላኦቴላ ኤኪዳ ጊዲኮ ሄሳይይ ጸላ ሃይቆ።

26 ናያ ሃይቆስ ጋሊዛ ናጋራ ኦሎንታ ጊሻስ ኢዞ ቦቾፍቲ፤ ሃይሳ ማላ ኦሶይ ኢሲ ኣሲ ጌኔራ ባ ላጌዛ ሸምፖ ዋጂዛይሳራ ኢሲ ጊና።

27 ሄሲካ ሄ ኣዳዚ ሃራ ኣሳስ ጊጌታ ኡቲዳ ጌላኦያ ባ ዲዛ ካታማፔ ካሬን ዲሺን ዳሚዲ ኢዞ ኦይኪዳ ጊሻሲኔ ኢዛ ዋሲዳኮካ ኢዞ ኣሻና ኣሲ ባይንዳ ጊሻሳ።

28 ኣይ ኣሲካ ሃራ ኣሳራ ጊጌቶንታ ጌላኦይራ ዚንኢሼ ኦይኬቲኮ።

29 ናይ ኣዋስ ኢቻሽ ታሙ ሳቂሌ ቢራ ቃንጺዲ ኢዞ ባስ ማቾ ሂሰቶ፤ ዋልቃን ኢዚራ ዚንኢዳ ጊሻስ ሃይቃና ጋካናሰካ ኢዞ ኣንጂ ዩዳናሰ ዳንዳዬና።

30 ኦኒካ ባ ኣዋ ማቾ ኤኪዲ ዋይኮ ኢዚራ ዚንኢዲ ባ ኣዋ ዩላሶፖ።

23

ጸሓ ኣሳራ ዲዛ ኢሲፊቲፋፊ ሻኪዛ ሃናታ

1 ሳንጌቲዳ ኣሲ ዋይኮ ቃራቲቲዳ ኣሲ ጎዳ ዴሬ ዱላታን ቤቶፎ።

2 ላጌሶን ዩሌቲዳይኔ ኢዛ ዜሬሊ ቢዲ ታማንሶ ጋካናሰ ጎዳ ኣሳ ሸቆን ጌሎፖ።

3 ኣሞኔኔ ሞኣቤ ዜሬፋቲ ዉሪካ ታማንሶ ዩሌታ ጋካናሰ ጎዳ ኣሳ ዱላታን ጌሎፔቶ።

4 ጋሶይካ ኢንቲ ጊብጾፔ ኬዚዲ ዩሺን ኢሰቲ ኢንቲና ካሊኔ ሃላ ዲጊዳ፤ ቃሴ ሜሰጴጾሚያ ቢታን ፓቶሬ ካታማን ዲዛ ቢኦሬ ና ባላሜይ ኢንቲና ቃንጋና ማላ ሚሻን ሻሚዳ።

5 ጊዶ ኣቲን ጎዳ ኢንቲ ጸሓይ ኢንቲና ሲቂዛ ጊሻስ ባላሜይ ቃንጊዛ ቃንጌላ ሲዩቤና፤ ኢዚ ቃንጊዳ ቃንጌላ ኣንጅን ላሚዳስ።

6 ሄ ዴሬ ኣሳቲ ዱሬቲዲ ሳሮን ዳና ማላ ኢሰታ ማዶፍቲ።

7 ኢሰቲ ኢንቲሰ ዳቦ ጊዲዳ ጊሻስ ኤዶሜ ኣሳ ካጂዲ ኢጾፍቲ፤ ቃሴ ኢንቲ ጊብጾ ቢታን ካሴ ቤቲ ጊዲዲ ዴኢዳ ጊሻስ ጊብጾ ኣሳታካ ኢጾፍቲ።

8 ኢስታ ዜሬሊ ሄሻንሉ ዩሌታፔ ዶሚዲ ጎዳ አሳ ሺቆን ዋላኬታና ዳንዳዬስ።

ኦላ አሳይ ዳንካኒ ኡቲዳሶ ጌሻቴላን ናጎ

9 አንቴ ኦላስ ኬዚዲ ዳንካኒ ኡቲዳሶሆን አንቴና ቱኒሲዛ ሚሻፌ ናጌቲቱ።

10 ኢሲ አሲ አማርሰ አጉሞራ ማላይ ኢዛ ቦላ ጉኪኮ አሲ ዲዛ ሄራፔ ሃራሶ ቢዲ ሄን ታኮ።

11 አማርሳ ዋዴ ባ ቦላ ሜጨቲዲ አርሼይ ዉሊሺን ካሴ ባ ዲዛሶ ሲሞ።

12 ሼሽ ኡቲዛሶ አንቴ ዲዛሶ ሄራፔ ካሬን ጊግሲቱ።

13 አንቴ ሼሽ ኡታናሶ ቦካናሲኔ ቢታ ዛሬ ካማናሰ ጎኢዛ ሚሽ አንቴ ኦላ ማሳራራ ጋሊ ኢሲፌ ኦይኪቱ።

14 ጋሶይካ ጎዳ አንቴ ጳሳይ አንቴና ናጋናሲኔ አንቴ ሞርኬታ አንቴ ኩሼን አሊ አማናሰ አንቴ ጉታ ጊዶን ሄሜቲቲዛ ጊሻሰ ኢዛ ሻቲዛ ሚሽ ቤኢዲ ጉዬ ሲሞንታ ማላ አንቴ ዲዛ ሄራይ ጌሽ ጊዳና ቤሴስ።

ዲማ ዲማ ዋጋታ

15 ባ ጎዳፔ ባቃቲዲ ኔኮ ዪዳ አይሌ ዛራዳ ኢዛ ጎዳሰ ኢሞፋ።

16 ኢዚ አንቴ ካታማታፔ ባ ኮዪዳሶን አንቴናራ ዴኦ፤ ኢዛ ኡንኤላፍቲ።

17 ኢሰራኤሌ አሳፔ ኦኒኔ አቱማ ጊዲን ዋይኮ ማጫ ጊዲን ኤቃ ጳሳታሰ ጎይኒዛይቲ ኦሊዛይሳ ማላ ላይማቶፔቲ።

18 ጎዳ አንቴ ጳሳይ ላይማ ኢጺዛ ጊሻሰ አዴ ጊዲን ዋይኮ ማጫሲ ላይማቲላን ዴሚዳ ሚሽ አዲና ጋሶ ጊዲ ጎዳ አንቴ ጳሳ ኬላ ኤሆፔቶ።

19 ኔ ዛሬ ጊዲዳ ኢሰራኤሌ አሳሰ ሚሼ፥ ካላ ዋይኮ ሃራ ሚሽ ታልኦዳ ዛራሼ ዲቶ ኤኮፋ።

20 ሃራ ቢታ አሳፔ ዲቻ ኤካናሰ ዳንዳያሳ፤ ጊዶ አቲን ኔ ባጋ ጊዲዳ ኢሰራኤሌ አሳሰ ዲቻሰ ታልኦፋ፤ ሂሰቲኮ ኔ ባዳ ላታና ቢታይን ጎዳ ኔ ጳሳይ ኔና ኡባ ባጋራካ አንጃና።

21 ጎዳ ኔ ጳሳሰ ኔ አማና ጋዳ አዲኔቲዳ ሚሽ ጋላናሰ ጋሞኦፋ፤ ኔ ጊዳ ቃላ ኔ ፖላና ማላ ጎዳ ኔ ጸሲ ኮዬሰ፤ ኔ አዲኔቲዳ ቃላ ጋሶንታ ኢጺኮ ሄሲ ኔሰ ናጋራ ጊዴሰ።

23:17 ሉዌ 19:29 23:20 ኬሳ 22:25፤ ሉዌ 25:36-37፤ ዛሬ 15:7-11

23:21 ታይ 30:1-16፤ ማቶ 5:33

22 ጎዳ ኔ ጸሳስ ኔ አማና ጋዳ አዲኔቶንታ አገሪክ ሄሲ ኔስ ናጋራ ጊዳና።

23 ጊዳ አቲን ጎዳ ኔ ጸሳስ ኔ ዶሳን አማና ጋዳ ኔ ጌሊዳ ማላ ኔ አንጻርሳፌ ኬዚዳይሳ ፖላ።

24 አሲ ቶኪዳ ወይኔ ሚላ ጊዳራ ካንላ ባሼ ኔ ኮዪዳ ኬና ኢዛፔ ማናስ ዳንዳያሳ፤ ጊዳ አቲን አይ ሚሻንካ ዬጋዳ ኔሶ ኤፎፓ።

25 አሳ ካላ ጊዳራ አቆ ባሼ ቲያፔ ጹጸ ማና ዳንዳያሳ፤ ጊዳ አቲን ማጸ ኤካዳ ኔሶ ቦፓ።

24

ማቾ አንጂ ዬዲዲ ሃራ ኤኮ ጊሻስ አሜቲዳ ዋጋ

1 ኢሲ አሲ ማቾ ኤኪ ሰሚዳፔ ጉዬ ኢዚ ቦላ ኢሲ ኢታ ሚሽ ዴሚዲ ኢዞ ኢጲኮ ኢዞ አንጂ ዬዲሼ ኢዚስ ዋራቃታ ጸፊ አሚዲ ዬዶ።

2 ኢዛሶፔ ኬዛዳ ሃራ አዚና ጌሊኮ።

3 ሄ ናምኣንሶ አዚናይካ ኢዞ ዶሶንታ ኢዲዲ ኢዚስ ዋራቃታ ጸፊ አሚዲ ባ ሶፔ ኢዞ ኬሲ ዬዲኮ። ወይኮ ኢዞ ኤኪዳ ሄ ናምኣንሶ አዚናዚ ሃይቁኮ፤

4 ኢዛ ቱኒዳ ጊሻስ ኮይሮ አንጂ ዬዲዳ አዚናዚ ናምኣንሶ ኢዞ ዛሪዲ ኤኮፎ፤ ሄሲ ጎዳ ማታን ኢጹቲዳይሳ፤ ቃሴ አንቲካ ጎዳ አንቲ ጸሳይ አንቲስ አሚዳ ቢታን ሃይሳ ማላ ናጋራ ኦሶፍቴ።

ዲማ ዲማ ዋጋታ

5 ማታ ዋዴ ማቾ ኤኪዳ አሲ ኦላስ ቦፖ፤ ሃራ ዴጸ ኦሶካ ኢዛ ኦሲሶፒቴ። ኢሲ ላይሊ አቆና ጋካናስ ባሶን ጋምኢዲ ባናኔ ባ ኤኪዳ ማቼኮ ኡፋይሶ።

6 ኔኒ ኢሳዴስ ሚሼ ታልኤ ታልኣሼ ካል ጋጪዛ ዋጸ ወይኮ ዋጸ ማይዴ ኢዛፔ ኦይሶ ኤኮፋ። ሄሳሶ ኦሶይ አሳ ሼምፖ ኦይሶራ ጊና።

7 ባ አሻ ጊዲዳ ኢሰራኤሌ አሳ ጋርሳፌ ቆንካ ባርሲ ኤፊዲ ባስ አይሌ ኦሊዛይ ወይኮ ሃራ አሳስ አይሌቴላስ አሊ ባይዚዛይይ ኦኒካ ሃይቆ። ሄሳሶ ሂስቲዲ ኢታ ኦሶ አንቲ ጊዳፌ ዲጊቴ።

8 ኢሳፌ ኢሳን አፄዛ ጋልባ ሃርጌፌ ኬሂ ናጌቲቲ፤ ታኒ ኢስታ አዛዚዳ ማላ ሌዌ ቆሞ ጊዲዳ ቄሴቲ ኢንቴስ አሚዛ ዋጋታ ሎኤሊ ናጌቲ።

9 ኢንቴ ጊብጾፔ ኬዚ ዩሺን ጎዳ ኢንቴ ጸሲ ማራሚ ቦላ ኦሊዳይሳ ዩሺ ቆጥቲ።

10 ኔኒ ኢሳዴስ ኢሲ ሚሼ ታልኤ አማሼ ኢዚ ኔና ኦይሊዛ ሚሽ ኤካናስ ኢዛዴ ሶ ጌሎፓ።

11 ኔኒ ካሬን ዲሺን ኢዛዴይ ባ ኩሼራ ኔስ ኦይሶ ኤሆ።

12 ኢዛዴይ ማንቆ ጊዲኮ ኔ ኦይሶ ኤካዳ ኢዛ አፋላ ኔ ሶን አይሶፋ።

13 ኢዚ ማይኢ አቃና ማላ አርሼይ ወሎንታ ዲሺን ኢዛስ ዛራ፤ ኢዚካ ኔና ጋላታና፤ ሄሲ ኔስ ጎዳ ኔ ጸሳ አቻን ጸሎቴላን ቆዴታና።

14 ኔ ባጋ ጊዲዳ ኢስራኤል አሳፔ ጊዲን ወይኮ ሃራ ዴሬፔ ቤቴ ዩዲ ማቶቲዳ ማንቆ አሲ ኔስ ኦሊኮ፤ ኢዛዴ ዋልቃ ጮ ማላ ኔስ ጎኤቶፋ።

15 ኢዚ ሃች ኦሊዳይሳ ሃች ኤካናስ ሚንሊ ኮይዛ ጊሻስ አርሼይ ወሎንታ ዲሺን ቃንጾ፤ ሂሰቶንታ አጊኮ ማቶታንቻይ ኔፔ ዴንዶይሳን ጎዳስ ዋሲኮ ኔስ ናጋራ ጊዳና።

16 ናይቲ ሞሪዳ ሞሮን ዩሊዳይቲ፤ ቃሴ ዩሊዳይቲ ሞሪዳ ሞሮን ኢስታ ናይቲ ሃይቆን ቃጸዬታናስ ቤሴና፤ ኢሶይ ኢሶይ ባ ሞሪዳ ሞሮዛ ጊሻስ ሃይቆን ቃጸዬቶ።

17 ሃራ ቢታ አሳታሲኔ ዩኦ ናይታስ ፒርዳ ጌላሶፓ፤ አምኤይ ማይኦ ኢዛ ታልኤ ኤኪዳ ሚሻ ጊሻስ ጋዳ ኦይሶ ኤኮፋ።

18 ካሴ ኢንቴ ጊብጾ ቢታን አይሌቴላን ዴኢዳይሳኔ ኢንቴ ጎዳ ጸሳይ ኢንቴና ዋዚ ኬሲዳይሳ ዩሺ ቆጥቲ፤ ታኒካ ሃይታ ሃ አዛዙታ ኢንቴስ አሚዛይ ሄሳሳ።

19 ኔኒ ማጺዳ ካላ ሺሺን ባሌቲ ጉዬ አቲዳ ሚርቄይ ዲኮ ኢዛ ኤካናስ ጉዬ ሲሞፋ፤ ሄሳ ሃራ ቢታፌ ዩዳ ቤቴ አሳታሰ፤ ዩኦታሲኔ አምኤታስ ሄን አጋጋ። ኔ ሄሳላ ኦሊኮ ኔ ኦሊዛ ኦሶ ኡባን ጎዳ ኔ ጸሳይ ኔና አንጃና።

20 ኔኒ ዋጋራ ሚላ አይፌ ኢሲቶ ማጺዳፔ ጉዬ ጌዶን አቲዳይሳ ኤካናስ ናሞኦንላ ጉዬ ሲሞፋ። ሄሳ ሃራ ቢታፌ ቤቴ ዩዳይታሰ፤ ዩኦ ናይታሲኔ አምኤታስ አጋጋ።

24:8 ሌዌ 13:1-14:54 24:9 ታይ 12:10 24:13 ኬሳ 22:26-27

24:15 ሌዌ 19:13 24:16 2ካዎ 14:6፤ 2ታሪ 25:4፤ ሂዚ 18:20 24:18

ኬሳ 23:9፤ ሌዌ 19:33-34፤ ዛሬ 27:19

21 ኔኒ ዋይኔ ሚላ አይፌ ኢሲቶ ማጺዳፔ ጉዬ ጌደን አቲዳይሳ ኤካናሰ ናሞኣንላ ጉዬ ሲሞፋ፤ ሄሳ ሃራ ቢታፌ ቤቴ ዩዳይታሰ፡ ዩኦ ናይታሰኔ ኣሞኤታሰ ኣጋጋ።

22 ኔካ ካሴ ጊብጼ ቢታን አይሌ ጊዲዳይሳ ባሎፓ፤ ታኒካ ሃይታ ሃ ኣዛዞታ ኢንቴሰ ኢሚዛይ ሄሳሳ።

25

1 ናሞኤ አሳቲ ባ ጋርሳን ፓላሜቲዲ ፒርዳሶ ቢኮ ቆሄቲዳይሳ ኔ ጸሎ፤ ቆሃዳይሳ፡ «ኔ ዋርዶ» ጊዲ ፒርዲዛይቲ ፒርዳቶ።

2 ቆሃዳይሲ ጋራፌቲ ቃጸዩታናሰ ቤሲዛ ጊዲኮ ፒርዲዛይቲ ኢዚ ዛቁሊዲ ጋራፌታና ማላ ኣዛዜቶ፤ ሄሳፌ ጉዬ ሞራንቻይ ፒርዲዛይታ ሲንላን ባ ሞሮ ኬና ጋራፌቶ።

3 ኢዚ ኦይዱ ታሙቶ ሾጩቶ ኣቲን ሄሳፌ ኣቶ ሾጩታናሰ ቤሴና፤ ሄሳፌ ቦላራ ጋራፌቲኮ ኔ ኢሻዚ ኔ ሲንላን ካዉያና።

4 ካል ቦራን ቡካሼ ቡኪዛ ቦራ ዶና ቃቾፋ።

ና ዩሎንታ ሃይቂዳ ኢሻሰ ኦላና ቤሲዛ ዋጋ

5 ኢሲፌ ዳኢዛ ኢሻንታፌ ኢሶይ ና ዩሎንታ ሃይቂኮ ኢዛ ማቻ ካሬ ባዳ ኣላጋ ኣሰ ጌሉፑ፤ ኢዚ ኣዚና ኢሻይ ኢዞ ላቲዲ ኢዚሰ ኮሺዛ ኡባ ኩንሉ።

6 ቃሴካ ኢሰታፌ ዩሌቲዳ ኮይሮ ናይ ኢሰራኤሌ ቢታን ሃይቂዳዳ ሱንላይ ቆዮንታ ማላ ካሴ ሃይቂዳ ኢሻሰ ና ጊዶ።

7 ጊዶ ኣቲን ኢዚ ባ ኢሻ ማቼዮ ኣይሳናሰ ኮዮንታ ኣጊኮ ኢዛ ካታማ ፔንጌን ኡቲዳ ጨማታኮ ባዳ፡ «ታ ኣዚና ኢሻይ ባ ኢሻ ሱንላ ኢሰራኤሌን ዳኣና ማላ ኮዩቤና፤ ታና ኤኪኬ ጊዲ ታሰ ኮሺዛ ሚሽ ኩንሉንታ ኢጺዴሰ» ታዳ ማጋኑ።

8 ሄሳፌ ጉዬ ሄ ካታማዮ ካሌሊዛ ጨማቲ ኣዴዛ ባኮ ጴይጊዲ ኢዛ ኦይቼቶ። ኢዚ ሃኢካ ማጫሳዮ ኤኮንታ ኢጺኮ።

9 ሄ ሃይቂዳይሳ ማቼያ ሄ ካታማዮ ካሌሊዛ ጨማታ ሲንላ ሺቃዳ ሄ ኣዴዛ ቶሆፔ ኢሲ ጫማ ሾዳዳ ኢዛ ኣይፌሶን ጩቶ ጩታዳ፡ «ባ ኢሻሰ ዜሬሊ ዳኣና ማላ ኮዮንታ ኣሳ ቦላ ሃይሳ ማላ ካዉሻቴሊ ጋካናሰ ቤሴሰ» ጉ።

10 ሄ አዳዛ ዛሬይ ኢስራኤል አሳ ገደን፥ «ኢዛ ቶሆፔ ጫማይ ሾዴቲዳዴ ሶ አሳታ» ጌቴቲ ካዉሻን ዴይጌቴሼ ዴኣና።

ሃራ አዛዘታ

11 ናምኡ አሳቲ ዋዴቲሺን ኢስታፌ አሳ ማቼያ ያዳ ባ አዚና አሻናሰ ባ ኩሼ ዬዳዳ ሃንኮይሳ አቱማቴላ ኦይኪኮ፥

12 ሄ ማጫሳይ ኩሼይ ማርይ ባይንዳ ቃንጾቶ።

13 አሰ ባሌላናሰ ጌታኔ ጉል ጌዲዳ ናምኡ ቆሞ ጌዳራ ሚሺ ኔ ማታን ደፖ።

14 አሰ ባሌላናሰ አዲሴኔ ቃንል ጌዲዳ ናምኡ ቆሞ ዋዳ ሚሺ ኔ ሶን ደፖ።

15 ጎዳ ኔ ጸሳይ ኔሰ ኢማና ቢታይን ኔኒ አዲሳ ዋዴ ዴኣና ማላ አማንሊዛኔ ሊኬ ጌዲዳ ጌዳራ ሚሺኔ ዋዳ ሚሺ ኔሰ ደ።

16 ጌዳራ ሚሻኒኔ ዋዳ ሚሻን ዋርዶራ አሰ ባሌሊዛ አሳታ ኡባ ጎዳ ኔ ጸሳይ ኢዴሰ።

አማሌቄታ ዋዳናሰ ኢሜቲዳ አዛዘታ

17 ኢንቴ ጌብጾ ቢታፌ ኬዚ ቢሺን አማሌቄ አሳይ ኢንቴ ቦላ ጋሊዳ ቆሆዛ ባሎፒቴ።

18 ኢስቲ ጸሳሰ ያዮንታ አሳ፤ ኢንቴ ኦጌን ኢንቴናራ ኤቄቲዳ፤ ኢንቴ ሄሜቲሺን ዳቡርዲ ጉዬ አቲዳ አሳ ኡባ ዋዳዳ።

19 ሄሳ ጌሻሰ ጎዳ ኢንቴ ጸሳይ ሄ ቢታዮ ኢንቴና ላቲሲዲ ኢንቴና ዩዩ አዲዳ ኢንቴ ሞርኬታ ኡባፌ ሽምፒሲዛ ዋዴ አሲ ኢስታ ቢታ ቦላ ዛሪ ቆፖንታ ማላ አማሌቄ አሳ ዉርሳ ዳይሳ፤ ሄሳ ሙሊካ ባሎፓ።

26

አስራታኔ ዴራ

1 ጎዳ ኔ ጸሳይ ኔና ላቲሳና ቢታዮ ኔ ጌላ ኡቲዛ ዋዴ፥

2 ጎዳ ኔ ጸሳይ ኔሰ ኢሚዛ ቢታን ሞኪዳ ካል ኡባፌ ዴራ ኬሼራ ጎዳ ኔ ጸሳይ ባ ሱንሊ ሄሳን ዴይጌታና ማላ ደሪዳሶ ኤካ ባ።

3 ሂስታዳ ሄ ዋዴን አዋቴላን ኦሊዛ ቄሴዛኮ ባዳ፥ «ጎዳ ኔ ጸሳይ ኔሰ ኢማና ጌዲ ካሴ ኑ አዋታሰ ጫቂዳ ቢታዮ ታ ጌሊዳይሳ ኔ ጎዳ ሲንላን ሃች ማርካታይሰ» ጋ።

4 ቄሴዚካ ካላራ ዲዛ ኬሼዛ ኤኪዲ ጎዳ ኔ ጸሳሰ ያርሾ ሺሺዛሶዛሰ ሲንላ ባጋን ዋሶ።

5 ሄሳፌ ጉዬ ኔኒ ጎዳ ኔ ጸሳ ሲንላን፡ «ታ አዋይ ካሴ ጮ ዩዩ ዩዩ ዲዛ አራሜ ዴሬ አሳ፤ ኢዚ ቆዳን ጉላ አሳታራ ገብጾ ዋጂዲ ዴኢሼ ሄን ገታ ዋልቃማኔ ቆዳን ጮራ ካዋቲል ገዲዴሰ።

6 ገብጾ አሳይ ገዲኮ ኑስ ሜቄል አቲዲ ኑና ኡንኤሊዳኔ ዴጾ ኦሶ ኑ ሶላ ጫኒዳ።

7 ሂሰቲን ኑኒ ጎዳ ኑ አዋታ ጸሳኮ ዋሲዶሰ፤ ኢዚካ ኑ ዋሶዛ ሲዩዲ ኑ ዋዬዛ፡ ኑ ዳቡራዛኔ ኑኒ ቆሂቲዳይሳ በኢዴሰ።

8 ሂሰቲዲ ጎዳይ ባ ዋልቃማ ቄሴኒኔ ባ ሚጨቲዳ ኩሼን፡ ገታ ዳጋማን፡ ማላታኒኔ ማላሊሲዛ ኦራላ ሚሽ አሊዲ ገብጾ ቢታፌ ኑና ኬሲዴሰ።

9 ኑና ሃ ሃይሳ ኤሂዲ ሃኖ ማሊኔ ኤሲ ኢዚን ኩሚዳ ሞቆ ቢታዮ ላቲሲዴሰ።

10 ሄሳ ገሻሰ ሄኮ ታኒካ ኢዚ ታሰ አሚዳ ጋዴን ካጺዳ ካላፌ ጴራ ኢዛሰ ኤካ ያዲሰ» ጋዳ ኬሼዛ ዋላዳ ጎዳ ኔ ጸሳ ሲንላን ሆካ ጎይና።

11 ኔሴኔ ኔ ሶ አሳሰ ጎዳ ኔ ጸሳይ አሚዳ ሎኦ ሚሻን ኡፋዬቲዲ ጎዳ ጋላቲቲ፤ ሌዌቲኔ አንቴ ገደን ዴኢዛ ቤቲ አሳቲ ኡባይካ አንቴናራ ኡፋዬቲቶ።

12 አሰራታ ኬሲዛ ሄቫንሶ ላይላን ላይላን ሞኪዳ ካል ኡባፌ አሰራታ ኬሳ ወርሲዳፔ ጉዬ ኔ ካታማን ዴኢዛ ሌዌታሰ፡ ቤቲ አሳታሰ፡ ዩኦታሲኔ አምኤታሰ ኔ ካታማን ኢሰቲ ካሊ ማና ማላ አማ።

13 ሄሳፌ ጉዬ ጎዳ ኔ ጸሳ ሲንላን፡ «ኔ አዛዚዳ ማላ ታኒ ታሶፔ ኔሰ ዲማቲዳይሳ ሌዌ ቆሞታሰ፡ ቤቲ አሳታሰ፡ ዩኦታሲኔ አምኤታሰ አማዲሰ፤ ታኒ ኔ አዛዘታፔ ኢሲኖካ ሜንላቤኬ፤ ቃሴ ኢሲኖካ ዶጋ አጋቤኬ።

14 አሲ ሃይቂን ካዮታሼ ኢዛፔ ማቤኬ፤ ታኒ ጌዮንታ ዳሼ ኢዛፔ አይኮካ ማቤኬ፤ ሃይቂዳ አሳ ገሻሰ ሺቂዛ ያርሾሰካ ኢዛፔ አይኮካ ሺሻቤኬ። ታኒ ጎዳ ታ ጸሳሰ አዛዘታዲሰ፤ ቃሴ ኔኒ ታና አዛዚዳ ኡባ ፖላዲሰ።

15 ኔኒ ሳሎን ዴኢዛ ጌሻ ሶሆፔ ሃ ዴጌ ጴላ፤ ኔ ዴሬ ኢሰራኤሌኔ ካሴ ኑ አዋታሰ ኔ አማና ጋዳ ጫቂዳ ማላ ኑሰ አሚዳ ሃ ማሊኔ ኤሲ ጎጊዛ ቢታዮ አንጃ» ጋ።

ጸሳሰ ዲማቲዳ ዴሬ

16 ጎዳ ኔ ጸሳ ዋጋታኔ ማራታ ኔ ናጋና ማላ ሄኮ ሃች ኔና አዛዚዳስ፤ ሄሳ ጊሻስ ኔኒ ኩሜላ ሼምፖጌኔ ኩሜላ ዋዚናፔ ናጋ።

17 ጎዳይ ኔስ ጸሳ ጊዲዳይሳ ኔ ኢዛ ኦጌን ባናይሳ፥ ኢዛ ዋጋ፥ ኢዛ አዛዘታኔ ኢዛ ማራ ኔኒ ፖላናይሳ ሃች ኤሪሳዳሳ።

18 ቃሴ ጎዳይካ ባ ጌሊዳ ቃላ ማላ ኔኒ ኢዛስ ዲማ አስ ጊዲዳይሳ፥ ኢዛስ ጸንጾ ጊዲዳይሳኔ ኔኒ ኢዛ አዛዘ ኡባ ናጋናይሳ ኤሪሳዳስ።

19 ኔኒ ሄሳ አሊኮ ኢዚ ሜጲዳ አሳ ኡባፌ ቦላራ ጋላታን፥ ሱንላንኔ ቦንቸን ጌታ ካዋቴላ ኦላና፤ ኢዚ ጌሊዳ ጫቆ ቃላ ማላ ኢዛስ ዲማ ዳሬ ኦላናይሳ ኔስ ኤሪሳዳስ።

27

ሎቻ ሹቻታ ቦላ ጸፊቲዳ ጸሳ ዋጋታ

1 ሄሳፌ ጉዬ ሙሴይ ኢስራኤሌ አሳ ካሌሊዛይታራ ዳሬዛስ፥ «ታኒ ኢንቴስ ሃች አሚዛ አዛዘታ ኡባ ናጌቴ።

2 ኢንቴ ዮርዳኖሴ ሻፋ ፒኒዲ ጎዳ ኢንቴ ጸሳይ ኢንቴስ አሚዛ ቢታዮ ጌሊዛ ዋዴ አማርዳ ጌታ ሹቻታ ኤሲዲ ኢስታ ኖራ ቲዪቴ።

3 ካሴ ጎዳ ኢንቴ አዋታ ጸሳይ ኤሲኔ ማሊ ኩሚዳ ቢታዮ ኢንቴስ አማናስ ጫቂዳ ቃላ ማላ ሄ ቢታዮ ኦይካናስ ኢንቴ ፒኒዳ ዋዴ ሃ ዋጋ ቃላታ ሎቻ ሹቻታ ቦላ ጸፍቴ።

4 ኢንቴ ዮርዳኖሴ ሻፋ ፒኒዲ ታ ኢንቴና ሃች አዛዚዳ ማላ ሄ ሹቻታ ኤባሌ ዙማ ቦላ ኤሲዲ ኢስታ ቦላ ኖራ ቲዪቴ።

5 ሄን ጎዳ ኢንቴ ጸሳስ ቢራታይ ቦቸንታ ሹቻታ ኤኪዲ ያርሾ ያርሺዛሶ ጊግሲቴ።

6 ጎዳ ኢንቴ ጸሳስ ያርሾ ያርሺዛሶ ማሴቶንታ ሹቻፌ ኦሊዲ ኢዛ ቦላን ጎዳ ኢንቴ ጸሳስ ጸጌቲ ሺቂዛ ያርሾ ሺሺቴ።

7 ኢሲፌቴላ ያርሾ ሺሺዲ ሄን ጎዳ ኢንቴ ጸሳ ሲንላን ኡፋዬቲሼ ሚቴ።

8 ሄ ሹቻታ ቦላ ጸሳ ዋጋታ ኡባ ናባቤታና ማላ ቆንጨሲ ጸፍቴ» ጌ አዛዚዳስ።

9 ሙሴይካ ለዌ ቆሞታ፤ ቄሴታራ ገዲዲ ኢሰራኤል አሳ ኡባሰ፡ «ኢሰራኤል አሳዉ ታኒ ገዛይሳ ዎዚናን ዋላ ሲያ፤ ሄኮ ሃቕ ኔኒ ጎዳ ኔ ጸሳ ዳሬ ገዳዳሳ።

10 ሄሳ ገሻሰ ታኒ ኔሰ ሃቕ ኢሚዛ አዛዞታኔ ዎጋታ ኔ ዉርሳ ናጋዳ ጎዳ ኔ ጸሳ ቃላሰ አዛዜታ» ገዴሰ።

አዛዜቱል ኢጶይ ኤሂዛ ቃንጌል

11 ሄ ጋላሰ ሙሴይ ኢሰራኤል ዳራ ሂዝጊ አዛዚዳሰ፡

12 «አንቱ ዮርዳኖሴ ፒኒዳፔ ጉዬ ዳሬዛ አንጃናሰ ጋሪዛኔ ዙማ ቦላ ኤቃናሰ ቤሲዛይቲ ሲሞና፡ ሌዌ፡ ዩሁዳ፡ ዩሳኮሬ፡ ዮሴፌ ቆሞታኔ ቢኒያሚ ቆሞታ።

13 ዳሬዛ ቃንጋናሰ ኤባሌ ዙማ ቦላ ኤቃናሰ ቤሲዛይቲ ኦርቤሌ፡ ጋዴ፡ አሴሬ፡ ዛቢሎኔ፡ ዳኔ ቆሞታኔ ኒፍታሌሚ ቆሞታ።»

14 ሌዌ ቆሞቲ ባ ቃላ ቶቁ ሂሰቲዲ ሃይሳፌ ካሊዛ ቃላ ኢሰራኤል አሳ ኡባሰ ጌቶ።

15 «ጎዳይ ኤቃ ጸሳታሰ ጎይኖ ኢጲዛ ገሻሰ፡ ሚላፌ ማሲዲ ሹቻፌ ቆጲዲኔ ቢራታ ሴሪሲዲ ኤቃ ጸሰ ገገሲዲ ጌማን ጎይኒዛዴይ ኦኒካ ቃንጌቲዳዴ ገደ!» ዳሬዚ ዉሪካ፡ «አሚን!» ጎ።

16 «ባ አዎ ዎይኮ ባ አዮ ካዉሺዛዴይ ቃንጌቲዳዴ ገደ!» ዳሬዚ ዉሪካ፡ «አሚን!» ጎ።

17 «ዳሰ ሹዲዛዴይ ዉሪ ቃንጌቲዳዴ ገደ!» ዳሬዚ ዉሪካ፡ «አሚን!» ጎ።

18 «ቆቁ አሰ ሃዲርሳ ኦጌ ካሌሊዛ ኡባይ ቃንጌቲዳዴ ገደ!» ዳሬዚ ዉሪካ፡ «አሚን!» ጎ።

19 «ቤቱ አሳታ፡ ዩኦ ናይታኔ አምኤታ ፒርዳ ጌላሲ ፒርዲዛ ኡባይ ቃንጌቲዳዴ ገደ!» ዳሬዚ ዉሪካ፡ «አሚን!» ጎ።

20 «ባ አዎ ማቺራ ዚንኢዲ ባ አዎ ቦንቾ ካዉሺዛ ኡባይ ቃንጌቲዳዴ ገደ!» ዳሬዚ ዉሪካ፡ «አሚን!» ጎ።

21 «አይ ሜሄራካ ፓራቲዛዴይ ቃንጌቲዳዴ ገደ!» ዳሬዚ ዉሪካ፡ «አሚን!» ጎ።

22 «ባ ሚቺይራ ዎይኮ ባ አዩ ናይራ ዎይኮ ባ አዎ ናይራ ዚንኢዛ ኡባይ ቃንጌቲዳዴ ገደ!» ዳሬዚ ዉሪካ፡ «አሚን» ጎ።

27:12 ዛሬ 11:29፤ ኢያ 8:33-35 27:15 ኬሳ 20:4፤ 34:17፤ ሌዌ 19:4፤26፤

ዛሬ 4:15-18፤ 5:8 27:16 ኬሳ 20:12፤ ዛሬ 5:16 27:17 ዛሬ 19:14

27:18 ሌዌ 19:14 27:19 ኬሳ 22:21፤ 23:9፤ ሌዌ 19:33-34፤ ዛሬ

24:17-18 27:20 ሌዌ 18:8፤ 20:11፤ ዛሬ 22:30

23 «ባ ቦሎቴይራ ዘንኢዛ ኡባይ ቃንጌቲዳዳ ጌዶ!» ዴሬዚ ወሪካ፥ «አሚን!» ጎ።

24 «ጌማሶን ዛማዲ ኡቲዲ አሴ ዋዲዛ ኡባይ ቃንጌቲዳዳ ጌዶ!» ዴሬዚ ወሪካ፥ «አሚን!» ጎ።

25 «ሚሻን ሻሜቲዲ ጸሎ ሼምፖ ዋዲዛ ኡባይ ቃንጌቲዳዳ ጌዶ!» ዴሬዚ ወሪካ፥ «አሚን!» ጎ።

26 «ሃይታ ሃ ዋጋ ቃላታ ናጎንታ ኡባይ ቃንጌቲዳዳ ጌዶ!» ዴሬዚ ወሪካ፥ «አሚን!» ጎ።

28

አዛዜቴላን ቤቲዛ አንጆ

(ሌዌ 26:3-13፤ ዛሬ 7:12-24)

1 ኔኒ ጎዳ ኔ ጸሳሰ አዛዜቴኮ ሃቕ ታ ኔሰ አሚዛ አዛዞታ ኔ ኡባ አማኔታዳ ናጊኮ ኢዚ ኔና ቢታ ቦላ ዲዛ ካዋቴላታ ኡባሬ ቦላራ ቶቁ ቶቁ ሂሰታና።

2 ኔኒ ጎዳ ኔ ጸሳሰ አዛዜቴኮ ሃይሳፌ ካሊዛ አንጆቲ ወሪካ ኔይታ ጌዳና።

3 ኔኒ ካታማኒኔ ጋጻሬን አንጆቲዳ አሰ ጌዳና።

4 ኔ ናይቲ፥ ኔ ቢታን ዲዛ ካላ አይፌይ፥ ኔ ሚዛቲ፥ ዶርሳቲ፥ ዴይሻቲ ኡባይ አንጆታና።

5 ኔ ካላ ጎታራይኔ ማዳይ አንጆታና።

6 ኔኒ ጌላዳካ ኬዛዳካ አንጆታና።

7 ኔ ሞርኬቲ ኔ ቦላ ሜቶ ጋሊዛ ዋዴ ጎዳይ ኢሰታ ኔ ሲንላን ኩንዲሳና፤ ኢሰቲ ኔ ቦላ ኢሲ ባጋራ ያና፤ ጌዶ ኣቲን ላፑን ኦጌራ ኔፔ ባቃታና።

8 ጎዳይ ኔ ኩሼይ ኦይኪዳ ኡባኔ ኔ ጎታራ ኡባ አንጆና፤ ቃሴ ኢዚ ኔሰ አሚዳ ቢታንካ ኔና አንጆና።

9 ኔኒ ጎዳ ኔ ጸሳሰ አዛዜቴኮኔ ኔ ኢዛ አዛዞታ ኡባ ፖሊኮ ኢዚ ኔሰ ጫቂዳ ቃላ ማላ ኢዚ ኔና ባሰ ዱማ ሻኬቲዳ ዴሬ ሂሰታና።

10 ሂሳፌ ጉዬ ቢታ ቦላ ዲዛ ዴሬይ ወሪካ ጎዳ ሱንላ ኔናን ጴይጌቲዛይሳ ቤኢዲ ኔሰ ያናና።

11 ጎዳይ ኔሰ አማናሰ ካሴ ኔ አዋታሰ ጫቂዳ ቢታ ቦላ ኔሰ ዳሮ ናይታ፥ ዳሮ ሜሄኔ ኬሂ ዳሮ ካላ አማና።

12 ኔ ኩሼ ኦሶ ኡባ አንጆናሲኔ ጎዳይ ኔ ቢታሰ ኢራ ዋዴራ ቡኪሳናሰ ባ ሚንጃ ኬላ፥ ሳሎ ፔንጌ ኔሰ ዶያና፤ ቃሴ ኔኒ ዳሮ ካዋቴላታሰ ታልኣናፔ ኣቲን ኦፔካ ሃ ታልኤ ኤካካ።

13 ጎዳይ ኔና ሁኔሃ ሂሳብና ሂሳብ ጎዳይ ሂሳብና፤ ሃች ታኒ ኔሰ አሚዛ ኔ ጎዳ አዛዘ ሲያዳ ሄሳ ኔኒ ሚንጻዳ ካሊኮ ኔኒ ኡባፌ ቦላ ገዳና፤ ኣቲን ጋርሴ ገዳካ።

14 ታኒ ኔሰ ሃች አሚዳ ሃ አዛዘታ፤ ካሬ ኬዛዳ ኤቃ ጸሳታሰ ጎዳናሲኔ ኢሰታሰ ኦላናሰ ቤሴና።

አዛዘቶንታ ኢጸይ ኤሂዛ ቃንጌል

(ሌዌ 26:14-46)

15 ቃሴ ኔኒ ጎዳ ኔ ጸሳሰ አዛዘቶንታ ኢጸኢ፤ ታኒ ኔሰ አሚዛ ዐጋታኔ አዛዘታ ኔ አማኔታዳ ናጎንታ ኢጸኢ ሃይሳፌ ካሊዛ ቃንጌላቲ ኔ ቦላ ጋካና ኔኒ ኤኪ ባና።

16 ኔኒ ካታማኒኔ ጋጸሬን ቃንጌቲዳዳ ገዳና።

17 ኔ ካላ ጎታራይኔ ማዳይ ቃንጌቲዳዝ ገዳና።

18 ኔ ናይቲ፤ ኔ ቢታን ዲዛ ካላ አይፌይ፤ ኔ ሚዛቲ፤ ዶርሳቲ፤ ዴይሻቲ ኡባይ ቃንጌቲዳዝ ገዳና።

19 ኔኒ ጌላዳካ ኬዛዳካ ቃንጌቲዳዳ ገዳና።

20 ኔኒ ኢታ ኦሶን ጎዳ አገዳ ገሻሰ ኔ ኦሊዛ ኦሶን ኡባን ኔ ሙሌራ ዳያና ጋካናሰ ቃንጌል፤ ሂርጋኔ ካዉሻቲል ጎዳይ ኔ ቦላ ኤሃና።

21 ኔኒ ላታናሰ ጌላና ቢታይፌ ኔና ሙሌራ ዳይሳና ጋካናሰ ኔ፤ ኪቸንታ ኢታ ሃርጌ ጎዳይ ኔ ቦላ ዬዳና።

22 ጎዳይ ኔና ገለቃቲላን፤ ሚሾኒኔ ቆጶን፤ ማዲንጻን፤ ጸጊዛ አዋኒኔ ኮሻን ዳይሳና፤ ኔ ካላ ዳይሳናሰ ኩቱልኤኔ ሎቤ ኔ ቦላ ዬዳና።

23 ኔ፤ ቦላራ ኔ ገናን ዴኢዛ ሳሎይ ጸርቂማላ ገዳና፤ ኔ ቢታይካ ቢራታ ማላ ገዳና።

24 ጎዳይ ኔ ቢታን ቡኪዛ ኢራ ቡሂኔ ጉዱላ ኬሳና፤ ኔኒ ቢታፌ ዳያና ጋካናሰ ጉዱላይ ሳሎ፤ ዱጌ ቡካና።

25 ጎዳይ ኔ ሞርኬታ ሲንጻን ኔኒ ጸኔታና ማላ ኦላና፤ ኔኒ ኢሰታ ቦላ ኢሲ ኦጌራ ባናሺን ኢሰታፌ አታናሰ ሳፑናሶራ ባቃታና፤ ቢታ ቦላ ዲዛ ካዋቲላቲ ኡባይ ኔ ቦላ ጋኪዛይሳ ቤኢዲ ሂርጋን ኮኮራና።

26 ኔ አሃይ ሳሎ ካፎታሲኔ ባዞ ዶኣታሰ ቁማ ገዳና፤ ኢሰታ ጎዳና አሲካ ዴና።

27 ጎዳይ ኔና ፓጽንታ ጊብጼ ዳሬ ሃርጌን፥ ኪጸን፥ ጊዪዛ ማዲንጻኒኔ ፑሶ ሃርጌን ሾጫና።

28 ጎዳይ ኔና ጎሻን፥ ቆቄቴጻኒኔ ዳጋማን ዩጋና።

29 ጋላሳ ሴታን ኔኒ ቆቄይ ታታፊቲዛ ማላ ታታፊታና፤ ኔ ኦሊዛ ኡባይ ኔሰ ጊጎንታ ኢጸና፤ ኔኒ ኔ ዴኦ ኡባን ኡንኤታሼኔ ቦንቄታሼ ዳና፤ ኔና ማዲዛ አሴካ ዳማካ።

30 ኔኒ ማቾ ኤካናሰ ጌላኦ ጊጊሳና፤ ጊዶ አቲን ሃራ አሲ ኢዞ ዳሬ ኤካና፤ ኔ ኬሐ ኬጸናሺን ኢዛን ዳካ፤ ኔኒ ዎይኔ ሚሐ ቶካናሺን ኢዛ አይፊ ጎኤታካ።

31 ኔ አይፊ ዴሊሺን ኔ ሜሄ ሃራ አሲ ሹካና፤ ጊዶ አቲን ሄ አሾዛፔ አይኮካ ማካ፤ ኔ ሃሬይ ኔፔ ቦንቄቲ ኤኬታና፤ ጊዶ አቲን ኔሰ ጉዬ ሲሜና፤ ኔ ዶርሳቲ ኔ ሞርኬሰ አሜታና፤ ሃሳፊ አሻናሰ ኔና ማዳናይ ዳና።

32 ኔ አይፊ ሲንጻን ኔ አቱማ ናይቲኔ ማጫ ናይቲ ሃራ ካዎቴላሰ አሜታና፤ ኢሰቲ ሲሚን ቤአና ጋዳ ኔ ዴሊሺን ኔ አይፊ ዶልጂማና፤ ሄሳ ዲጋናሰ ኔሰ አይ ዎልቃይካ ዳና።

33 ኔ ቢታ ካላ አይፊኔ ኔ ዳቡራ ኬሲዳ ኡባ ሃራ ዳሬ አሲ ማና፤ ኔኒ ኔ ዴኦ ኡባን ኡንኤቲዳዴኔ ቆሄቲዳዴ ጊዳና።

34 ኔኒ አይፊን ቤኢዛ ኡባይ ኔና ጎሻና።

35 ጎዳይ ኔሰ ቶሆ ጽጉንጻፊ ቢዲ ሁኤ ቢናና ጋካናሰ ሚዛ ፓጽንታ ኢታ ማዲንጻኒኔ ኪጸን ኔ ሱሌኔ ኔ ዎዲራ ሾጫና።

36 ጎዳይ ኔናኔ ኔኒ ኔ ቦላ ካዎሳና ካዎዛ ሃ ቢታፊ ዴንሊዲ ካሴ ኔኒኔ ኔ አዎቲ ኤርንታ ሃራ ካዎቴሐ ኤፋና፤ ኢንቴ ሄን ሚላፊኔ ሹቻፊ ኦሴቲዳ ኤቃ ጸሳታሰ ጎይናና።

37 ጎዳይ ኔኒ ላሌታ ቢዛ ካዎቴላታ ኡባ ጊዶን ኔና ቂልጫሰ፥ ሚቻሲኔ ካጼሰ ኬሳና።

38 ኔ ጋዴን ኔ ዳር ካሐ ዜራና ሺን ቦሌይ ሚሺን አቲዳ ጉላ ካሐ ሺሻና።

39 ኔኒ ዎይኔ ሚሐ ቶካናሺን ኢዛ አይፊዛ ጎኤታካ፤ ጋሶይካ ጉጹኔይ ኢዛ ማና።

40 ኔ ዳሬን አዋንካ ዎጋራ ሚሊ ሞካናሺን ዎዴይ ጋኮንታ ዲሺን አይፊ ቆቆፋና፤ ሄሳ ጊሻሰ ዎጋራ ዛይቲይ ኔሰ ዳና።

41 ኔኒ ማጫ ናይታኔ አቱማ ናይታ ዬላናሺን ኢሰቲ ኦላን ዲኤቲ ቢኮ ኔ ሚላ አታና።

42 ኔ ጋዴን ዲዛ ሚላኔ ካላ ኡባ ቦሌይ ማና።

43 ኔ ዎልቃይ ዳቡሪ ዳቡሪ ቢሺን ኔ ዳሬን ዲዛ ቤቲ አሳ ዎልቃይ ሚኒ ሚኒ ባና።

44 ኔ ዳሬን ዲዛ ቤቱ አሳይ ኔሰ ታልኤ አማና አቲን ኔ ኢሰታሰ ታልአካ፤ ኢሰቲ ኔሰ ሁኤ ገዳና፤ ኔኒ ገዲኮ ኢሰታሰ ጎይና ገዳና።

45 ኔኒ ጎዳ ኔ ጸሳሰ አዛዜቶንታ ኢጲዳ ገሻሲኔ ኢዚ ኔሰ አሚዳ ዋጋታኔ አዛዘታ ኔኒ ናጎንታ ኢጲዳ ገሻሰ ኔኒ ሙሌራ ጳያና ጋካናሰ ሃይቲ ሃ ቃንጌላቲ ኡባይ ኔ ቦላ ጋካና።

46 ሃ ቃንጌላቲ ኡባይ ጸሲ ኔ ቦላኔ ኔ ዜሬላታ ቦላ ቂጸቲሰ ዬጊዳ ሜርናሰ ማላታኔ ማላሊሲዛዝ ገዳና።

47 ጎዳ ኔ ጸሳይ ኔና ዳሮ ባጋራ አንጂዴሰ፤ ገደ አቲን ኔ ጋላታሼ ኡፋይሳን ኢዛሰ ኦላቤካ።

48 ሄሳ ገሻሰ ኔኒ ጋፋን፥ ሳሞን፥ ካሎቴላኒኔ ሜቶ ኡባን ጎዳይ ኔ ቦላ ዬዲዛ ኔ ሞርኬታሰ ኔ ሃሬታና፤ ጎዳይ ኔና ጳይሳና ጋካናሰ ኔ ሞርጌን ቢራታ ቃምባራ ዋጸና።

49 ጎዳይ ኔ ኢሰታ ቃላ ኤርንታ ካዎቴላ ሃኮ ዳሬፔ ኔ ቦላ ኤሃና፤ ኢሰቲካ ጎሌ ካፎ ማላ ኔ ቦላ ዋጳና።

50 ኢሰቲ ሜንጼ ኢታታ፥ ጨሚዳ አሳ ቦንቸንታይታኔ ጉላ ናይታሰ ሚሼቶንታይታ ገዳና።

51 ኢሰቲ ኔ ሜሄኔ ኔ ካል ኡባ ፒቲ ሚዛይታ ገዲዳ ገሻሰ ኔኒ ሃይቃና ጋካናሰ ኮሻን ዋያና፤ ኢሰቲ ኔ ጳያና ጋካናሰ ኔ ካላፌ ኢሲ አይፌ፥ ኔ ሜሄፔ ጉላ ማሪ፥ ኔ ዶርሳፌ ጉላ ላቃ፥ ዋይኔፔኔ ዋጋራ ሚላ አይፌፔ ቂ ፓላካ አሼቴና።

52 ኔ ቢታን ዳኢዛ ኔኒ ኢሰታን አማኔቲዛ አዲሳኔ ሚኖ ዲርሳቲ ኡባሶራ ላሊታና ጋካናሰ ኔ ካታማታ ኡባ ዩሾን ዶዲዲ ኔና ኡንኤላና። ጎዳ ኔ ጸሳይ ኔሰ አሚዳ ቢታ ኡባ ዩሾን ዶዲ ኔ ሚጸታ ዲፒ ሂሰቲ ጳይሳና።

53 ኔ ሞርኬቲ ኔ ካታማታ ዶዲዲ ኔና ኡንኤሊን ኔሰ ሚዛዚ ጳዩን ኔ ሜቶቲዛ ዋዴ ጎዳ ኔ ጸሳይ ኔሰ አሚዳ ኔ ኡሎፔ ዬሌቲዳ ማጫ ናይታኔ አቲማ ናይታ አሾ ዶሳይ ባይንዳ ኔ ማና።

54 ኔ ገደን ሃራይ አቶ ካሴ ኪያኔ አንጃ ዱሲ ዳሰ ጌቲቲዛ አሲካ ባ አሻሰ፥ ባ ሰቂዛ ማቼይሲኔ ባ ዬሊዳ ናይታሰ ቃቋቴና።

55 ጉዬን ካታማ ዶዲዲ ኡንኤሊዳ ጋሶን ማና ሚሺ ሃራይ ባይንዳ ገሻሰ ባ ሚዛ ባ ናይታ አሾፔ ሃራሰ ኦናሰካ አሜና።

56 ኔ ገደን ካሴ አንጃን ዴኣዉሰ ጌቲቲዳራ ባ አንጃ ዱሳፌ ዴንዶይሳን ሳኣ ዬጳናሰ ሻቲቲዛ ማጫሳያካ ባ ሰቂዛ አዚናሲኔ ባ ናይታሰ ቃቋቴኩ።

57 ሞርኬይ ኢዛ ዳኢዛ ካታማ ዶዲዲ ኢዛ ኡንኤሊዳ ገሻሲኔ ቱጋሲዳ ገሻሰ ኢዚሰ ሚዛ ሚሺ ሃራይ አይኮይካ ዳና፤ ሄሳ

ጊሻስ ኢዛ ባ ዩሊዳ ዩዳኔ ዶኣ ባ ሲቂዛ ኣዚናኔ ባ ናይታ ጋሶንታ ኡዜታዳ ጌማን ባርካ ማና።

58 ሃይሳ ሃ ማጻፋን ጸፊቲዳ ጸሳ ዋጋ ኢንቲ ሎኤሊ ናጎንታ ኣጊኮ ቃሴ ማላሊሲዛኔ ያሺሲዛ ጎዳ ኢንቲ ጸሳ ሱንላ ኢንቲ ቦንቾንታ ኣጊኮ።

59 ጎዳይ ኢንቲ ቦላኔ ኢንቲ ናይታ ቦላ ባቢሲዛ ቦሻ፡ ሲሞንታ ባሺኔ ፓጽንታ ዴጾ ሃርጌ ዬጋና።

60 ኔኒ ጊብጼ ቢታ ቦላ ዋዲን ቤያዳ ሂርጊዳ ሄ ኢታ ሃርጌዛ ኡባ ኢዚ ኔ ቦላ ዬዳና፤ ኔካ ሄ ሃርጌዛፔ ፓጽካ።

61 ጎዳ ዋጋቲ ጸፊቲዳ ሃ ማጻፋን ጸፊቶንታ ሃራ ቦሻታ ኢንቲና ኡባ ዉርሳና ጋካናስ ኢንቲ ቦላ ዬዳና።

62 ጎዳ ኢንቲ ጸሳስ ኢንቲ ኣዛዜቶንታ ኢዲዳ ጊሻስ ሳሎ ጸለንቲ ማላ ዳራዳ ኢንቲፊ ጉላቲ ጸላ ኣታና።

63 ጎዳይ ኢንቲና ዱሬሳናሲኔ ኢንቲ ቆዳ ዳርሳናስ ዶሲዳ ማላ ቃሴካ ኢንቲና ጉሊሼኔ ቢታፊ ዳይሲሼ ኢዚ ኡፋዬታና፤ ኢንቲካ ላታናስ ቢዛ ቢታይፊ ሾዴታና።

64 ጎዳይ ኔና ኩሜላ ኣላሜን ዲዛ ኣሳ ጊዶን ቢታስ ጋጽፔ ጋጸ ጋካናስ ላላና፤ ሄን ኔኒኔ ኔ ኣዋቲ ካሴ ጎይኒ ኤርንታ ሚላፊኔ ሹቻፊ ኦሴቲዳ ኤቃ ጸሳታስ ኢንቲ ጎይናና።

65 ሄ ካዋቲላታ ጊዶን ኢንቲ ዋፓ ዴሜኬታ፤ ኢንቲ ቶሆ ጫማይ ዩዲዛ ሶሆ ኬና ጋዴይካ ኢንቲስ ዴና፤ ሄሳን ጎዳይ ኢንቲስ ሜቶ ቆፋን ጸላ ኩሚዳ ሁኤ፡ ኣሞን ጸላ ዳቡርዳ ኣይፊኔ ሂዶታ ቃንጺዛ ዋዚና ኢማና።

66 ኢንቲስ ዱሳይ ኡባ ዋዴ ዋዬ ጸላ ጊዳና፤ ዱሳይ ኣማንሶንታ ጊሻስ ኢንቲ ቃማኔ ጋላስ ሂርጊሹ ዳና።

67 ኢንቲ ዋዚናን ኩሚዳ ሂርጋፊኔ ኢንቲ ኣይፊን ቤኢዛ ፓላፔ ዴንዲዳይሳን ጋዴይ ዋንቲሺን ኢንቲ፡ «ኣይዴ ቃማኔሻ!» ቃሴ ጋዴይ ቃሚሺን፡ «ኣይዴ ዋንታኔሻ!» ጋና።

68 ታኒ ኢንቲና፡ «ናሞኣንሶ ሃ ኦጌዛራ ቤኬታ» ጊዳ ኦጌዛራ ጎዳይ ኢንቲና ዛሪዲ ማርካቤን ጉዬ ጊብጼ ዬዳና። ሄን ኢንቲ ኣይሌ ጊዳናስ ኢንቲ ሞርኬታስ ኢንቲና ባይዛናስ ኮያና፤ ጊዶ ኣቲን ኢንቲና ኣይሌሳናስ ሻሚዛ ኣስ ዴሜኬታ።

29

ጎዳይ ኢስራኤሌ ኣሳራ ሞኣቤ ዴሬን ጌሊዳ ጫቆ ቃላ

1 ጎዳይ ኮሬቤን ኢስራኤል አሳራ ጫቂቲዳ ጫቆ ቃላፔ ሃራ ሞአቤ ዳሬን ናምኣንሶ ጫቂታናሰ ሙሴ አዛዚዳ ጫቆ ቃላፔ ሃይሳፌ ካሊዛይታ።

2 ሙሴይ ኢስራኤል አሳ ኡባ ዳይጊዲ፥ ጎዳይ ጊብጾ ካዋ ቦላ፥ ኢዛ ሹማታ ቦላኔ ኡባ ዳራ ቦላ ኢዚ ኦሊዳይሳ።

3 ሄ ኢታ ማቶታ፥ ጊታ ማላታታኔ ማላሊሲዛ ሚሻታ ኢንቴ ኢንቴ አይፌራ ቤኢዳታ።

4 ጊዳ አቲን ሃች ጋካናሰ ጎዳይ ኢንቴሰ አኬኪዛ ዋዚና፥ ዳሊዛ አይፌኔ ሲዩዛ ሃይሳ ኢሚቤና።

5 ታኒ ኢንቴና ኦይዱ ታሙ ላይሳ ኩማሳ ባዞን ካሌሊሺን ኢንቴ ማይኦይ ጨጊቤና፤ ኢንቴ ቶሆን አሊዳ ጫማይካ ወሪቤና።

6 ኢንቴ ኡኬሳ ሚቤኬታ፤ ዋይኔ ኡሹ ጊዲን ዋይኮ ማሶሲዛ ኡሹ ኡዩቤኬታ። ታኒ ሄሳሶ ኦሊዳይ ታኒ ጎዳ ኢንቴ ዳሳይ ኢንቴ ዳሳ ጊዲዳይሳ ኢንቴ ኤራናሳ።

7 ኢንቴ ሃይሳ ሃ ጋኪዳ ማላ ሃሴቦኔ ካዋ ሲሆኔይኔ ባሳኔ ካዋ አጌይ ኑና ኦላናሰ ዪን ኑኒ ኢሰታ ጸኒዶሰ።

8 ኑኒ ኢሰታ ቢታ ኑሰ ኤኪዶሰ፤ ኦርቤሌ ቆዋታሰ ጋዴ ቆዋታሲኔ ሚናሴ ቆዋታፔ ባጋይታሰ ሻኪ ሻኪ ኢሰታሰ ጸንጾ ጊዳና ማላ ኢሚዶሰ።

9 ሄሳ ጊሻሰ ኢንቴ ኦሊዛ ኦሶ ኡባይ ኢንቴሰ አንጃታና ማላ ሃይታ ጫቆ ቃላታ ኡባ ሚኒ ካሊቴ።

10 ኢንቴ ኡባቲ፥ ኢንቴና ካሌሊዛይቲኔ ኢንቴ ሃላቃቲ፥ ኢንቴ ጨማቲኔ ኢንቴ ሹማቲ፥ ሄሳሶካ ሃንኮ ኢስራኤል አሳይ ኡባይካ ኢንቴ ሃች ጎዳ ኢንቴ ዳሳ ሱንፋን ኤቂዳታ።

11 ኢንቴ ናይቲኔ ኢንቴ ማቼቲ ኢንቴሰ ሚሳ ቃንጺሼኔ ሃሌ ዱቂሽ ኢንቴናራ ዲዛ ቤቴ አሳታራ ኢሲፌ ኤቂዳታ።

12 ጎዳ ኢንቴ ዳሳራ ኢንቴ ጫቂቲዳ ቃላዛ ሚንፋናሰ ሃች ሃይሳን ሺቂዳታ።

13 ጸሲ ኢንቴና ሃች ባ ዳሬ ሂሰቲ ሚንፋና፤ ኢንቴሲኔ ቤኒ ኢንቴ አዋታሰ፥ አብራሃሚሰ፥ ዪሳቃሲኔ ያቆቤሰ ጌሊዳ ጫቆ ቃላ ማላ ኢዚ ኢንቴሰ ጸሰ ጊዳና።

14 ታኒ ሃይሳ ጫቆ ቃላ ጌሊዳይ ኢንቴናራ ጸላ ጊዳና።

15 ጎዳ ኑ ዳሳይ ሃይሳ ሃ ጫቆ ቃላ ጌሊዛይ ኢዛ ሱንፋን ኤቂዳ ኑናራ ጸላ ጊዳንታ ሃች ሃይሳን ዶንታ ቡሮ ያና ዩሌታ ኡባሳራ ጫቂሰ።

16 ኑኒ ገብጾን ዋኒ ዳኢዳኮኔ ኑ ሃይሳ ሃ ዪሽ ኢሲ ኢሲ ካዋቱላራ ዋኒ ካንሊ ዪዳኮ ኢንቲ ኡባይካ ሄሳ ኤሬታ።

17 ኢስታ ገደን ዲዛ ሃራሲዛ ሚሻታ ሚላፌ፣ ሹቻፌ፣ ቢራፔኔ ዋርቃፌ ኦሴቲዳ ኤቃ ጸሳታ ኢንቲ ቤኢዳታ።

18 ሃ ኢንቲፌ ኦኒኔ ኣቱማ ገዲን ዋይኮ ማጫ ገዲን ኢሲ ኬላ ኣስ ገዲን ዋይኮ ቆዋ ገዲን ጎዳ ኑ ጸሳፌ ሹርኢ ገዲ ሃራ ካዋቱላታ ጸሳታስ ጎይኖንታ ማላ ናጌቲቲ፤ ኢንቲ ጋርሳን ሄሳ ማላ ጫሞኔ ማርዜ ገዲዳ ሚሽ ኦሊዛ ኣሲ ዶንታ ማላ ናጌቲቲ።

19 ሃ ጫቆ ቃላ ሲዪዲ ባ ዋዚናን፣ «ታኒ ታ ሹኔ ማላ ዲኮካ ታስ ሳርይ ዳስ» ገዲ ባና ጨሚኮ ሄሳ ማላ ኣሲ ሎኦታ ቦላኔ ኢታታ ቦላ ባሽ ኢሃና።

20 ሄሳ ማላ ኣስ ጎዳይ ሙሌካ ማሬና፤ ጎዳ ሃንቆይ ኢዛዳ ቦላ ታማ ማላ ኤጸና፤ ሃይሳ ሃ ማጸፋን ጸፊቲዳ ቃንጌሊ ኢዛዳ ቦላ ዋጻና፤ ሳሎ ጋርሳፌ ኢዛ ሱንሳ ጎዳይ ቆይሳና።

21 ሃይሳ ዋጋ ማጸፋን ጸፊቲዳ ቃንጌላ ቃላ ማላ ጎዳይ ኢዛዳ ኢስራኤል ኣሳ ኡባ ጋርሳፌ ዲማ ሻኪ ቆይሳና።

22 ሲንላፌ ያና ዩሌታይ፣ ኢንቲ ዛሬይኔ ሃሆ ዳሬፔ ያና ሃራ ቢታ ኣሳይ ጎዳይ ኢንቲ ቦላ ኤሂዳ ቦሻኔ ሜቶዛ ቤኣና።

23 ሄ ቢታያ ሙሊራ ጽጌቲዳ ማጸኢኔ ዲኔ ጌቲቲዛ ቢዲንላ ገዳና፤ ኢሲ ሚሺካ ኢዚን ቶኬቲና፤ ኣይ ሚሺካ ኢዚን ሞኬና፤ ኢዚን ፑዴ ዲጨዛ ሚሺ ቤቲና፤ ኢዚ ቦላ ጋካና ኩንዴሊ ጎዳይ ኬሂ ሹኔቲዲ ሙሊራ ቆይሲዳ ሶዶሜ ማላኔ ጋሞራ ማላ፣ ኣዳማ ማላኔ ጸቦይሜ ማላ ገዳና።

24 ካዋቱላቲ ኡባይ፣ «ጎዳይ ሃ ቢታ ቦላ ሃይሳ ኣዛስ ጋሊዴ? ሃ ዋልቃማ ሃንቆዛስ ጋሶ ገዲዳይ ኣዜ?» ገ ኑይቻና።

25 ኣሳይ ኢዛስ ዛሪዲ፣ «ካሴ ኢስታ ኣዋታ ጸሳይ ኢስታ ገብጾ ዳሬፔ ኬሲዳ ዋዴ ኢስታራ ፓጮቲ ጫቆዛ ኣሳይ ኣገዳ ገሻሳ።

26 ቃሴ ኢስቲ ቢዲ ካሴ ባ ኤርንታ ጸሳታሲኔ ኢዚ ኢስታስ ጎይኖፍቲ ገዳ ኤቃ ጸሳታስ ጎይኒዳ።

27 ሄሳ ገሻሰ ጎዳይ ሃንቁቲዲ ሃ ማጸፋን ጸፊቲዳ ቃንጌላ ኡባ ኢስታ ቦላ ኤሂዴስ።

28 ጎዳይ ዋልቃማ ሃንቆኒኔ ኢታ ቦሻን ኢስታ ኢስታ ዳሬፔ ሾዲዴስ፤ ሄሳ ገሻሰ ኢስቲ ሃቕ ጋካናስ ሄን ዴቲስ» ጋና።

29 ጹራ ዮኦቲ ጎዳ ኑ ጸሳሳ፤ ገደ ኣቲን ኑኒ ሃ ዋጋ ቃላ ናጋና ማላ ቆንጨዳ ዮኦቲ ሜርናስ ኑሲኔ ኑ ናይታሳ።

30

ጸሳኮ ሲሞን ቤቲዛ አንጆ

¹ ናሞኦታፔ ኢሳ አንቴ ዶራና ማላ ሃች ታ አንቴ ሲንፋን አንጆኔ ቃንጌል ዋላዲስ፤ ጎዳ አንቴ ጸሳይ አንቴና ካዎቴላታ ጊዶን ዲሼ አንቴ ኢዛ ዩሺ ቆፒዛ ዋዴ።

² አንቴኒኔ አንቴ ናይቲ ጎዳ አንቴ ጸሳኮ ሲሚዲ ኩሜላ ዋዚናፔኔ ኩሜላ ሼምፖፌ ታኒ ሃች አንቴና ኣዛዚዳ ቃላስ ኣዛዜቲኮ።

³ ጎዳ አንቴ ጸሳይ አንቴስ ቃዴታናኔ አንቴፌ ዲኤቲዳ አንቴ ሚሻ አንቴስ ዛራና፤ አንቴ ካሴ ላሌቲ ዲዛ ዴሬፔ ዛሪ ኤሂዲ ቃሴካ ዲሬሳና።

⁴ አንቴ ቢታ ጋጸ ጋካናስ ላሌቲኮካ ሄፔ ጎዳ አንቴ ጸሳይ አንቴና ኢሲ ቦላ ሺሺዲ ዛሪ ኤሃና።

⁵ ሄሳሶ ሃኒዲ ካሴ አንቴ ኣዋታ ቢታ አንቴ ዛሪ ላታና፤ ኢዚካ አንቴና ካሴ አንቴ ኣዋታፔ ኣሊ ዲሬሳናኔ አንቴ ቆዳ ዳርሳና።

⁶ አንቴ ዴኦን ዳና ማላኔ ጎዳ አንቴ ጸሳ አንቴ ኩሜላ ዋዚናፔኔ ኩሜላ ሼምፖፌ ሲቃና ማላ ኢዚ አንቴሴኔ አንቴ ናይታስ ኣዛዜቲዛ ዋዚና * አማና።

⁷ ጎዳ አንቴ ጸሳይ ሃይታ ሃ ቃንጌላታ ኡባ አንቴ ሞርኬታ ቦላኔ አንቴና ኢዲዛይታ ቦላ ዛራና።

⁸ አንቴካ ዛሪዲ አንቴ ጎዳስ ኣዛዜታና፤ ታ አንቴስ ሃች አሚዛ ኢዛ ኣዛዞታ አንቴ ናጋንዴታ።

⁹ ሄሳፌ ጉዬ አንቴ ኦሊዛ ኦሶ ኡባን ጎዳ አንቴ ጸሳይ አንቴና ዲሬሳና፤ ኢዚ አንቴስ ናይታ፡ ሜሄ፡ ካሊኔ ሚላ ኣይፌ ዳርሳና፤ ጎዳ አንቴ ጸሳይ ካሴ አንቴ ኣዋታ ዲሬሲዲ ኡፋዬቲዳ ማላ አንቴናካ ዲሬሲዲ ኡፋዬታና።

¹⁰ ኢዚ ሄሳሶ ኦላናይካ ሃይሳ ዋጋ ማጻፋን ጸፊቲዳ ኣዛዞታኔ ዋጋታ አንቴ ኩሜላ ዋዚናፔኔ ኩሜላ ሼምፖፌ ናጊዲ ጎዳ አንቴ ጸሳኮ አንቴ ሲሚኮና።

ሃይቆፔኔ ዴኦፔ ኢሳ ዶር

¹¹ ታኒ ሃች አንቴስ አሚዛ ኣዛዞይ ኬሂ ዴጾ ዋይኮ አንቴፌ ሃኪዳዝ ጊዴና።

* 30:6 ኣዛዜቲዛ ዋዚና፡ ኣዛዜቲዛ ዋዚና ጊዛይሳ ኢሲ ኢሲ ጌሻ ማጻፋቲ ቃጻሬቲዳ ዋዚና ጌቲስ።

12 «ኮኒ ኢዛ ሲዱዲ አዛዜታና ማላ ጥዳ ሳሎ ቢ ኤሂዲ ኑስ የታናይ ኦኔ?» ጊዲ ኢንቴ ኦይቸንታ ማላ ሃይሲ ዋጋዚ ቦላ ሳሎፔ ቤቴና።

13 «ኮኒ ኢዛ ሲዱዲ አዛዜታና ማላ አባ ፒኒ ቢ ኤሂዲ ኑስ የታናይ ኦኔ?» ጊዲ ኢንቴ ኦይቸንታ ማላ ኢዚ አባ ፒንፋፌ ቤቴና።

14 ኢዛ ቃላይ ኢንቴ ማታን ዳስ፤ ኢንቴ ኢዛ ናጋና ማላ ኢዚ ኢንቴ ዶናኒኔ ኢንቴ ዋዚናን ዳስ።

15 ኔኒ ዶራና ማላ ታኒ ሃች ኔስ ዳኦኔ ሎኤቴል፥ ዋይኮ ሃይቆኔ ባሽ ኔ ሲንፋን ዋላዲስ።

16 ጎዳ ኢንቴ ጸሳ ሲቃና ማላ፥ ኢዛ ኦጌን ሄሜታና ማላኔ ኢዛ አዛዘታ፥ ማራታኔ ኢዛ ዋጋታ ናጋና ማላ፥ ታኒ ሃች ኢንቴስ አሚዛ ጎዳ ኢንቴ ጸሳ አዛዘታ ኢንቴ ናጊኮ ኢንቴ ሹምፖራ ፓጸ ዴኣናኔ ጮራታና፤ ቃሴ ኢንቴ ላታናስ ጌሊዛ ቢታን ጎዳ ኢንቴ ጸሳይ ኢንቴና አንጃና።

17 ጊዶ አቲን ኢንቴ ኢንቴ ዋዚና ጸሳፌ ሃሲዲ ኢዛ ቃላ ሲዮንታ ኢዲኮ፥ ሃራ ኤቃ ጸሳታስ ጎይኒኮኔ ኢስታስ ኦሊኮ።

18 ኢንቴ ሙሌራ ጳያናይሳ ሃች ታ ኢንቴስ የታይስ፤ ኢንቴ የርዳናሴ ሻፋ ፒኒዲ ላታና ቢታይን ዳሮ ላይል ጋምኤኬታ።

19 ታኒ ኢንቴ ሲንፋን ዳኦኔ ሃይቆ፥ አንጃኔ ቃንጌል ዋሊዳይሳስ ሃች ሳሎኔ ሳኦ ኢንቴ ቦላ ማርካሳይስ፤ ሄሳ ጊሻስ ኢንቴኒኔ ኢንቴ ዛሬቲ ዳኦን ዳኣና ማላ ዳኦ ዶሪቴ።

20 ጎዳ ኢንቴ ጸሳ ሲቂቴ፤ ኢዛ ቃላ ሲዱቴ፤ ኢዛኮ ሺጺ ጊቴ፤ ሄሳላ ሃኒኮ ጎዳይ ካሴ ኢንቴ አዋታስ፥ አብራሃሜስ፥ ዪሳቃሲኔ ያቆቤስ ኢማናስ ጫቂዳ ቢታን ኢንቴኒኔ ኢንቴ ናይቲ አዱሳ ላይል ዴኣና።

31

ኢያሶይ ሙሴ ሶሆን ዶሬቲዳስ

1 ሙሴይ ሃይሳ ቃላ ኡባ ኢስራኤል አሳስ የቲዳፔ ጉዬ፥

2 ኢስታስ፥ «ሄኮ ሃኢ ታስ 120 ላይል ጊዲዳ ጊሻስ ሃይሳፌ ጉዬን ታ ኢንቴና ካሌፋናስ ዳንዳይኬ፤ ሄሳፌካ ቦላራ ታኒ የርዳናሴ ሻፋ ፒናንታ ማላ ጎዳይ ታስ የቲ ዋሊዳስ።

³ ጎዳ እንቴ ጸሳይ እንቴፌ ሲንፋራ ቢሼ እንቴና ካሌፋና፤ ሄን ዲዛ ካዎቴፋታ ኡባ ኢዚ ጳይሲን እንቴ ኢስታ ቢታ ላታና፤ ጎዳይ ዮቲዳ ማላ ኢያሶይ እንቴና ካሌፋና።

⁴ ጎዳይ አዋሬ ዳሬ ካዎታ ሲሆኔኔ ኣጌ ጸኒዲ ኢስታ ቢታ ጳይሲዳ ማላ ኢስታ ቦላካ ሄሳዎ ኦፋና።

⁵ ጎዳይ ኢስታ እንቴስ ኣሊ አማና፤ እንቴኒካ ታ እንቴና ኣዛዚዳ ማላ ኢስታ ቦላ ኦፋና።

⁶ እንቴስ ሙርታቴሊኔ ጸላቴሊ ዳኦ፤ ኢስታስ ሙሌካ ባቦፍቴኔ ዳጋዋፍቴ፤ ጎዳ እንቴ ጸሳይ እንቴናራ ዴስ፤ ኢዚ እንቴና ዬጊ ኣጌና» ጊዴስ።

⁷ ሄሳፌ ጉዬ ሙሴይ ኢያሶ ባኮ ጸይጊዲ ኩሜፋ ኢስራኤሌ ኣሳ ሲንፋን፥ «ሚና፤ ባቦፋ፤ ጎዳይ ካሴ ኢስታ ኣዎታ ላቲሳና ጊዲ ጫቂዳ ቢታዮ ላታና ማላ ዴሬዛ ካሌፋ ጌልፋዳ ላቲሳናይ ኔና።

⁸ ጎዳይ ኔናራ ጊዲዲ ኢዚ ኔና ካሌፋና፤ ኢዚ ኔና ዬጌና፤ ሙሌካ ኣጌና፤ ሄሳ ጊሻስ ባቦፋ፤ ሂዶታካ ቃንጸፋ» ጊዴስ።

ዎጋይ ናባቤታናስ ቤሲዛ ላይፋታ

⁹ ሄሳፌ ጉዬ ሙሴይ ዎጋ ጸፊዲ ጫቆ ቃላ ታቦታ ቶኪዛ ቁሴ ጊዲዳ ለዌ ናይታሲኔ ኢስራኤሌ ጨማታ ኡባስ አሚዴስ።

¹⁰ ሙሴይካ ኢስታስ፥ «ኣጮ ኡባ ማሪዛ ላፑንፋ ላይፋን ወርሴፋ ቦላ ቦንቹቲዛ ዳሴ ባኣሌዛን፥

¹¹ ጎዳ እንቴ ጸሳ ሲንፋን ኢዚ ካሴ ዶሪዳሶን ኢዛስ ጎይናናስ ኢስራኤሌ ኣሳይ ኡባይ ሸቂዛ ዎዴ ሃይሳ ዎጋዛ ኢስታ ሲንፋን ናባቢቴ።

¹² ኢስቲ ኡባይካ ሄሳ ሲዬዲ ጎዳ እንቴ ጸሳስ ያሻቴላ ታማራና ማላኔ ሃይሳ ዎጋ ቃላታ ኡባ ሎኤሊ ናጋና ማላ ማጫሳታ፥ ኣዴታ፥ ናይታኔ እንቴ ዴሬን ዲዛ ቤቴ ኣሳታ ኡባ ኢሲ ቦላ ሺሺቴ።

¹³ ሄሳ ማላን ጎዳ እንቴ ጸሳ ዎጋ ካሴ ሲዬ ኤርንታ እንቴ ዜሬፋቲ ኡባይካ ሲዬቶ፤ ቃሴ እንቴ ዮርዳኖሴ ሻፋ ፒኒዲ ላታና ቢታን ዲዛ ዎዴ ኡባን ኢስቲ ጸሳስ ኣዛዜቴላ ታማሬቶ» ጊ ኣዛዚዴስ።

ሙሴሲኔ ኢያሶስ አሚዳ ዎጋታ

¹⁴ ሄሳፌ ጉዬ ጸሳይ ሙሴስ፥ «ኔስ ሃይቆ ዎዴይ ጋኪዴስ፤ ኢዚ ካላና ዎጋታ ኢዛስ ታ አማና ማላ ኢያሶ ጸይጋዳ ኢዛራ

ጌዴ ጋይቶቴላ ዱንካኔዛኮ ሸቂቲ» ጌዴስ። ሙሴይኔ ኢያሶይ ኢሲፌ ጌዴ ጋይቶቴላ ዱንካኔዛኮ ሸቂዳ።

15 ጎዳይካ ኢስታስ ዱንካኔዛ ፔንጌን ቱሳ ማላ ኤቂዳ ሻራን ቆንጪዴስ።

16 ጎዳይ ሙሴስ፤ «ኔኒ ማታ ዎዴ ሃይቃዳ ኔ አዋታን ጋይታና፤ ሄሳፌ ጉዬ ሃይሲ አሳዚ ታ ኢዛራ ጫቂቲዳ ቃላ ላላና፤ ኢስቲ ታና አጋጊዲ ላይማ ማጫሳ ማላ ሄ ኢስቲ ላታና ቢታን ዲዛ ኤቃ ጸሳታስ ጎይናና።

17 ሄሳሶ ሃኒዛ ዎዴ ታኒ ኢስታ ቦላ ሃንቄታዳ ኢስታፌ ሻኬታና፤ ታ ኢስታስ ዘኮ ዛራና፤ ኢስቲካ ኡባይ ቆያና፤ ኢስታ ቦላ ኢታ ሜቶይኔ ቦሻይ ያና፤ ሄ ዎዴ ኢስታስ፤ «ሃይሲ ሜቶዚ ኑ ቦላ ጋኪዳይ ኑ ጸሳይ ኑ ጊዶን ዶንታ አጊን ጊዴኔ?» ጋና።

18 ኢስቲ ኤቃ ጸሳታስ ጎይኒዲ ኢስቲ ኦሌዳ ናጋራ ጊሻስ ታኒ ሄ ዎዴ ኢስታስ ዘኮ ዛራና።

19 «ሃይሳ ዩላ ጸፋዳ ኢስራኤል አሳ ታማርሳዳ ኢስቲካ ዩጸና ማላ አላ፤ ሃይሲ ዩላዚ ኢስታ ቦላ ታስ ማርካ ጊዳና።

20 ታኒ ቤኒ ኢስታ አዋታስ ጫቂዳ ጫቆ ቃላ ማላ ኤስኔ ማሊ ኩሚዳ ቢታዮ ታ ኢስታ ጌልላና፤ ኢስቲ ሄን ሚዲኔ ኡዬዲ ካሊዳፔኔ ዱሬቲዳፔ ጉዬ ታና ዩጊ አጋና፤ ታ ጫቆ ቃላካ ዩጊ አጊዲ ኤቃ ጸሳታስ ጎይናና።

21 ዳሮ ሜቶይኔ ባሺ ኢስታ ቦላ ጋኪዛ ዎዴ ሃ ዩላይ ኢስታ ናይታ ዶናፔ ኪፔና ጊሻስ ኢስታ ቦላ ማርካ ጊዳና። ጋሶይካ ታኒ ጫቂዳ ቢታ ኢስታ ቡሮ ጌልሶንታ ዳሼ ሃራካ ኢስቲ ቆፒዛ ቆፋ ኤራይቻዲስ» ጌዴስ።

22 ሙሴይ ሄ ጋላስ ዩላዛ ጸፊዲ ኢስራኤል አሳ ታማርሲዴስ።

23 ሄሳፌ ጉዬ ጸሳይ ናዊ ና ኢያሶ፤ «ሚና፤ ጸላ ጊዳ፤ ኔኒ ኢስራኤል አሳ ካሌላዳ ታ ካሴ ኢስታስ ኢማና ጋ ጫቂዳ ቢታዮ ጌልላና፤ ታኒካ ኔናራ ጊዳና» ጊ አዛዚዴስ።

24 ሙሴይካ ሃይሳ ዎጋ ቃላታ ኮይሮፔ ቢዲ ወርሴል ጋካናስ ኡባ ጸፊዳፔ ጉዬን፤

25 ጎዳ ጫቆ ቃላ ታቦታ ቶኪዛ ሌዌ ቆሞታ ሂዝጊ አዛዚዴስ፤

26 «ጎዳ ዎጋይ ኢዛን ጸፊቲዳ ማጸፋ ኤኪዲ ጎዳ ኢንቲ ጸሳ ጫቆ ቃላ ታቦታዛ አቻን ዎሊቲ፤ ሄን ኢዚ ባ ዲዛሶን ዲሼ ዴሬዛ ቦላ ማርካ ጊዳና።

27 ኢስራኤል አሳይ አይ ማላ ማካላንቻኮኔ ዋዚና ሙሜኮ ታ ኤራይስ፤ ታኒ ሸምፖራ ፓጸ ኢስታራ ዲሺን ኢስቲ ጎዳ ቦላ ማካሊዛይቲ ታኒ ሃይቂዳፔ ጉዬ ኬሂ ማካላንቻታ ጊዳና።

28 ሄሳ ጊሻስ ታ ኢስታስ ሃይሳ ኡባ ዮታና ማላ ኮራፒኔታኔ ዴሬ ሃላቃታ ታስ ሸሺቴ፤ ታኒ ኢስታ ቦላ ሳሎኔ ሳኦ ማርካ ጊዳና ማላ ጴይጋና።

29 ታኒ ሃይቂዳፔ ጉዬ ታ ኢንቴና ኣዛዚዳ ኣዛዘፔ ካሬ ኬዚዲ ቱና ኦሶ ኢንቴ ኦላናይሳ ታ ኤራይስ፤ ጎዳ ሲንላን ኢታ ኦሶ ኦሊዲ ኢንቴ ኢዛ ሃንቄሊኮ ኢዚ ኢንቴ ቦላ ቦሻ ዬዳና።»

ሙሴ ዬላ

30 ሄሳፌ ጉዬ ሙሴይ ኩሜላ ኢስራኤል አሳ ሲንላን ሃይታ ዬላ ቃላታ ኮይሮፔ ቢዲ ዉርሴላ ጋካናስ ዮቲዴስ።

32

1 ሳሎቶ! ታኒ ዮቲዛይሳ

ኤዘጊ ሲዪቴ፤

ሳኦዞ ታ ዶናፔ

ኬዚዛ ቃላ ሲያ።

2 ታ ኢሚዛ ቲሚርቴይ

ኢራ ማላ ቡኮ፤

ታ ሃሳያይካ

ጸዛ ማላ ጸኬቶ፤

ማታ ቦላ ሎዲ ጊ ቡኪዛ

ኢራ ማላ ቡኮ፤

ካላ ጫሬቻ ቦላ

ፑሴ ማላ ዋጵ።

3 ታኒ ጎዳ ሱንላ አዋጃይስ፤

ኦ ጸሳ ጊታቴላ

ኢንቴ ዮቲቴ።

4 «ኢዚ ኮስ ሚጸ፤

ኢዛ ኦሶቲካ ኩሜላ፤

ኢዛ ኦጌቲ ዉሪካ ሱሬ፤

ኢዚ ባሌቶንታ

አማኔቲዳ ጸሳ፤

ኢዚ ሱሬኔ ጸሎ ጸሳ።

5 «ኢስቲ ኢዛ ሲንላን

ኢታ ኦሊዳ፤

ኢሰቲ ባንታ ኢታቴላፌ
 ዴንዲዳይሳን
 ሃይሳፌ ጉዬ
 ኢዛ ናይታ ጊዴቴና፤
 ኢሰቲ ቦካኔ ጌላ ዬሌታታ።

6 «ኢንቴኖ ኤያቶ!
 ቃሴካ ዋዚናይ ባይንዳይቶ!
 ኢንቴ ጎዳሰ
 ኢሚዛ ዛርይ ሃይሴ?
 ኢንቴና ሜዲዳ
 ኢንቴ ኣዋይ ኢዛ ጊዴኔ?
 ኢንቴና ሜዲዳ ሃይሳሰ
 ጋሊዳይ ኢዛ ጊዴኔ?

7 «ካሴ ቤኒ ዋዴዛ
 ዩሺ ቆፒቴ፤
 ዳር ዬሌታታ
 ላይላካ ኣኬኪቴ፤
 ኢንቴ ኣዋታ ኦይቺቴ፤
 ኢሰቲ ኢንቴሰ ዮታና፤
 ካሴ ጨማታካ ኦይቺቴ፤
 ኢሰቲ ኢንቴሰ
 ቆንጨሲ ዮታና።

8 «ኡባፌ ቶቃ ጸሳይ
 ካዋቴላታሰ ቢታ
 ጊሼቺዳ ዋዴ፥
 ኣሳ ናይታ ኢሰታ
 ዛሬን ዛሬን ሻኪዳ ዋዴ፥
 ኢሰራኤሌ ኣሳ ቆዳ ኬና
 ካዋቴላታሰ ጳሰ ዋሊዴሰ።

9 «ኢሰራኤሌይ ጎዳሰ ጊሻ፤
 ያቆቤይካ
 ኢዛሰ ቡዞ ሚሻ።

10 «አይኮይካ ባይንዳ ባዞን
 ጫርኮይ ፑኒዛ ቢታን
 ኢዛ ደሚደሰ፤
 ኢዛሰ ጎንዳሌ ጊዲደሰ፤
 ባ አይፌ ጨር ማላ
 ኢዛ ናጊደሰ።

11 ጎሌ ካፎይ ባ ጨዩታ
 ፒራዶ ታማርሲዛ ማላ፥
 ባ ቁፌ ሚጫዳ
 ጋካ እይካ አሺዛ ማላ፥
 ጎዳይ ባ ቁፌን ሃጽዲ
 ኢሰታ አሺደሰ።

12 ሃራ ኤቃ ጸሳቲ
 ኢዛራ ባይንዳ ጎዳይ
 ኢዛ ባርካ ካሌሊደሰ።

13 «ዶቃ ሲሆን
 ኢዛ ዋሊደሰ፤
 ቢታፌ ሞኪዳ ካላ አይፌ
 ኢዛ ሚዚደሰ፤
 ዛላፌ ቤቲዳ ኤሰ ኡሺደሰ፤
 ሹቻ ቢታን ሞኪዳ
 ዋጋራ ዛይቲ ሚዚደሰ።

14 ሚዛፔ ዶርሳፌኔ
 ደይሻ ዉደፔ
 ቤቲዛ ማላኒኔ ኦይሰ
 ባሳኔ ዳሬፔ ቤቲዛ
 ኦሃላ ላቃታ፥
 ሞዶ ቆርሾታ፥
 ዋፋኖታኔ ደይሻታ፥
 ሎኦ ጊሰቲ ዳቦራ
 ኢሰታ ሚዚደሰ።

ኢንቲ ኢዛ ዳሬቲ
 ዘኦ ዋይኔ ሚላ አይፌፔ፥
 ጊጊዳ ዋይኔ
 ኡሹ ኡዱዶታ።

15 «ኢሰራኤል አሳይ

ኦርዲዲዲ ማካሊዲዲ።
ዲሮ ሚዲ ሞዲዲዲ
ሞላቲዲዲ፤
ባና ሚዲዲ ጸሳ ኦጊዲዲ፤
ባና ኦጊዲዲዲ
ካወጊዲዲ።

- 16 ኢሰቲ ኤቃ ጸሳታሰ
ጎይኒዲ ጸሳ ሚጊሲዲ፤
ባንታ ኢታ ኦሶንካ
ኢዛ ሃንቁሊዲ።

- 17 ሃይሳፌ ካሴ
ባ ኤሮንታይታሰ፤
ጸሰ ጊዶንታ ዲይዳንፋታሰ፤
ማታ ዋዴ ዪዲ ጸሳታሰ፤
ቤኒ ኢሰታ ኦዋቲ ኢሰታሰ
ጎይኖንታ ኤቃታሰ፤
ኢሰቲ ያርሾ ሺሺዲ።

- 18 ኢሰቲ ባሰ ዴኦ ኢሚዲ
ዛላ ዶጊዲ፤
ባና ሚዲዲ
ጸሳካ ባሊዲ።

- 19 «ጎዲይ ሄሳ ቤኢዲ
ኢሰታ ቦላ ሃንቁቲዲዲ፤
ኢሰታ ማጫ ናይታኔ
ኢሰታ ኦቱማ ናይታ ዲጊዲዲ።

- 20 ተኒ ታ ኦይፌሶ
ኢሰታፌ ጌንፋና፤
ኢሰቲ ጌላኔ ኦማኔቶንታ
ዴሬ ጊዲዲ ጊሻሰ
ኢሰታ ወርሴሊ
ኦይ ጊዳናኮ
ታ ጮኡ ጋ ቤያና።)

- 21 ቱሙ ጊዶንታ ጸሳታን
ታና ሚጊሲዲ፤
ጎኦይ ባይንዲ
ባ ኤቃ ጸሳታን

ታና ሃንቄሊዳ።
 ታኒካ ኢስታ ካጼቲዳ
 ካዎቲፋታ
 ኢስቲ ሚጌታና ማላ ኦፋና።
 ታ ኢስታ ኦኬኮንታ
 ዴሬታን ሃንቄፋና።

22 ታ ሃንቆይ
 ታማ ማላ ኤጻና፤
 ቢታኔ ቢታ ቦላ ዲዛ
 ኡባ ጸጋና፤
 ሄ ታማይ ሲኦሌ
 ጨማ ጋካናሰ ኤጻና፤
 ታማዚ ዙማሰ
 ዮች ጋካናሰ ማና።

23 ታኒ ኢስታ ቦላ
 ዛሬፋ ዛሬፋ
 ቦሻ ኤሃና፤
 ታስ ዲዛ ዎንዳፌ
 ታ ኢስታ ቦላ ወርሳና።

24 ታ ኡባ ወርሲዛ ኮሻ
 ኢስታ ቦላ ዬዳና፤
 ኢሳፌ ኢሳን ኦጲዛ
 ኢታ ሃርጌኒኔ
 ቦሻን ኢስቲ ወራና፤
 ሜቶ ጋሊዛ ኢታ ዶኦታኔ
 ዲኪዛ ማርዜራ ዲዛ
 ሾሻታ

ታ ኢስታ ቦላ ዬዳና።
 25 ኦጌ ኡባን ኢስታ ናይታ
 ኦላይ ወርሳና፤
 ኢስታ ኬፋ ጊዶንካ
 ሂርጋይ ኩማና፤
 ፓንፋቲኔ ጌላኦቲ፥
 ጉፋ ናይቲኔ
 ጨማቲ ኡባይ ወራና።

26 ታኒ ኢስታ ኡባ ላላና፤
 ሄሳፌ ጉዬ ኢስታራ

- ሃሳክና አሲ ዴና።
- 27 ጊዶ አቲን
 ኢሰታ ሞርኬቲ፥
 ሱኒ ኑ ዋልቃን
 ኢሰታ ጸኒዶሰ አቲን
 ጸሴ ጊዴና ጊዱ
 ኦቶሬቲላን ጨቄቲዱ
 ታና ሃንቄላናኮ
 ጋዳ ቆፓይሰ።
- 28 ኢሰራኤል አሳይ
 ዩሺ ቆፖንታ ካዎቲል፤
 ኢሰታሰ አኬካይ ዴና።
- 29 ኢሰቲ ኤራታ ጊዱዳኮ
 ሃይሳ ኢሰቲ
 ካሰቲዱ ቆፓና፤
 ባንታ ዉርሴላንካ
 ሃናናይሳ ዩሺ
 ቆፓናሺን!
- 30 ኢሰታ ሜዲዳይሲ
 ኢሰታ አላ ኢሞንታኮ፥
 ጎዳይ ኢሰታ
 ዩጊ አጎንታኮ፥
 ኢሳዴይ 1,000 አሰ
 ዋሰቲ ጎዳንዴ?
 ዋይኮ ናሞአቲ 10,000 አሰ
 ዋሰቲ ጎዳኔ?
- 31 ሃራይ አቶሺን ኑ ሞርኬቲ
 ኢሰታ ጸሳይ
 ላፋ ጊዱዳይሳኔ
 ኢሰራኤል ጸሳ ማላ
 ጊዶንታይሳ ኤሬቴሰ።
- 32 ኑ ሞርኬቲ ሶዶሜኔ
 ጋሞራ ዴሬ አሳ ማላ ቱና፤
 ኢሰቲካ ጫሞኔ
 ማርኬራ ዲዛ
 አይፌ አይፊዛ
 ዋይኔ ሚላ ማላ።
- 33 ኢሰታ ዋይኔ ኡሻይ

ሾሻ ማርዜ ማላ፤
ቃሴካ ሃሶ ሾሻ
ማርዜ ማላ።

- 34 «ሃይሳ ታኒ ደጋዲና?
ታ ማዘጋባን
ጸፊቴ ኡቴዴሰ።
- 35 ኢሰታ ሞርኬታ ቦላ
ሃሎ ኬሳናይ ታና፤
ኡባሲካ ታ ኢሰታ
ኦሶ ኦሶ ማላ ኢማና፤
ኢሰታሰ ጳዮ
ጋላሲ ጋኪዳ ጊሻሰ
ኢሰቲ ጱጴታና፤
ኤሶንካ ጳያና።»

- 36 ኢሰታሰ ዋልቃይ
ደቡርዳይሳኔ
ኢሰታካ ማዲዛይ
ባይንዳይሳ ቤኢዲ፥
ኅዳይ ባ ኣሳሰ ፒርዳና፤
ባ ኣይሌታሰካ ቃጴታና።
- 37 ኅዳይ ባ ኣሳ፥
«ኢሰቲ ኣማኔቲዛ
ኢሰታ ጸሳቲ
ኣዋን ዲዞ?
ኢሰቲ ባቃቲ ኣቲዛ ዛላቲ
ኣዋን ዲዞ?» ጊ ኦይቻና።
- 38 ኢሰቲ ያርሾሰ
ሺሺዛ ቶልሶዛ ሚዳይቲ፥
ኢሰታ ዋይኔ ኡሻ
ያርሾዛ ኡዪዳ
ኢሰታ ኤቃ ጸሳቲ
ኣኔ ሃኢ ኢንቲና
ዴንዲ ማዴቶ፤
ቃሴካ ኢንቲሰ
ዲሳሶ ኢሜቶ።

- 39 «ታኒ ጸላ
 ጸሰ ጊዲዲይሳ ኤሪቴ፤
 ታፔ ሃራ ጸሲ ዴና፤
 ዋጲዛይካ ፓጸ
 ዋሊዛይካ ታና፤
 ታኒ ማዲንሳይሲኔ
 ፓላይሰ፤
 ታ ኩሼፔ ኦኒካ
 ኢንቴና ኣሼና።
- 40 ታኒ ታ ኩሼ
 ፑዴ ሳሎ ዴንላዳ፥
 ሩታ ሜርናሰ ዴኣይሰ።
- 41 ዋዋጪ ጊዛ
 ታ ጊላ ማሻ ሌፋና፤
 ታ ኩሼይ ፒርዳሰ ኦይካና፤
 ታ ዋርኬታ ቦላ
 ሃሎ ኬሳና፤
 ታና ኢጲዛይታሰ
 ታ ኢሰታ ኦሶ ማላ
 ኢሰታሰ ኢማና።
- 42 ዋርኬታ ሃላቃታ፥
 ማዲንጲዲይታኔ
 ዲኤቲዲይታ ሱላን
 ታ ዋንዳፌታ
 ታ ማሶሳና፤
 ታ ጊላ ማሻቲካ
 ታ ዋርኬታ ኣሻ ማና
 ጋ ጫቃና።
- 43 «ኢንቴኖ ካዋቴላቶ!
 ጎዳይ ባ ኦሳንቻታ
 ሱላ ኣጫና፤
 ዋርኬታ ቦላ ሃሎ ኬሳና፤
 ባና ኢጲዛይታ ቃጸያና፤
 ባ ዴሬዛ ናጋራ ዉርሳና፤
 ቢታዮካ ቱናቴላፌ ጌሻና፤
 ሄሳ ጊሻሰ
 ኢንቴ ኢዛ ኣሳራ

ኢሲፌ ኡፋዬቲቱ» ጊዲ፤

44 ሙሴይኔ ናዌ ና ኢያሶይ ዴሬዚ ሲዩሺን ሃ ዩፋዛ ዮቲዳ።

ዉርሴፋን ሙሴይ ኢሚዳ ዞሬ

45 ሙሴይ ሃይታ ሃ ቃላታ ኩሜፋ ኢሰራኤል ኣሳ ሲሲዳፔ ጉዬ፤

46 ኢዚ፤ «ሃይሳ ዋጋ ቃላ ኡባ ኢንቲ ናይቲ ሎኤል ናጋና ማላ፤ ኢሰቲ ኦፋና ማላኔ ኢንቲ ናይታ ኢንቲ ኣዛዛና ማላ ሃች ታ ኢንቲሰ ማርካቲዛ ቃላ ኡባ ኢንቲ ዋዚናን ዋሊቴ።

47 ሃ ቃላይ ኢንቲሰ ዴኦፔ ኣቲን ጮ ሜላ ቃላ ጊዴና፤ ሃ ቃላ ናጊኮ ኢንቲ ዮርዳኖሴ ፒኒዲ ላታና ቢታንካ ኣዲሳ ላይሳ ኢንቲ ዴኣና» ጊዴሰ።

ሙሴ ሃይቆ ጊሻሰ ዮቲቲዳ ቲንቢቲ

48 ሄ ጋላሰ ጎዳይ ሙሴሰ ሂዝጊዴሰ፤

49 «ሞኣቤ ዴሬን ኢያርኮ ካታማ ጊናራ ዲዛ ኣባሪሜ ዙማታ ጊዴፌ ኔቦ ዙማ ቦላ ኬዛ፤ ሂሰታዳ ታኒ ኢሰራኤል ኣሳሰ ኢማና ጊዳ ካናኔ ቢታ ሄ ፒንፋን ጸላ።

50 ኔ ኢሻ ኣርኔይ ሆሬ ዙማ ቦላ ሃይቂዲ ካሴ ሃይቂዳ ባ ኣሳታን ጋይቲዳ ማላ ኔካ ሄ ዙማ ቦላ ሃይቃዳ ኔ ኣሳታን ጋይታና።

51 ኢንቲ ናሞኣይካ ኢሰራኤል ኣሳ ሲንፋን ታሰ ኣማኔቲቤኬታ፤ ጸኔ ባዘን ቃዴሴ ካታማ ማታን ዲዛ ማሪባ ሃፋ ኣቻን ታ ጌሻቴፋ ኢሰራኤል ኣሳ ቤሲቤኬታ።

52 ሄሳ ጊሻሰ ኔኒ ሄ ቢታዮ ሃሆን ዳሼ ቤኣና ኣቲን ታኒ ኢሰራኤል ኣሳ ላቲሳና ቢታዮ ኔኒ ጌላካ።»

33

ሙሴይ ኢሰራኤል ኣሳሰ ባዚዳ ባሳ ቃላ

1 ጸሳ ኣሰ ሙሴይ ሃይቃናፔ ካሴቲዲ ኢሰራኤል ኣሳሰ ዋሊዳ ባሴ ቃላይ ሃይሳፌ ካሊ ዲዛይሳ፤

2 ሙሴይ፤

«ጎዳይ ሲና ዙማፔ ዪዴሰ፤

ኤዶሜፔ ኣዋ ኣርሼይ

ኑ ቦላ ፖኢዴሰ፤

ፓራኔ ዙማ ቦላፌካ

ኑሰ ጸልቂዴሰ፤

ኢዛሰ ኡሻቻ ባጋራ

- ታማ ላጮይ ዳስ፤
 ቆዳይ ባይንዳ ኪታንቻቲ
 ኢዛራ ኢሲፌ ዳቴስ።
- 3 ጎዳዉ! ኔኒ ዳራ
 ኬሃ ሲቃሳ፤
 ጌሻቲ ኡባይካ
 ኔ ኩሼን ዳቴስ፤
 ኔ ቶሆ ጋርሳን
 ጉልባቲ ጎይኔቴስ፤
 ሂስቲዲ ኔፔ
 ኣዛዞ ኤኬቴስ።
- 4 ሙሴይ አሚዳ ዋጋይ
 ኢስራኤል ኣሳሰ
 ላታ ጸንጾ።
- 5 ኢስራኤል ቆሞቲ ኡባይኔ
 ዳራ ሃላቃቲ ሸቂን
 ጎዳይ ባ ዳሬ
 ኢስራኤል ኣሳ ቦላ
 ካዋቲዳስ» ጌዳስ።
- 6 ኦሮቤሌ ቆሞታ ጌሻስ ሙሴይ፥
 «ኦሮቤሌ ቆሞቲ
 ዳቶ ኣቲን ሃይቆፌቶ፤
 ኢስታ ቆዳይካ
 ፓጮፎ» ጌዳስ።
- 7 ዩሁዳ ቆሞታ ጌሻስ ሙሴይ፥
 «ጎዳዉ፥ ዩሁዳ ቆሞታ
 ዋሶ ሲያ፤
 ኢስቲ ባ ዳቦታራ
 ኢሲፌቴላን
 ዳና ማላ ኦላ፤
 ኢስታስ ጌታ
 ዋልቃ ኢማ፤
 ኢስቲ ባ ሞርኬታራ
 ኦሌቲሺን ኔኒ ኢስታ
 ማዳ» ጌዳስ።
- 8 ሌዌ ቆሞታ ጌሻስ ሙሴይ፥
 «ጎዳዉ! ኔኒ ኢስታ
 ማሳን ፓጮዳሳ፤

ማሪባ ሃላ አቻን
ኢስታራ ፓላሜታዳሳ፤
ሄሳ ጊሻስ ቱሚሜይኔ
ኡሪሜይ ኔ ዶሲዳ
ኔ ኦሳንቻታስ ጊድ።

- 9 ኔ ጊሻስ ጊዳ
ኢስቲ ባና
ዬሊዳይታ ባሊዳ፤
ባ ዳቦታፔ ሻኬቲዳ፤
ባ አሻታፔ ሻኬቲዳ፤
ባ ናይታ አጊዳ፤
ኔ ቃላ ቦንቺዳ፤
ኔ አሚዳ
ጫቆ ቃላካ ናጊዳ።

- 10 ኢስቲ ኔ ዋሊዳ
ማራ ያቆቤ፥
ኔ ዋጋካ ኢስራኤሌ
አሳ ታማርሴቲስ፤
ኢስቲ ኔ ሲንላን
ኤጸኔ ጨዋሴቲስ፤
ጸጌቲዛ ያርሾካ
ያርሾ ያርሺዛሶዛ ቦላ
ሺሺቲስ።

- 11 ጎዳዉ! ኔ ኢስታ
ዴኦ አንጃ፤
ኢስቲ ኦሊዛ ኦሶ ኡባን
ኔ ኡፋዬታ፤
ኢስታ ሞርኬታ ሻያ
ኔ ዱላ፤
ኢስታ ኢጺዛይቲ
ናምአንሶ ዴንደንታ ማላ
ዲጋ!» ጊዴስ።

- 12 ቢኒያሜ ቆሞታ ጊሻስ ሙሴይ፥
«ጎዳይ ሲቂዳ አሲ
ኢዛን አማኔቲ ዴስ፤
ኡባ ጋላስ
ኢስታ ኢዚ ናጌስ፤

ባ ሃሼን ቶኪዲ
ሼምፒሴስ» ጊዳስ።

13 ዮሴፌ ቆሞታ ጊሻስ ሙሴይ፥
«ጎዳይ ሳሎፔ ቡኪዛ ኢራን፥
ቢታፌ ፑዳ ኬዚዛ ፑልቶን
ኢንቴ ቢታ ኣንጅ።

14 ኣዋ ዎዴ ካዲዛ
ሎኦ ኣይፌ ኣሞ፤
ዎዴን ዎዴን ካዲዛ
ካላ ኣይፌን ኩሞ።

15 ቤኒሶፌ ዲዛ
ኢስታ ዙማቲኔ
ዙምቡላቲ ጮራኔ
ሎኦ ኣይፌን ኣንጅቴቶ።

16 ኢስታ ቢታይ
ሎኦ ሚሻን ኩሞ፤
ጸጌቲዛ ቱሻ ጊዶፌ
ቆንጨዳ ጎዳ
ኪያቴሉ ዳሮ፤
ዮሴፌይ ባ ኢሻታ ጊዶን
ሃላቃ ጊዲዳ ጊሻስ
ሃ ኣንጅቲ ኡባይ
ኢዛ ጋኬቶ።

17 ዮሴፌ ቴማይ
ኮርማ ቦራ ማላ ያሺሶ፤
ኢዛ ካጩቲ
ሜንላ ካጩ ማላ
ሚኖ ጊዳቶ፤
ኢዛ ካጩቲ ሺያን ቆዴቲዛ
ሚናሴ ዛሬታኔ
ታሙ ሺያን ቆዴቲዛ
ኤፍሬሜ ዛሬታ፤
ሄ ካጩታን ኢዚ
ካዎቴላታ ቃይጫና፤
ቢታ ጋጳ ጋካናስ
ኢስታ ኢዚ ጎዳና» ጊዳስ።

18 ዛቢሎኔ ቆሞታ ጊሻሲኔ ዪሳኮሬ ቆሞታ ጊሻስ ሙሴይ፥
«ዛቢሎኔ! ኔኒ

- ኔ ኬሳን ኡፋዬታ፤
 ዪሳኮሬ! ኔኒካ
 ኔ ዱንካኔ ጊደን ኡፋዬታ።
- 19 ኢሰቲ ዳሬዛ ፑዴ
 ዙማ ቦላ ዳይጊዱ
 ሄን ደሎቱላ
 ያርሾ ያርሻና፤
 ባንታሰ አቆታኔ
 ዱሬቴሰ አባፌኔ
 ሻሚንታፌ ዳማና» ጊደሰ።
- 20 ጋዴ ቆሞታ ጊሻሰ ሙሴይ፥
 «ጋዴ ቆሞታ ዛዋ
 አሲዳ ጸሳይ ጋላቴቶ፤
 ጋዴይ ሞርኬታ
 ሜንጼሬላናሰ
 ጋሞ ማላ ሻንካቴሰ።
- 21 ሃላቃታሰ ቤሲዛ ቢታዚ
 ኢዛ ናጌሰ፤
 ኢዚካ ሎኦ ቢታ
 ባሰ ዶሪዴሰ፤
 ዳራ ካሌሊዛይቲ ሺቂዳ
 ዋዴ ኢዚ ጎዳ ሺኔኔ
 ደሎ ፒርዳ ፒርዱዴሰ» ጊደሰ።
- 22 ዳኔ ቆሞታ ጊሻሰ ሙሴይ፥
 «ዳኔይ ባሳኔፔ
 ጉፒ ኬኢዛ
 ዋዳላ ጋሞ ማላ» ጊደሰ።
- 23 ኒፍታሌሜ ቆሞታ ጊሻሰ ሙሴይ፥
 «ኒፍታሌሜይ ጎዳ
 ማታን ዶሴቲዴሰ፤
 ጎዳ አንጆንካ ኩሚዴሰ፤
 ኢዛ ዛዋይ አባፌ አፂዱ
 ዱጌሃ ባጋ ጋኪዴሰ» ጊደሰ።
- 24 አሴሬ ቆሞታ ጊሻሰ ሙሴይ፥
 «አሴሬ ቆሞቲ
 ሃራ ቆሞታፔ
 አፂ አንጆቲዳይታ ጊዴቶ፤
 ኢሰቲ ባ አሻታ ጊደን

- ዶሴቲዳይታ ጊዳቶ፤
 ኢሰታ ቢታይ
 ዛይቲን ኩሞ።
 25 ኢሰታ ካታማታ ፔንጌቲ
 ቢራታኒኔ ጳርቁማላን
 ሚኒ ጎርዴቲቶ፤
 ባ ዲዛ ላይል ኡባን
 ኢሰቲ ዋልቃማ ጊዳቶ» ጊዳሰ።
- 26 ኢሰራኤል አሳዉ!
 ሳሎፔ አንቲና ማዳናሰ
 ባ ቲማራ ሻራ ቦላ ሄሜቲዛ
 አንቲ ጸሳ ማላ
 ሃራ ጸሲ ዴና።
- 27 ሜርና ጸሳይ
 አንቲሰ ዱሳሶ፤
 ሜርናሰ ዲዛ ኢዛ ቄሴቲ
 አንቲፌ ጋርሳራ
 ዲዲ ካፌቲሰ፤
 አንቲ ሞርኬታ ኢዚ
 አንቲ ሲንፋፌ ጎዳና፤
 አንቲ ኢሰታ ጳይሳና ማላ
 ኢዚ አንቲና ማዳና።
- 28 ሄሳ ጊሻሰ ኢሰራኤል
 አሳይ ሳሎፔ አራይ
 ኢዚን ቡኪዛ ቢታይን፥
 ካሌኔ ዋይኔ ኡሺ
 ኢዚን ኩሚዳ ቢታይን
 ሂርጋይ ባይንዳ
 ሳሮን ዴኣና።
- 29 ኢሰራኤል አሳዉ!
 አንቲ አይ ማላ
 አንጃቲዳ ዴሬ!
 ጎዳይ አሺዳ
 አንቲ ማላይ ኦኔ?
 ኢዚ አንቲሰ ጎንዳሌኔ
 አንቲና ማዲዛይሳ፤
 ኢዛን አንቲ ጸኒዛ
 ጊሳ ማሻ፤

እንቴ ሞርኬቲ
 እንቴ ሲንላን ጉፋናና፤
 እንቴካ ኢስቲ ጎይኒዛሶታ ላላና።

34

ሙሴ ሃይቆ

¹ ሙሴይ ሞክሮፔ ዴንዲ ፑዴ ኔቦ ዙማ ቦላ ኬዚዴስ፤
 ኢያርኮፌ ኣርሼይ ሞኪዛ ባጋራ ዲዛ ፑዴ ፒዝጋ ዙማ ጸራ
 ጋኪዴስ፤ ኢዚ ሄን ዲሺን ጎዳይ ጋላኣዴፔ ቢዲ ዳኔ ጋካናሰ
 ዲዛ ቢታ ኡባ ቤሲዴስ።

² ኒፍታሌማ ቢታ፥ ኤፍሬማኔ ሚናሴ ቢታ ኡባ ኣርሼይ ወሊዛ
 ባጋራ ዲዛ ዎጋ ጌታ ኣባ * ጋጸ ጋካናሰ ዲዛ ዩሁዳ ቢታ፥

³ ኔጌቤኔ ዛምባይ ዲዛ ኢያርኮ ሾባፌ ቢዲ ዞኣሬ ጋካናሰ
 ዲዛሶ ኡባ ቤሲዴስ።

⁴ ጎዳይ ሙሴስ፥ «ኣብራማስ፥ ዪሳቃሲኔ ያቆቤስ፥ ቀታ እንቴ
 ዜሬታታ ላቲሳና፥ ጋ ጫቂዳ ቢታያ ሃኖኮ! ሄኮ ኔኒ ኔ ኣይፌራ
 ቤኣና ማላ ኦላዲስ፤ ጊዶ ኣቲን ኔ ጌላካ» ጊዴስ።

⁵ ሄሳ ጊሻሰ ጎዳ ኦሳንቻ ሙሴይ ሞክሮ ቢታን ዲሼ ጎዳይ
 ኢዛሰ ዮቲዳ ማላ ሄን ሃይቂዴስ።

⁶ ጎዳይ ሙሴ ኣሃ ሞክሮ ዴሬን ዲዛ ቤቲ-ፔኦሬ ካታማፔ
 ሲንላን ዲዛ ሾባን ሞጊዴስ፤ ጊዶ ኣቲን ኢዚ ሞጌቲዳሶ ሻኪ
 ኤሪዛ ኣሲ ሃቕ ጋካናሰ ቤቲቤና።

⁷ ሙሴይ ሃይቂሺን ኢዛሰ ላይላይ 120፤ ጊዶ ኣቲን ኢዛ
 ኣይፌይ ዶልጂሚቤና፤ ኢዛ ዎልቃይካ ዳቡርቤና።

⁸ ኢስራኤሌ ኣሳይ ሙሴስ ሚቻይ ኣቆና ጋካናሰ ሄሹ ታሙ
 ጋላሰ ጋካናሰ ሞክሮ ዴምባን ካዮቲሼ ዩኪዴስ።

⁹ ባ ኦላን ኢዚ ኦላና ማላ ሙሴይ ናዌ ና ኢያሶ ቦላ ባ ኩሹ
 ዎሊዲ ሹሚዳ ጊሻሰ ኢያሶይ ኣቶ ኤራቴላኒኔ ኣያናን ኩሚዴስ፤
 ኢስራኤሌ ኣሳይ ኢያሶስ ኣዛዜቲዴስ፤ ጎዳይ ሙሴ ባጋራ ኢስታሰ
 ኢሚዳ ኣዛዘዛካ ናጊዳ።

¹⁰ ኣሲ ኣሳራ ሃሳይዛ ማላ ጎዳራ ሃሳይዳ ሙሴ ማላ ናቤይ
 ኢስራኤሌ ቢታን ዴንዲቤና።

* 34:2 ኣርሼይ ወሊዛ ባጋራ ዲዛ ዎጋ ጌታ ኣባ ጊዛይሲ ሚዲቲሬኔ ኣባ ቤሲስ።

34:4 ሜዴ 12:7፤ 26:3፤ 28:13 34:10 ኬሳ 33:11

11 ጎዳይ ገብጾ ካዋዛኩ፥ ኢዛራ ኦሊዛ ሃላቃታኮን ኩሜላ
አሳኮ ዩዲዲ ኢዛ ባጋራ ኦራሊኔ ማላሊሲዛ ሚሽ ኡባ ኦሊዳ
ሙሴ ማላ ሃራ ናቤይ ኦኒካ ዴና።

12 ሙሴይ ኢሰራኤሌ አሳ ኡባ ሲንላን ኦሊዳይሳ ማላ
ዋልቃማኔ ባቢሲዛ ማላታታ ኦሊዳ ሃራ ናቤይ ሙሌካ ዴና።

ጌሻ ማጸፋ

Gamo: ጌሻ ማጸፋ Bible of Ethiopia, Ethiopic script

copyright © 2024 The Word for the World International

Language: Gamotso (Gamo)

Contributor: The Word for the World Northern Africa

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-05-03

PDF generated using Haiola and XeLaTeX on 2 May 2025 from source files dated 3 May 2025

d0ee6825-f93e-584e-8c8f-567d8d068e4b